



97.451
6339
57

57




青門集






青門旅橐詩序

詩無風尚而善持風尚者則雖時習遷流遞相轉變而仍不失乎
詩人正則之旨猶之善琵琶者六么散序各有變調然從聲既定
其爲轉關者自在也毗陵邵子湘以詩古文名于時余閒讀所選
明四家詩每就其辨論窺其指歸則雖力持其流沫而要之從聲
變律所稱宮羽相須者不少失焉今年春子湘來京師王公大人
爭欲得一見以爲重子湘乃避居隘巷獨與愚山阮亭諸公晨夕
倡和余聞而慕之近出所爲旅橐詩一卷授余卒讀抑何清新發
越極揚厲之變而仍不失乎正也夫死陵滄浪別具風采而要其
所趣則青蓮少陵各不能外子湘以和平之情發七羽之調高涼
峻激鶯鳴鶴唳而神雄氣渾一如龍拏而虎躩者自非青蓮少陵
不足以狀其所至也子湘之來適當盛朝舉賢徵車盈集士稍
負材藝者皆思自致青雲才如子湘顧反不與宜乎發爲詩歌不
無芥蒂而子湘處之怡然方日與諸公流連道故蓋所爲自命者



固有在也子湘豈肯以南山北闕爭得失哉康熙己未重九前一日合肥李天馥撰



予自己未春入都涉秋東之海上登蓬萊閣求三神山不可見已乃轉客淄青客歷下又往來都門者數年乙丑南歸客武林頗久前年踰大庾嶺滌端溪客羊城欲訪羅浮不果還抵章江會族兄靜山先生視學江右遂兩年餘然後歸蓋己巳六月也逆數己未忽忽十有一年此十餘年中無歲不旅閒一再歸草堂不久輒去之則草堂亦旅也又二年始得排次己未迄辛未所存詩文凡六卷題曰青門旅囊鏗之梨嗟乎士負七尺軀進不能有所豎立退不能巖棲谷飲垂老矣溷姓名于不任不隱閒為鄉里所笑行自慙也不幸如昌黎所云衣食于奔走學殖日落而猶欲以是詹詹者與立言之士爭身後名于萬一又重自悲也雖然某于此亦有可以自信不為流俗毀譽非笑之所移者而況海內交遊離合之迹忠孝節烈之行事與夫山川遊覽之勝往往見于予文它日歸草堂晴簷偃曝偶一展卷或亦蹶然而自笑也夫邵長蘅題

青門旅囊詩目

卷一 古近體詩一百十首

出門

丹陽別暉正叔二首

榆樹行

渡江值雪

雪後滁州道中

立春

徐州漢高廟歌

戊午除夕阿城客舍同楊芝田汪新又守歲三首

元日荏平道中

交河道中大風

讀愚山阮亭兩先生詩賦贈

題王咸中石塢山房圖即送之還山

青門旅囊詩目

卷一 古近體詩一百十首

出門

丹陽別暉正叔二首

榆樹行

渡江值雪

雪後滁州道中

立春

徐州漢高廟歌

戊午除夕阿城客舍同楊芝田汪新又守歲三首

元日荏平道中

交河道中大風

讀愚山阮亭兩先生詩賦贈

題王咸中石塢山房圖即送之還山

仲春雪後侍讀王阮亭先生招李子德潘次耕梅耦長董蒼水同
集用積素廣庭閒爲韻五首

學士王昊廬先生招李子德顧赤方在山長諸子同集時子德談
兵事甚悉

送翁武原同知黃州

送吳昞若遊大梁

三月十二日得瞻

句效柏梁體

送董舜民遊五臺山

送梅耦長遊西山

送毛月山遊黃州

送憚晉明孝廉下第歸

和葉九來憶鶴詩

題畫

今上所賜宮詹臣沈荃 御書大字恭賦長

都門旗亭讌集贈別豹人赤方蒼水諸子

和阮亭先生雨後西郭眺望見懷之作

雨後出西郭懷冰修子湘耦長 王士禛

平湖鮑聲來持汪鈍翁先生書索題草庭

二李行呈閣學李容齋先生

五月十七日喜聞諸公同官翰林賦贈五十韻 有序

陳其年贈余兩髯行戲爲狂歌答之時余將有梁齊之遊

兩髯行贈子湘 陳維崧

戲題兩髯行後贈其年子湘 士禛

已未七月五月初度遣懷二首

月夜冰修耦長借過阮亭先生寫齋同阮亭作三首

月夜喜冰修子湘耦長科跣見過 士禛

月夜起坐懷顧赤方

阮亭以詩索耦長畫次韻

初秋索耦長畫

士禎

地震詩戲效昌黎體

愚山侍講分貽敬亭綠雪茶和阮亭作

將之登州畱別阮亭愚山兩先生冰修其年耦長諸子

送子湘之登州詩

施閏章
陳維崧

在士禎
庚

毛奇齡
陸嘉淑

白溝河懷古

重過趙北口小憩

鷄鳴曲

蓬萊閣望海

冬夜遣悶效黃山谷

臘月廿四夜口號

已未登州除夜二首

雙白松為房慎菴侍御賦

東皋山房試茶歌

作客

雨泊露筋祠

寒食宿遷道中雨

鄒縣道中喜晴

經下邳偶書即目

任城太白酒樓歌

送友之鹽亭令

送友之莆田令二首

哭施愚山先生十韻

送黃紉公進士南歸

九日贈別家二峯

寄壽汪鈍翁先生三首

癸亥都門除夜

祭酒王阮亭先生招金穀似吳天章陶紫笥張杞園同集用夜闌
更秉燭為韻分得闌字

丁鴈水觀察捧表入賀即贈別還虔南
題龔節孫種橘圖有序

張魯菴水部招飲一畝居羣賢畢集斐然有作四首
京邸招集諸子送家樾公歸武林用東坡昨夜風月清夢到西湖

上為韻得十絕句
題豫章東湖圖二首

送孫編修使安南
詹事高澹人先生以蔬香圖卷子屬題卷中尚闕六言為補此體

四首
重輓愚山先生八絕句

後苦熱行
慈仁寺古松歌

贈張真人

李鄴園先生內召拜大司馬二首
西安將軍凱旋獻紅綠鸚鵡各一擬應制廿四韻

卷二 古近體詩一百三十九首

送少詹王阮亭先生祭告南海

將歸草堂東故鄉親友
南歸雜詩十首

舟中讀昌黎詩戲作
喜歸草堂即事四首

之武林舟中作
不到

四可樓夜坐
靈隱記遊六首

靈隱寺
射旭洞

飛來峯
呼猿洞

冷泉亭
三生石

山行即景

拜岳鄂王墓下二首

家二峯招丁芻園毛穉黃諸君看牡丹分賦四首

寄題陳椒峯密圃雜用少陵遊何將軍山林韻十首

戲題青門介壽圖歌

將遊粵東畱別西冷毛穉黃吳慶伯諸子

桐廬道中

富春渚

曉過釣臺不得上

衢州道中

常山曉發

餘干官舍題壁

登餘干冠山三首

舟泊瑞洪坐洪福寺竟日

樟樹鎮晚泊

峽江縣阻風

過螺子山望文丞相祠

泊泰和追悼蕭孟昉四首

上十八灘二首

又十八灘口號三首

偶題

贛江舟中憶亡友魏叔子三首

盛誠齋儀部權關贛江賦贈

五日南安舟中

過大庾嶺詠古兼述旅懷五百字

入峽

葉公二首為某公作
戲和子湘葉公之作 兄延齡

端州謠

發端州書感

海珠寺

南食行

晚泊清遠

峽山飛來寺

前題

皋石山歌

觀音巖

前題

彈子磯

庾嶺謁張文獻公祠

觸熱度嶺喜聞家靜山兄使節已抵豫章率爾奉簡

宿清江寺

盛誠齋儀部招登八境臺二首

舟夜

豐城道中

讀阮亭先生南海集戲題奉簡

武昌謠

筠州漫興

西陂雜詠為宋牧仲先生賦六首

淶波村
和松菴

釣家
芟梁

緯蕭草堂
放鴨亭

登臨江麗譙望閣阜山

中秋客廬陵使院戲效楊誠齋體

舟中九日

安福山行

分宜道中二首

題孫徵菴前輩觀瀾圖小照二首

袁州謁昌黎祠

宜春臺懷古

人日小飲牧仲先生署齋賦贈二首

雪後登滕王閣放歌

漢四神古鏡歌為家汝為作

南康阻風和彭觀宸廷獻夏庚廷謨

題錢舜舉三蔬圖和牧仲先生作

庚午五日楊青邨大令邀泛琵琶湖六首

芝城道中偶維舟村步即景

舟中為彭觀宸題四時漁樂圖

六月初二夜泊康郎山書所見

北蘭寺記遊六首呈澹公


又寄題棟花坪

仿舫居種瓜圖


到汝堂棟花坪

列岫亭澹雪泉

李渭清宮贊典試雲南遙寄二首



青門旅稟詩目



青門旅稟卷一

後集

武進邵長蘅子湘

古近體詩一

出門

田園二十載耕釣亦不閑驅犢東向下投竿北湖邊頗得遂疏懶

自謂將承年今年苦歲惡妻子憂藜藿研田轉疏蕪里閭亦蕭索

忍茲性命憂東身就遠役心迹遂乖違對人顏面赤此行實饑驅

豈敢托高迹歲晏離別苦道遠衣襦單層冰鬱峨峨積雪蔽岡巒

出門白苦辛慷慨歌路難

丹陽別惲正叔二首

北風索索雪毵毵野店離盃飲不酣惆悵明朝過江去數峯橫翠

是江南

一隊鈴聲趁曉驢帽簷低壓白侵鬢煩君小做唐人筆畫出丹陽

風雪圖
榆樹行

句容城邊古道傍榆樹千株萬株白枯榦僅存皮剝盡饑民慊慊
春作屑雜以糠粃半和土食之喉澀腸腹結此事傳聞五十年卽
今眼見增歎息去年大水波滔空桑麻委折洪濤風今年大旱魃
爲虐龜坼千里生蒿蓬告災頗遭縣官怒鞭撻不顧蒼黎窮煌煌
詔書屢寬恤上下一轍仍相蒙十年四海風塵起跋扈飛揚猶未
已巴蜀荆南急鼓聲東吳西浙成瘡痍往時民貧鬻兒女今年兒
女鬻無處老翁路旁臥不起乞得一錢淚如雨高天漠漠寒雲橫
愴惻吞聲策馬去

渡江值雪

挂席衝江雪孤舟圖畫中水兼天晶晶山合樹濛濛
行藏羨釣翁淘河飛不去暝立渚煙空

雪後滁州道中

環滁山色好况是雪中看天合千峯白風鳴萬樹寒
炊煙壓茅屋霽景明林端欲問歐陽蹟荒碑蘚蝕殘

立春

符離城邊淝水北客路逢春自可憐
形燕深閨虛想像菜盤野店亦新鮮
桑乾冰雪三千里却堪烽煙又一年
無恙吾廬風物好瓶梅菜几紙窗前

徐州漢高廟歌

沙邱車上腥鮑魚咸陽宮中迷鹿馬
山東羣盜如蝟毛篝火狐鳴叢祠下
是時真人起芒碭百戰雌雄判劉項
此地曾經舊戰場千年遺廟黃河旁
黃河南望戲馬臺嗚呼項羽真雄才
拉摧秦兵若枯芟指揮王侯提嬰孩
彭城形勢亦壯哉沐猴衣繡空見猜
土人伏臘走巫覡不祀重瞳祀隆準
成敗論人自古然真使英雄氣悽咽
君不見風塵瀕洞逐鹿時高才捷足
偶得之嗚呼高才捷足偶得之

戊午除夕阿城客舍同楊芝田汪新又守歲三首

出門三十日明日又新年客路吾山北鄉心汶水前
遣愁聊酒釀

送臘只詩篇慰我淒涼極燈花作意妍
 我曹盃酒共只當故鄉看歲月長途老親朋聚首難荒城明炬火
 野店略盤餐噉噉憐征鴈霜風竟夜寒
 暫遣鄉愁去茫茫又百端隔年當此夕兒女話團圓貧賤生離苦
 兵荒旅食難祇應判爛醉客淚莫沈瀾
 元日荏平道中荏平古重邱地
 客行依伴侶元日又征鴈邨落歡兒女叢祠爇紙錢疾風沙路暗
 落照古邱圓正憶江南景梅開媚遠天
 交河道中大風
 春到交河冰不開疾風馬首暗征埃空屯格格輪蹶苦寒日荒荒
 虎兕哀眯眼黃塵迷北望傷心白鴈故南迴正愁行路難如此悔
 別清溪舊釣臺
 讀愚山阮亭兩先生詩賦贈
 風雅代盛衰斯文豈小藝先哲遞師承流傳有根柢嗚呼百餘年

莊馗崩榛翳嘉隆始濫觴末流迺橫潰自從啟禎來啁噍不可記
 或如蒼蠅聲或如蝸蟻沸或如古冢幽漆燈嘯魑魅或如侈殿荒
 牛蛇眩神怪或如三日婦妝梳取媼媚或如土木偶蒙金寡生氣
 或如夜郎王黃屋嗤漢大詩詠著五行世變斯可慨 聖朝盪昏
 氛重熙治必世運開鳳麟遊者消作者至宣城別體裁清真變綺
 麗溫柔實詩教穆如風人遺新城富天授萬象聽鑪錘鍾呂振鴻
 音凡響一以悶走也菰蘆人少負遺俗累竭來客京華頗覺耳目
 異憑軾總俊民飛轡皆髦士金張侈貂蟬田寶傾勢利冠蓋驚塵
 埃營營各有謂鄙人昧所適曹騰祇益睡出門十步餘風沙目為
 醫低頭還入門拂拭增歎喟幸荷瓊瑤貽灑我塵土穢宵吟見朝
 曦晝讀燭仍繼辨香敬在茲繼繼申末契素心托松筠濡翰聊敘
 意
 題王咸中石塢山房圖即送之還山
 試披堯峯圖突兀堯峯出省嶂杳青蒼環湖靄明滅彼美山河入

結構倚巖穴，楂臥澗屢迴。篠密徑疑閉，松飈雜泉聲。異響同清越，想見梅花開。空山映殘雪，幽人性坦易。行止鮮滯迹，偶隨出山雲。復買還山屐，春江長。雕菰楓岸曉，格磔送君默。惆悵故山有泉石，仲春雪後侍讀王阮亭先生招李子德潘次耕梅耦長董蒼水同集用積素廣庭閒韻五首

江南梅已殘，燕北雪還積。斜日澹寒輝，冰溜承欄滴。脩然擁爐坐，空館閉愁寂。

叩門枉尺書，故人邀我去。汨汨泥潦盈，廣衢不可步。立馬望西山，

千峯晶凝素。

高齋接時彥，文翰互欣賞。痛飲思阮生，清談慕樂廣。躡步臨前除，

枯林寒月上。

雪色生夜寒，月華散空庭。哀鴻千里音，遠客千里情。賴茲賞心侶，

鄙醪還徐傾。

論交愜新歡，笑語永夜閒。近寺殷鐘聲，幽闌疑空山。惆悵此言別，

愛君數往還。

學士王昊廬先生招李子德顧亦方王山長諸子同集時子德談

兵事甚悉

左掖春陰散，西山霽雪初。儒臣逢下直，詞客數相於。舊好來京洛，新交接應徐。凍缸浮綠蟻，碎雪鱸鮮魚。有客談兵事，炎荒尚戰車。捷音連夜動，民力幾時舒。荏苒煙塵外，嶮澗涕淚餘。憂時紛感激，痛飲且軒渠。宮漏微寒淺，春星醉眼疏。尋欄索梅蕊，釘格出芹菹。厭禰知亡是，畱髡信有諸。坐殘銀菡萏，水吐玉蟾蜍。大雅看前輩，論詩實起予。羈棲隨燕雀，蹭蹬笑鷓鴣。方朔侏儒粟，昌黎宰相書。掃門吾不敢，開閣意何如。

送翁武原同知黃州

赤壁山前黃子國，孤城曲抱大江流。張帆振柁乘春去，建隼腰章亦壯遊。津漲桃花出，鱖鯨雨來楓樹。叫鉤，駟才人佐郡應多暇。盡日吟詩上竹樓。

送吳星若遊大梁

燕山芳艸送君行，貫酒旗亭識姓名。兔苑風流散枚馬，狗屠慷慨憶高荆。天青二室低封樹，河倒三門挾雨聲。宋殿隋堤俱寂寞，憑君此去弔侯生。

三月十二日得瞻 今上所賜宮詹臣沈荃 御書大字恭賦長句效柏梁體

康熙天子垂衣裳，曠曠白日照八方。條支黎軒西媯羌，弱水懸度紛梯航。桃拔犀牛狻猊黃，南蕩百粵通夜郎。戈船下瀨牂牁江，蛟蜃鯨鯢波不揚。鴻臚句傳同萬邦，皇帝謙讓躬未遑。內庭恭儉絕俳倡，詔書十道徵賢良。藪麟郊鳳天網張，未央殿帷集書囊。矜磬側理澄心堂，春容翰墨鍾與王。擊窠大書虬龍翔，腕縣心正體勢莊。屹如嶽峙鎮大荒，爛如雲漢昭回光。詔賜臣荃帝寵彰，黃綾玉軸陳中央。再拜仰視垂奎章，髯依光日月。傍艸莽臣蘅稱恐惶，拜手稽首效頌颺。皇帝萬年聖道昌。

送董舜民遊五臺山

我聞雲代間茲山，神仙窟碑版雖茫。珠圖經憶髣黃河，右縈繚恆嶽左。帶嶠壑疑六月，冰巖嵌千年。雪松柏森地底絕頂，但石骨五臺五芙蓉。詭狀鬪奇絕，東垂古雪峯。俛視見溟渤，半夜天雞鳴。日照蓬萊闕，西埵祕魔巖。天池神龍穴，危磴干雲霄。複嶂隱日月，南埵益嶽岑。林麓互蒼蔚，仙花畫繽紛。鐘聲暮超忽，北埵覆宿堆。古柏枝鬱屈，一氣俯大荒。化城時滅沒，中臺萬仞餘。削成表崒岬，下方走雷雨。陰崖纏虹霓，灣環太華池。竒篠珊瑚碧，君攜綠玉杖。茲遊恣探歷，四月別薊門。青青坡陀麥，五月渡滹沱。襍觸日赤遂，登清涼臺。結夏住絕壁，跣腳踏層冰。山風冷心魄，余本巖棲人。頗愛謝公屐，失足辭故山。畱滯京華陌，逸興坐飛翻。送君徒倚撫，煩君語山靈。後期儻來覲。

送梅耦長遊西山

西山青突兀，連蜷都城傍。馬首見空翠，欲往神飛揚。羨君遂幽討。

朋侶行相將攀躋詎一境勝事難具詳我聞西山寺香火多中璫
刑餘竊威福紺碧爭輝煌冢墓何嶙峋石獸夾道旁朽骨噉猶貉
象教託空王豈徒供歷覽良足驗興亡諸陵接天壽想像雲氣荒
紅牆自頓擗黃瓦頽清霜牛角礪斷碣松楓激笙簧潭柘古靈湫
其下有龍藏至今餘龍子蜿蜒出僧房君見當再拜神物非荒唐
或能致霖雨慰此蒼生望不似南山蛟拔木摧巒岡殘雪洞壑淨
飛花澗泉香媚娟春山秀黛碧澄湖光冥搜窮雕鐫覽迹餘慨慷
得句儻見貽珍比瓊琳耶

送毛月山遊黃州

愁眼看春去它鄉又送行黃雲薊門路落日大江聲野堠殘花晚
蒲帆乳燕輕經過憑弔處赤壁至今名

送暉晉明孝廉下第歸

我來君又歸相送一沾衣孤騎桑乾雨千邨棗葉肥不須嗟失路
且得慰親闈似爾才終達靈容訪釣磯

和葉九來憶鶴詩

玉山人偶出山惆悵仙禽隔緱嶺月明清喚夢中聞松花滿徑

松風冷

題畫

一峯兩峯落日千樹萬樹秋聲仄徑惟餘磨迹空林似有人行
都門旗亭讌集贈別豹人赤方蒼水諸子

薊門四月飛絮稀火齊纍纍櫻桃肥客中相見不得意數錢壓酒
思妖姬旗亭紅闌臨紫陌繡轂銀鞍爭絡繹挾瑟經過趙李徒鳴
騶雜遝金張客我曹蹙蹙騎驢來狂談各詡文章伯春葱碎雪紛
鸞刀玉壺送酒金盤炙嬌歌豔舞揚蜚纖羯鼓短簫亂箏拍酒酣
樂極客思哀燕王高臺安在哉離宮別館徧苜蓿鴛鴦同阜爭黃
埃聞道豐臺好芍藥前日繁花今日落君且莫碎射洪琴我亦休
擊燕市筑紅顏青春同可憐當歌肩負深盃綠明日東西南北人
馬蹏踏踏車鞦韆

和阮亭先生雨後西郭眺望見懷之作 次青字

西郭過微雨千峯洗更青
悵君成獨往相憶騎徐停
密葉涼衣袂

殘花明渚汀城中車馬客
日暮塵冥冥

雨後出西郭懷冰修子湘耦長 王士禛

小雨高梁外川原如乍經
浦煙天水碧山色佛頭青
心賞違朋

好孤懷託杳冥何時玉泉路
吟上望湖亭

平湖鮑聲來持汪鈍翁先生書
索題草庭

京師刺促廡下居鮑子晨訪過
我廬手持一幅草庭記袖出寸札

鈍翁書要我更吟草庭句我思
寒澀才麤疏聞子卜築當湖曲玻

瑤澄碧開雙矚小山玲瓏石嶂
崒雜樹桃梅桐栢欄松青藤紫互

婁絡虬龍甲蠶森騰翠讀書養
親百不惡盤有積栗曾有魚如此

菟裘自足羨安能蹙蹙京華驢
我有草堂國山北枯楂禿樹臨清

渠還君詩卷坐歎息青門三徑
今何如
二李行呈閣學李容齋先生

君不見茶陵李文正四齡召對坐
帝膝手斟沉澹握斗杓沙堤築

成頭正黑又不見北地李夢陽騰
掀蹀躞雄詞場金鳩擘天龍戲

海流傳光燄森開張二子距今百
餘禩蟠根遶遶傳仙李文采風

流繼者誰合肥先生今父子先生
二十登承明掣虬鬚鳳騎麒麟

三十致位已卿相說經螭陛何嶙
峋珊瑚筆裁綠綈色絲繡補

山龍紋才力扛鼎料誰敵文思湧
潮如有神跳盪已劇韓蘇壘鞭

扶不數齊梁塵驥子今年纔十六
一日玉堂聲遶遶鳳毛麟角自

崢嶸汗血龍文有踟躕同時安得
兩璧人帽側宮花映紅玉先生

愛士絕代希成蹊桃李陰菲菲譬
如扁耐畜藥籠芝砂洩勃敗鼓

皮又如般榘萃梓杞不棄輪困與
離奇江南賤士獨偃蹇霜花侵

髭布袍短泝泚空能說不龜侯鳴
未免爭蛩蟻屢干羊陟豈悠悠

願識荊州心纂纂長安五月薰風
涼海榴刺天梔子香此時休泚

一歸邸履箱塵尾爭輝光前擁生
徒後絲竹可許彭宣到後堂

康熙十八年詔舉博學鴻詞海內之士應詔集闕下者百餘人
上親試之得五十人悉命官翰林纂修明史蓋異數也與余雅故
者施愚山閩章汪鈍翁琬秦對巖松齡錢宮聲中諧曹峩嶠禾
喬石林萊李子德因篤陳其年維崧毛大可奇齡朱竹垞彝尊
汪舟次楫嚴蓀友繩孫徐勝力嘉炎潘次耕耒李渭清澄中方
渭仁象瑛周雅楫清原暨家戒三遠平
秦華因培樓涓流赴溟渤鳳翽儀高岡麟游以時出 聖朝棟梁
具峩峩舉與鬲更聞闔門典搜剔徧巖穴博學鴻詞士有詔徵詣
闕奏賦太和殿金石殷摩夏清越諧瓊琳鏡鏤詎蠨蝓三相驗討
論 天子親甲乙拔尤五十人一枚馬列維時月在臯既望越
二日喧喧下明詔並命登禁闈冢宰持故事 聖恩特超越鳴珮
翔鳳池排風羨毛質我方客京華枯兀類株檉庶下新僦居畏熱
脫中襪當食聞除書驚喜失喫嚼同時諸君子與我半膠漆故歡
諧縞紵提攜愧先達新交紉蘭茝推挽比蛩歷亦有吾宗賢飛轡

偶時詰羣公既彙征吾賤亦序豁此舉良曠典盛事久雍闕科名
束縛人如驥就銜鐵奇士苦攀拘平流得津筏嘉祐舉制科得士
惟軾轍三等占久虛何況二與一浩蕩蒙殊恩公等宜惕恍比聞
啟史局行紬金鎖縉茲事誠大難煌煌鉅著述餘子何足云曄壽
頗排訐龍門扶風後廬陵庶頡頏發凡及起例鄭重非瑣裔前明
三百年大事凡六七文皇靖難師忠臣慘刺劔遜國諸名賢姓氏
半磨滅興獻議大禮村戍全肉血三案益紛拏賢姦慎剖別嗚呼
鎮撫獄清流離羅尉闈寺內竈場盜賊外潰決民窮賦斂繁遂令
國步蹶思陵死社稷中外多仗節褒忠自 聖朝闡幽待特筆此
皆關治亂件繫宜縷悉微辭或隱顯義例嚴擷截我學愧雕蟲我
生類蠨蠖詎能生羽毛行當返蓬華東澗躬桔槔南岨茹薇蕨茅
簷日偃仰簡編事緡閱庶人豈敢議草野有公隲努力期諸公干
秋光史帙
陳其年贈余兩髯行戲為狂歌荅之時余將有梁齊之遊

我髯于思君髯戟君才八斗我一呖兩髯才調大殊科兩髯意氣
特膠漆燕京二月尾雪片飛鷺翎客中一相見握手眼為青君吟
兩髯行調我得歸且躬耕我吟與君異狂歌磊落君試聽我昔年
十五充賦鄉國賓三上不見收贈躋長跋中離尉羅鍛羽翮負
薪牧豕荒湖濱男兒墮地自卓犖便欲揮斥九州凌五嶽安能鬱
鬱菰蘆中稿項低頭把鉏鑿翩然賦遠遊被褐來京洛紫宮閣道
高峩峩九關虎豹千門鑰東華軒騎如遊龍獨向東華躡芒屨出
從嚴馬諸君遊醉狎金張五侯誰談諧嘯傲公卿閒冷飭殘盃亦
不惡桑乾九月木葉黃我思跨驢尋嵩陽太室少室相低昂三十
六峯雲蒼蒼緱山仙人行相逢吹笙騎鶴聊徜徉又欲迴鞭東到
海蓬萊三山至今在之采不其青峩峩安期海上遙相待逕須鞭
叱海若驅蛟蜃變化丹樓十二霏霞彩平生幾兩屐汗漫十載遊
然後歸去來散髮臥滄洲蒔藥釀酒養鳧鴈無功子光可以終優
游君罷吟聽我謳升沈有命我不愁公輩自畫鳳尾諾我歸即披

羊皮裘雄飛雌伏何足道兩髯要是爭千秋

兩髯行贈子湘

陳維崧

我髯冗似緣坡竹君髯捲若蝟毛磔兩髯意外一握手熟視無

端笑啞啞家鄉流浪不見面見面乃在長安陌感激聊為肝膽

言謹極互誦文章伯憶昔蘭陵數鄉詩士董文友賤子結交真

莫逆可憐為人好心事拉我談詩妙風格花天同領百罰杯月

地共枕千人石鷺管三更每換吹鷓絃半撚偏低擘一尺紅衫

不自惜直向柁中裏魚炙故將惡語惱蠻腰要使春頤暈微赤

邇來蹤迹頓錯落當日歡娛太狼籍晚歲交君才更健出手壓

倒羣兒百詞場虎跳或龍掀筆陣銀鉤兼鐵畫長安雪片大如

席我今誤作長安客底事青門淡蕩人也挽馬櫪隨老革君家

水上幾閒閣君家煙際一區宅畦蔬差足媚盤餐園果麤能餽

盤榻噫噓得歸且種東邨麥

戲題兩髯行後贈其年子湘王士禛

楚王宴章華乃以長鬣相彼鬣有何好霸國用自壯平生交兩
髯于思不相讓絕倫陳魁梧軼羣邵跌宕昨見兩髯行駭然忽
神王土龍能笑不吾髯幸無恙

已未七月五日初度遣懷二首

屈指忽成笑蹉跎四十五秋風易水北客夢大江南何日歸三徑
殘書老一龕浪遊有底急短髮漸參參

舊歲逢今日親朋笑語同東軒過疏雨屋角洗高桐泥客碧筒飲
開簾黃雀風茲辰坐愁寂覓句獨書空

月夜冰修耦長偕過阮亭先生寓齋同阮亭作三首

西山煙欲斂暝色靄城闕愛君高館秋疏梧得新月入門成一笑

脩然釋中鞅徒倚生夜涼坐聞鄰鐘發

星稀天宇青葉重露華白苕藻濛空除砌蟲俄喧寂談雜仙鬼

清話探史籍長安車馬地詎有此主客

旅人念歸趣憂心屢斷續坐久似吾廬清光漏疏竹單衿覺夜深

泠泠露氣肅幽尋未厭頻往來數能熟

月夜喜冰修子湘耦長科跣見過士禮

舉頭新月佳開軒滅明燭流螢稍開闔風露下疏竹素心二三

子比鄰往來熟漢陰無主賓何用加噴屋

袞袞九衢中未少噉名客老懶倦逢迎寧當較尋尺高齋時臥

病河漢忽已夕綠絳被階生幽人見行迹

聽君談劍術四座輒色變青天走風雨虛堂激雷電香丸合雄

雌太乙經百鍊勿快睚眦讐應侯古所賤冰修談劍術甚奇

月夜起坐懷顧赤方

梧葉響空階颯颯疑疏雨羈人起披衣斜月照軒戶秋風千里來

所思隔湘浦

阮亭以詩索耦長畫次韻

漁洋山人老好事新詩乞寫敬亭秋關情我亦江南客紅樹青山

一小樓

初秋索耦長晝

士禛

詩到無聲足臥遊
雨窗含墨對清秋
不知鄉思今多少
祇寫澄江與北樓

地震詩戲效昌黎體

歲在己未斗指申月之廿八朝日曠
京師地震駭厥聞初如地底
雷殒礮又如輾轉萬車輪自西北來
東南奔頃刻簸蕩搖乾坤雷
碾菘蠟屋瓦翻市聲呀咻揚囂塵
叫號觸突踏以顛車什馬蹶敲
輻輳拉擢大廈摧高垣礫塊揚箕
天晝昏構櫺棗棟楹椳杆顛倒
填塞衢巷堙百雉頽崩門關九廟
鴟吻墮蟠蜿餅脅折脰髀骨
麟死者纍纍三千人通州三河嗟
可憐十斃八九離遄迤腐屍敗
齒腥闐闐半籍以藁孰樁棺地拆
水湧黑且渾翁嫗失足埋尻臀
一月不止餘威殫都人怖駭遺臥
眠白板露宿帷幕藩訛火亟興
憂燎燔反灰伏煤晨不餐我時幸
免溝壑填我僕碎首面血殷徐
令巫咸返驚魂一夜數徒拊膺歎
康回憑怒古所傳不周山頽注

水齋女媧莫之斷鼈跟承以八柱維
陬安三千六百軸鉤連四遊
上下無崩騫胡爾顛踵生禍患恐
是柱折羣軸掀地祇失職愁煩
冤乘雲上謁欲有言聞者拒關電
目嗔搏人虎豹露齧齧趨起瑟
縮還伏跋嗟爾地祇徒沈瀾我詩
蹇駁頗不倫怪語自嬉聊復吞
愚山侍講分貽敬亭綠雪茶和阮亭
作
荆溪產芥茗梁溪出清泉兩美易
合并溪路相沿綠艸堂穀雨過
桐陰漾清圓槍旗初脫焙蟹眼活
火煎野夫倦著書石榻酣晝眠
睡足驚松濤湘簾颺微煙細啜來
清風兩腋輕欲旋無事偶浪出
一年客幽燕愴父酪奴賤朱門
潼乳羶疆飲如茹檠棘吻仍澀咽
窮秋三日雨檐溜鳴潏潏渴喉正
鼓龍夢想還家山詩翁走長鬢
綠雪餉不慳澄碧汎哥定若香襲
蘭荃頓令宣城價突過陽羨前
漁洋好事者題詩緘素箋昇兀得
妥帖奇句供流傳且啜且復哦
應接苦不閑顧我才藹劣險韻愁
雕鐫我自用法牽率成詩篇
將之登州畱別阮亭愚山兩先生
冰修其年耦長諸子

一年客京華結交多老輩傲屋短牆連論詩古人配歷下自雄長
泱泱表齊大阮亭宛陵正體裁驚喜漢儀在愚山卓犖元龍豪其
年清新都官派魏長士衡出菰蘆賦筆老未憊冰修數公狎齊盟
我邦陋曹鄴又如十萬師運營耀旌旆者皆吾敵堅壁幸不敗
長安豪俠窟歌舞日高會我曹文字飲好尚與時背過從忘主賓
談調寡拘閣露坐每宵分茗柯閒清話疏梧新月漏屋角秋河挂
得句忽狂呼快若爪爬疥茲樂固難常不謂遽行邁行行指海壖
黃腫古秦界我聞丹崖山俯瞰滄溟匯鳥嶼錯其中日月不在外
祖洲青蒼茫之采紅破碎半夜六赤龍騰擲洪濤內蜃氣吐宮闕
金銀幻詭怪嗜奇如嗜炙大嚼亦良快但惜素心違老淚雨如頰
臨發重徘徊離筵增噉噉竹帛與名山諸君幸自愛

送子湘之登州

故人去何亟老淚紛如霰黃菊酒盈尊分手罷芳宴昔別在蘭
陵此會在京縣平生憚貴遊涕笑耽窶賤共坐藤陰下袒跣把

書卷蹋月夜敲門貽詩朝滿扇掀髯意飛動隔巷數相見歎子
青雲士生涯守一研不種東陵瓜不求文舉薦縫掖多塵埃西
南旋轉戰側聞賢使君折柬招才彥郡閣臨蓬萊海日盪人面
仙都連十洲蜃市駮百變訪我舊題處墨瀋丹崖徧奮筆紀後
遊當使蛟龍纏施閏章

我聞大九州香海環其外裊海內絡之萬川勢交匯禹貢周職
方中央浮芥蒂鄒衍不可作疇與辨茫昧昔者始皇帝東巡極
海岱海神駕橋梁大魚射澎湃號為秦東門刻石表胸界三山
在水下其事頗奇怪邵生列仙儒遠遊信所屆遙飛阜鄉鳥往
撫天吳背龍躋陵丹崖九點烟凝黛蕝絕日主祠奠與之采對
日月影動搖島嶼光破碎朝潮激天輪夕汐裂地肺巨鯨若連
山奮鬣雲晝晦時見新羅船墨點空青內廣乘渺何所歸墟誰
負戴木張悉文雄髯才更十倍歸來述滄溟始信九州大王士禛
商風吹蘿裳朝服青兕裘有友聞雞號仗劍之東牟前行望海

水漉漉日夜浮中有蓬萊山南下接祖洲高邱試一登軼興波
濤流趙咨東海相慷慨吾舊遊計日受官俸幕下如清秋多君
策馬去珠篋不暗投第憐神芝生雜入菰草稠暇時得過採移
擢君房舟歸來獻天子厥頌雲油油遂將紀功德勒石靈海頭
司馬進掌故發冊臨之架橫筆埽石閒願盼凌九州毛奇齡
我生大言好誌怪恥逐眾口爭嘔啞壯遊恨不東到海蜃編傷
塞徒搔爬此州相傳大譎詭洪濤百斛蟠龍蝦澄鮮忽嵌小黑
豆此是真臘新羅槎日主祠堆紅破碎之采山蠹青麤筆混茫
一氣雷雨晦夜半已擲金蝦蟆我坐一官去不得頭童尾秃翅
鰭沙誰何男子極豪橫徑縛短袴挽馬過我聞祖州富仙藥芝
菌往往霑麈麈君行儻值海市出定現幢蓋交紛拏爲余一語
問徐福別來已久應還家五百童女果安在可還顏色嬌如花
詩成自覺棘口吻恐以妄誕遭喧呶登州太守譚舟石我好友
鰻魚對噉開官衙把詩狂叫定絕倒颯颯亂城樓鴉陳維崧

幽州淡白日易水多悲風吹簫屠狗竟安在蓬蒿欲沒燕昭宮
黃金漫低壯士色余歌汝和差能雄朝過孝伯家王阮亭暮醉

肩吾宅施愚山葡萄破綠月光白照見狂吟同岸幘羣雄相值

頗相惜接手輸心有虛擲詆訶季緒何足云嘲笑參軍還作劇

一日歡呼定幾回暑雨嚴辰都不隔我夢東吳未得還重愁送

遠影朱顏君今別我東牟去海風吹度之采山金銀樓閣出仙

島雲霞變滅須臾聞此去蓬萊幾千里對面天涯自茲始登高

明日苦難畱臨歧淚落金樽裏君昔愛我歌歌出聲還吞蒺藜

交路衢酒肉堆朱門蛾眉曼睩亦徒爾宿癩時復當至尊身世
浮雲那能料但恨分攜失同調好向官齋啖鰻魚余亦東歸且
垂釣梅庚
都城衰柳送行幘應笑歸程我尚淹雞肋豈容遊子戀豬肝空
挫昔人廉幺絃絕響悲同調殘局推枰好覆匱努力馳驅君自
愛憐余霜雪徧枯髯

零文秃筆一邱埋蚤悔雕蟲意轉乖茅屋天寒羞翠輿漢宮人
老賤瑤釵悲君壯盛長爲客似我飄零孰與儕此去儻能尋海
市魚龍鞭蝨可應諧

吳苑霜酣萬樹柑五湖秋盡水猶藍故鄉佳處皆江外詩集何
煩紀劔南節序明朝正重九客程遙數更千三也應自爲神芝
去丹訣攜來試共參

山川十二阻齊郊東盡蓬萊地勢設舊蹟時移憑弔古才人吏
隱好論交田橫島沒無龍戰羸政臺空有燕巢知爾燕閒多唱
和郵筒詩句待頻鈔

重九前一日將送青朋友兄之登州適得晦木寄詩輒和其韻
晦木題紙尾自詭非子瞻不能作非半山不能讀余才不及晦
木而青門當不遜半山讀能知爲戰然也試以呈舟石太守左
羽孝廉嘉淑又跋

陸嘉淑

白溝河懷古

中分遼宋指河壩劃斷燕雲朔漠邊棄地至今羞石晉許和當日
誤澶淵壕低野馬黃雲合天入盧龍紫塞連南北一家今已久三
關何處起寒煙

重過趙北口小憩

高柳湖堤岸重來眼倍明柴扉維舴艋水泊亂鷓鴣大有江南景
悠然濠濮情歇鞍敲枕久來往笑勞生

鷄鳴曲

寒鷄膈膊夜纔半逆旅挑燈起相喚槽頭羸馬嚙殘芻階下僕夫
嚴鞵絆出門十里天未明空陂月落人語聲東方睽睽星一箇前
行後行聞鐸鈴

蓬萊閣望海

我來一蹋蓬萊閣溟漲高寒島嶼秋元氣蒼茫日月浴青天出沒
蛟螭遊田橫五百餘荒砦徐市三千隔祖洲縹緲神山不可見天
風萬里聲颼颼

冬夜遣悶效黃山谷

孤城索寞歲崢嶸撥悶攤書坐短檠紙屋撼風聲四壁海濤喧枕
夜三更故山儘可足藜藿官舍近來飽蠓蝗石暈木癭真自悔絆
人何物是浮名

臘月廿四夜口號

臘月今朝二十四吳儂風俗憶江南掃罷屋塵祭罷竈長竿縛炬
照田蠶

已未登州除夜二首

去年除夜東阿縣今夜登州歲又除四十二年成底事二千里外
少來書錫櫟椒盤非故國紅梅翠竹憶吾廬漸星短髮不快意笠
澤春波有釣車

雪屋風鐙牟子國青鞵布襪又年新城空海氣腥蛟蜃歲晚官廚
足介鱗膾有棲鴉驚炬火更無瘦僕伴吟身遺歸守歲圍爐小
兒女料應絮語未歸人

雙白松為房慎庵侍御賦

雙松偃蓋接空祠黛碧尋常獨爾奇簡寂觀前殘雪後天台橋畔
月明時對舞玉虬寒日照分栖白鶴曉還疑蘭臺霜色原如許會
見參天梁棟宜

東臯山房試茶歌

新蕉展葉荷始葩東臯水木涵清華坵擇叢篁走鸞鳳蔽牛古樹
攢槎柯百頃風潭蹙霧縠一澗略竹橫枯楂東臯主人楊端雅好

事三人不速賓殊嘉曹莊二隱胡餅罌滿注惠山乳石銚試煎陽羨
茶棋盤紗帽皆絕品萑龍封裏來僧家颺颺蟹眼濤聲細彭烹豕

腹松煙斜宜興砂注跳珠沫定州磁甌飛雪花腋輕欲隨列子御
背癢不用麻姑爬團鳳小龍祇虛語日鑄雙井何足夸旋出餽飮

佐杯聾鹽鼓筍簾羅鮭鯪我雖不飲喜看客觥船錯落爭謹譁僻
徵新令浮一斗雕鏤險句矜八又須與林壑淨暝色城頭伊啞亂

棲鴉歸來清景疑夢寐作詩急追逸麈麕蒼蠅聲出蚯蚓竅詩成

街鼓聞三過

作客

作客動經歲還家纔半年故園花發候又上廣陵船楊柳津橋暗
鱗鱗曉市鮮客愁正無那陶寫只詩篇

雨泊露筋祠

召伯埭下雨如絲貞女祠邊繫纜時萋萋碧草歸人晚森森空湖
去鳥遲水面人家浮鴈鶩灣頭艇子立鷓鴣風扉破壁淒涼甚扶

屐還來問古碑

寒食宿遷道中雨

下相城邊路春陰困馬蹶直愁泥滑滑翻惜草萋萋雨挾河聲壯
天圍野望低故園淒絕處荒冢溼棠梨

鄒縣道中喜晴

已過一百五何曾十日晴今朝風日美客路眼真明侵徑野花麗
隔林鳥語清嶧山春望好空翠馬頭生

經下邳偶書即目

驅馬古下邳川原歷遊目屋角桃花明河上煙帆宿牧豕散荒塍
棲鷄上茆屋不見圯橋人悠悠淮水綠

任城太白酒樓歌

有序

太白樓卽濟寧東南城樓上有碑記云相傳賀知章令任城觴
白于此樓因以名誤也按史李白客任城與孔巢父韓準裴政
張叔明陶沔居徂徠山日沈飲號竹溪六逸樓當是其遺蹟知
章亦無令任城事詩以正之

十日九日春風顛十村九村桃花鮮客行雖苦差不惡日斜歇馬

任城邊任城高樓對芳樹相傳太白昔遊處當時六逸隱徂徠少

年作達酣馳暉往往登樓弄林醪當窗萬里天風迴嶧嶷劔作鷓

鷓杓南湖便釀葡萄醅偶然乘雲去謁帝遊蓬萊卻逢四明客呼

作謫仙才孔韓裴張各雲散此閒陳迹空蒿萊杜陵野老亦到此

南池森木荒清泚

城下卽古南池杜甫與許主簿遊處

我來弔古已千年殘碑謬誤

聊道爾樓中不見古時人樓下仍流古時水回首望泰山一氣青
黓黓金泥玉檢俱塵埃七十二君復誰在落日沈吟動客愁城樹
漠漠春煙浮行路誰知我心憂徘徊惻涕橫流君不見李白杜
甫雄壓百代終荒坵何況擾擾螻蟻與蚍蜉明朝匹馬更北去且
脫鶴裘付酒樓

送友之鹽亭令

黃綬初爲劍外行蠶叢萬里引雙旌雲開曲曲巴江字樹暗邨邨

杜宇聲擁縣山青馬首合杜詩馬首見鹽亭高山擁縣青行春麥秀雉媒驚陳公

遺蹟今存不石柱青苔弔古情

送友之莆田令二首

青袍汀草色烏石山名縣門前黎嶺稀秋鴈聞灘激紙船鉤輶干

嶂雨橋柚萬家煙自識訟庭暇清音山水絃

聞道閩中好之官亦勝遊雲開越玉石山擁謝公樓榕樹冬能碧

菊花寒始稠扁舟或乘興應爲荔支謀

哭施愚山先生十韻

作者今誰是先生尚典型詞源涿根柢才力赴滄溟一代高廚俊
千秋孰尹邢金門方朔米玄草子雲亭逝矣悲棲鵬潸然泣聚螢
風吹易水白雲斷敬亭青素幔行當返窮交涕獨零死慚磨鏡具
生愧扣鐘莛身後桓譚論心傷有道銘便應焚筆硯絃絕爲誰聽
送黃枚公進士南歸

他鄉送客難爲別況送君歸是故鄉木落蘆溝看去鴈月明瓜步
冷新霜不緣狗監稱詞賦遂有鴻冥興杳茫叢菊東籬秋正好因
君夢繞豆花莊

九日贈別家二峯

前年歷下題餈句今歲燕山對酒盃六度重陽頻旅食百年霜鬢
幾登臺他鄉骨肉轉難別客路堪鴻總易哀跋馬送君增悵望叢
叢野菊近人開

寄壽汪鈍翁先生三首

文章載道器詎曰小伎爲作者遞紛綸六經乃根荄根蠹華不實
枝葉徒葳蕤詰匠亦代出寥寥知者稀先生探道要起衰託修辭
貫穿經史奧矩矱先民遺高談慎許可得失了不疑毗陵震川後
代興諒在茲

代興屬清時藉君繼良史郎署三十年晚登金華陞日給上方札
月分太倉米石室紬藏書是非浩煙海隻字嚴褒譏議論羞駸
大匠斤成風他人或血指龍性詎易馴掉頭乃脫屣一夕秋風生
冥鴻已千里

鴻鸞全高尚結構堯峯巔鑿牖面蒼翠開簾映紅泉雪水流寒澗
梅花澹空山山中有喬松偃蓋何亭亭其上縈兔絲其下產茯苓
土肪闕玉腴怪若鳥獸形青真儻可斷持此奉延齡

癸亥都門除夜

前年除夜楊劉店荒鷄喔咿短檠燄舊年除夜還家園挽鬢繞膝
歡團圓今年重作長安客獸炭紅爐又除夕長安同舍多少年捲

波拍浮呼五白願我老懶百不作撚鬢微吟坐倚壁過年卽辦五
嶽裝半生會著幾兩屐來歲漸少去歲多百年疆半客中過
祭酒王阮亭先生招金穀似吳天章陶紫筍張杞園同集用夜闌

更秉燭韻分得闌字

玉河柳初暗金隄花欲繁春色來西山千里青巘吮客意方鬱陶
坐令愁疾攢幸登君子堂賞心恆清歡盃淨玉蛆白筋香梅蘂酸
文酒競慙憑畢景興未闌九衢冠蓋地茲會良獨難泥飲三百巡
剪燭弄觚翰欣逢郢斤斲寧慚蠅翼漫
丁鴈水觀察捧表入賀卽贈別還虔南
仗簇臚句引漢官朝回笳鼓發長安玉
十八灘過雨沙洲魚子白到時官舍佛桑丹鬱孤臺上江光好詞
客何人共倚闌

題龔節孫種橘圖

有序

東坡云吾性好種植能手自接果木尤好栽橘陽羨在洞庭上

柑橘栽至易得欲買一小園種三百本屈原作橘頌吾園若成
 當作亭以楚頌名之然東坡園與亭竟未就也龔子節孫移居
 陽羨仿此意繪圖乞名人詩詞盈帙矣又屬余題請至六七不
 厭余感其意為賦長句書冊子尾還之
 種橘圖詩緘兩軸展讀璀璨堆幾珠我病廢吟動經月彊拈枯筆
 思髯蘇此翁竄謫走萬里惠廉儉耳身羈孤薰鼠燒蝠食諸芋十
 日五日慳花豬用東坡詩語投老買田在陽羨便擬種橘三百株沈吟
 茲願竟未果楚頌荒亭今有無龔生慕之雅好事種橘未成先作
 圖繭素一尺開生面皎皎玉立雙清臚翠羽金丸紛點綴鬚髯阿
 段手把鋤君言此景殊不惡蓋頭茹把客雙跌呼嗟百年鳥過目
 芻狗擾擾爭蘧廬畫圖似真真幻耳顛倒蕉鹿供揶揄我家亦在
 洞庭上玻瓈萬頃青銅鋪兩山十月霜落後火齊亂迸綠雲扶林
 閒飽噉三百顆酸寒不羨樵梨櫨湖山如此長作客髯蘇掀髯笑
 我愚卷圖還君清興發明年歸去不待秋風鱸

張魯菴水部招飲一畝居羣賢畢集斐然有作四首

我病索居久招尋有數君名流煩折柬水部況能文散帙烏皮几
 臨池白練翬淹留歡竟日屋角霽餘曛
 坐愛林泉勝為園一畝餘磴危仍綴菊澗仄亦遊魚老樹侵霜禿
 寒藤挂石疏到來幽興極誰更憶吾廬
 此會帝京少故人蒼鬢多醉醒渾感慨出處各蹉跎味憶江鱸柱
 盃行鸚鵡螺酒酣誰斫地吾亦欲悲歌
 華燈高樹亂石氣晚來青正喜看人飲誰言愛獨醒余肺病止酒統如
 急街鼓柵際睽寒星明日還來過新詩許更聽
 京邸招集諸子送家樾公歸武林用東坡昨夜風月清夢到西湖
 上為韻得十絕句

虎阜花月天鴛湖文酒約屈指廿年前風流已成昨
 盛事帝城偏名流鄴中亞金缸搖玉波樺燭銷永夜
 凍螿滄州酒清宵碣石鴻怪來霜氣薄春入舞羣風

座客醉復醒絲竹倦還歇人影散空除一片西山月
 寒深城漏斷霜白月華清聽盡何歡曲尊前過雁聲
 久聚自成歡愴離翻似夢惆悵阿咸歸慙此相送
 冰稜滑馬蹶雪花壓檐帽客程三千三君行幾時到
 我已越鄉久思歸路欲迷憑君將旅夢一夜五湖西
 來因趨鯉對去惜唱驪駒今夜蘆溝月相思滿聖湖
 君家輞川園正在西湖上試訪孤山梅歸時花已放
 題豫章東湖圖二首
 看畫識東湖記得曾遊處綠樹暗紅橋幽尋從此去
 煙外轟紅亭煙中飛屬玉不見灌園翁菜甲秋風綠
 送孫編修使安南
 春明柳色送驪駒獵獵朱旂曉渡瀘百粵已看來翡翠九真應自
 貢珊瑚荒城夜暗桃榔雨古埃春深格磔呼四海車書今日事歸
 來王會有新圖
亭為蘇雲卿遺蹟

詹事高澹人先生以蔬香圖卷子屬題卷中尚闕六言為補此體

四首

菜甲融泥猶溼葵根滴露初晞先生攜鋤蚤出野翠欲上人衣
 白白莖芽春蚤青青瓠葉秋殘提筐自呼阿段菜把不待園官
 使君不妨鉏菜宰相亦住山中閑卻和羹好手品題春韭冬菘
 新築鴛鴦湖西舊業鳳凰山塢結鄰可許閑人儂是青門老圃
 重輓愚山先生八絕句
以下並錄
 楚些高吟清淚瀧故人零落意難降蕭條何限山陽恨秋雨秋風
 滿客窗

八子驂驪重國門暮年詞賦益騰鶩建安風調開元格身後何人
得細論

傳經齊魯已陳蹤稷下誰凭講席重山色自憐華不注清秋依舊
削芙蓉

臨江江岸倚愚樓遺愛羊公片石留祇今閣阜山頭月還照江聲

鳴咽流愚樓公觀蔡湖西時建

憶從京邸接簪裾茗碗詩筒下直餘腹痛玉河橋畔路不教三步

已回車

前年擁傳出天中嵩少題名處處逢三十六峯青不斷不知笙鶴

定何峯

墊角林宗見典型顧廚屈指已晨星天涯大有窮交淚灑向秋風

溼敬亭

丹旄飄飄下潞河白冠易水自寒波江南薊北三千里落木嘯螢

一路多

後苦熱行客京師作

赤帝起鞭六赤龍炎官火織張當空原燎噴薄何彤彤區宇鬱煙

如甌中長安毒淫增煩忡歎陽翁熱蒸簾櫳層冰山堆不快意平

頭大扇嫌纖風長安客舍百不作箕踞科頭竟日坐水晶盤浸葡

萄空碼礪盃沈冰李大拍浮有顧尚書期襪襪只愁熱客過忽憶

前年當六月匡山絕頂涼颿發谷底長松激翠濤半天瀑布吹飛
雪夢飛不到五老峯玉峽簾泉勞結情我家舊住東湖邊莫釐縹
緲青刺天玻瓈千頃風清漣吳娃蕩槳嬌采蓮荷花菱葉鮮可憐
胡為執熱煩憂煎會須散髮五湖去扁舟把釣弄潺湲

慈仁寺古松歌

前年屢憩慈仁寺古松蒼翠流雲氣高枝偃蓋撐晴空低枝攬拏
梢厚地青天忽詫蛟龍蟠赤日只疑風雨至今年重到慈仁來蒼
皮慘裂枯幹推一株已遭斤斧伐一株僅存神鬱屈倔彊尚與夔
龍爭愛惜或愁雷雨拔其餘四株稍蔥蒨菁菁翻是尋常質我聞
此松植自金元年胡為摧折荒寒煙摩挲三歎淚如縷嗟爾托根
原失所慈仁寺中大作集寺門日日飛塵土珠玉錦繡走黃埃日
炙風霾氣悽苦孤根不免蟲蟻穴勁骨寧能阻僧伍君不見廬山
簡寂觀高松千尺飄霜霰白鶴兩兩巢其巔仙人羽客時相見又
不見天台橋畔松作鱗之而蒼虬龍銀河倒挂玉淙淙樵斤獵火

何由逢吁嗟乎人生位置有如此上馬出門暮山紫
贈張真人

留侯辟穀從赤松果老中條騎茅龍真人丹成騰霄景揖金母拜
東王公龍虎山深闕紫府秀拔萬朵青芙蓉瓊芝瑤草畫蒼葦霞
旂絳節行相逢羨君不媿真人喬標雲玉樹煙霞氣丹篆錯落蛟
螭蟠青地森芒魍魎避看君豈是山澤癯富貴神僊兩兼致竭來
謁帝明光殿有詔黃門數引見班行禮數絕羣寮御廚八珍大官
讌方朔射覆天顏開舍人投壺玉女粲赤章夜半叩天關膚寸崇
朝灑芳甸豐隆屏翳紛後先巽酒呪龍何足羨屈指還山暑已徂
薊門風葉鴻雁初何須更權秋江艦鶴背乘風恣所如

李鄴園先生內召拜大司馬二首

東南幕府賜專征郡縣潢池有弄兵鈴閣何妨揮羽扇京觀蚤已
築蛟鯨安危實繫中朝望鎖鑰論萬里城回首兩江爭戰壘十
年銷甲盡春耕


牙旗高擁越溪還詔領中樞曉入班曳履上公趨魏闕勒銘片石
壓胥山兩朝身許麒麟畫萬里風清虎豹閑武帳從容還畫接雲

霄玉几近龍顏

西安將軍凱旋獻紅綠鸚鵡各一擬應制廿四韻

七萃囊弓日三驅振旅時碧鷄通使節朱鷺奏鏡吹琛賚陳王會
共球集赤暉好音懷絕域珍羽表殊姿迢遞來京洛艱難別隴坻
翠衿原自異賴翼更標奇對舞仙人掌分棲太液池朱霞爛披錦
碧色弄清漪苞采鸞皇匹縹精孔翠疑金眸雙炯爍紺趾各森纒
乍入青叢暗驚翻紅藥運風霜辭繡領雨露託皇慈竝立雕籠
窄交飛殿宜苑雲晴冉冉禁柳綠垂垂啄藥褰珠網銜花上玳
楣含情宮女避學語侍臣知調舌嬌黃鳥清歌教雪兒呼名巧自
應照鏡漫愁思拊翼憐明慧依人訴別離聖情寧翫物符瑞畢
臻茲越雉重周譯變龍陋漢祠旅葵行自貢巢鳳欲來儀靈囿叻
叻鹿齋房鬱鬱芝微禽更何幸先寄上林枝

青門旅橐卷一



青門旅橐卷二



武進邵長蘅子湘

古近體詩二

送少詹王阮亭先生祭告南海

九州九點煙四海環其外我聞昌黎語南海神最貴列號祝融尊
 秩禮朱鳥配轟磕激地輪頽濛陷離位日月所吐吞光景幻百怪
 巨魚動吞舟八丸不芥憊蹴踏連山移喙噉洪波沸明珠閒珊瑚
 瓊瑤涵鉅細其陽極朱方汗漫疑無地島嶼錯星羅雜國十數計
 番舶乘風潮千里歛而至靈怪孰縷詳記憶聊梗概功大報亦崇
 望秩自三代康熙甲子冬省方勤翠蓋岱宗封金泥川嶽走犧幣
 峩峩瑯琊公奉詔南海祭冊祝領祠官導從假羽衛曲柄繖子張
 黃旂交龍會金冊何煌煌署曰今皇帝錦韉銀鑿蹏飛雪戒驂
 馴到及春之中氤氳遲日麗遙知牲璧虔髣髴丹旂曳赤螭夾頰
 蚪蜿蟻獻靈異畢事縱冥揆覽古探幽闕有無仙人羊感慨崖山
 淚殷紅佛桑花甘酸炎州荔前年公奉使劔閣攬征轡夔峽愁鐫

劉巴江急泝泝兩卷蜀道吟韓蘇互軒輕茲行復奇絕山川真有
待秋風鴻雁初還朝仁旌旆快讀嶺南詩碧海鯨魚大

將歸草堂東故鄉親友

六州鐵鑄成一錯三年悔蹋長安脚春風昨夜夢還家草堂辛夷

已著花大兒學書塗蚓鴉小兒學語聲嘔啞嬌女狼藉施鉛華天

吳舊繡整不斜覺來起坐久按莎鄰雞喔喔街鼓撾潞河開凍綠

波瀾布帆徑下三千里題詩先遣兒輩知阿翁到家三月尾江村

樂事值夏初麥隴處處黃雲鋪櫻桃未過來鱒魚洞庭楊梅天下

無巷南巷北雞豚社處處招攜及老夫

南歸雜詩十首

失意倦為客因人賦口歸河身開東閣石首到家肥一棹春三月

東風雁北飛五噫揮手去寓闕霽斜暉

十驛衛河路塵沙晝欲冥今朝柁樓底恰送曉山青隄柳遲牽纜
畦花入野亭扣舷無限興歌罷若為聽

魯連倜儻士折矢下聊城孤棹經過地千年懷古情春風亂花絮

崩岸嚙河聲寂寞空遺迹荒臺畱姓名

驟雨衝波立官船上船遲溼帆敲覺重雲岫復還疑滾滾浪花去

冥冥岸柳垂清宵不成寐蕭颯野風悲

一水分南北長年報穩流湖寬吞汶濟地古接須句菱岸牽笮簪

沙灣沒鷺鷥鄉心沿下水連夜繞揚州

任城吾屢過春晚又停艫漕急喧津鼓莎晴掠燕雛詩名畱李杜

山色秀龜冕風景都如昨勞勞愧老夫

入舟春已夏勝槩憶鄉園芥茗山僧寄鱒魚江市喧青溪五柳下

白板一柴門屈指到家日新篁會上翻

鍾吾臨決口波瀾野蕭蕭黃水淮沂汨青天螭蜃驕閭閻頻涕淚

壁馬且逍遙河干廟食者疏鑿想前朝思平江伯陳瑄尚書宋禮諸公也

細雨江南路篷窗四月寒雲開葛嶧小天入射陽寬身世隨鷗鳥
滄浪老鷓冠淮流日夜急何處有垂竿

卅年揚子渡江水照星星來往漸津吏蹉跎惜壯齡潮頭京口白
白脚海門青山靈笑鹵莽未暇漱中冷

舟中讀昌黎詩戲作

昌黎年纔四十五齒落牙豁如牛用昌黎詩語我幸明年已半百盤

齧堅白排利錐十年長作燕齊客大肉硬餅刀截泥況今扁舟已

歸去故園樂事誰能裁會刺三升野雞芡卽噉百顆酸楊梅秋場

黃雞釀新粟香粳堅滑休輒炊七尺得閑百不惡飽飯酣睡吟新

詩

喜歸草堂卽事四首

客路三千外真成此日歸草堂開竹徑榉子款荆扉樹暗黃梅雨

溪涼白裕衣樵青殊解事已掃釣魚磯

一屋笑聲滿團圓慰眼前兒頑作虎跳女大看蠶眠鄰舍攜骰酒

親朋枉素賤倦還吾意愜卽事總欣然

舊諳農事慣歸及試新犁雨滑騎秧馬村深喚竹雞林泉吾健在

藥餌未須攜已遂鹿門計丞黎仗老妻

幽事關心最東軒灑掃無東軒余讀書處臨池洗鵝鵲散帙網韻菴蕉葉

展新綠藤花巾故株異鄉那有此高枕且于于

之武林舟中作

偶發湖山興翻爲觸熱行虎邱吳女榜鴛鴦越溪程纜解月初上

曉涼風欲生青鞵吾已辦先聽冷泉聲

不到

不到西冷久幽尋興劇增孤山埋處士石屋定高僧秋色高三竺

冬青拜六陵烏藤兼白舫處處記吾曾

四可樓夜坐

過雨新月佳湖山澹空翠明鏡涵蛾眉一一相嫵媚閑夜凭高樓

開襟延爽氣疏竹四面風荷香偶然至何處遲鐘聲南屏隔煙際

靈隱記遊六首

靈隱寺

紺宇倚青壁攀躋出林杪峰頂海色明松罅湖光小理公經行處
香臺聚猿鳥月上蓮花峰鐘聲翠微宵

飛來峰

千尺碧芙蓉突兀湧平地鵬味怒欲驚
石瘦林逾翠上纏古時藤下委千年蛻

冷泉亭

到此自成趣泠泠瑩心神泉聲冷枕席雲氣生衣巾隔澗竦翠壁
櫛桂榮冬春白蘇去已久浩然懷古人

射旭洞

石迸一線天髓凝干玉乳雲竇書常滄龍鼻晴亦雨倒垂青齒首
黃瓣粲可數鬼斧鑿玲瓏仙靈茲棟宇

呼猿洞

高僧昔呼猿猿嘯應層嶺蘿屋激飛泉花龕隱清磬猿去今千年
月明山澗冷洞口梅花開寂寂橫孤影

三生石

探奇不厭深仄徑絕行屐澗水香落梅叢篁媚幽石澤公竟有無
磨剔辨薜壁落日不逢人山空有麝迹

山行即景

微雨湖上來東風忽吹去望見南高峰溼雲巾冒絮拄杖款山扉
偶然遂幽趣牆頭峰色青籬落清泉注古梅四五株欹斜互偃仆

枯蚪駭蒼蘚香雪沾衣袂叶好事得山翁甌香分日鑄小住亦復

佳蕭疏澹塵慮

拜岳鄂王墓下二首

岳鄂墳何處棲霞落照中黃龍竟遺恨石馬尚嘶風詔獄成三字
羈魂泣兩宮賀蘭誰踏破灑淚滿江紅車作滿江紅詞有駕長

馬角憐淵聖龜茲足紹興君王無遠略大將亦何能入夜靈旗閃

屯雲古木層年年墳畔水嗚咽繞西陵

家二峰招丁藥園毛穉黃諸君看牡丹分賦四首

在下天竺後巖壑幽深怪石林立石間字為蒼蘚剝盡相傳是澤公李源坐語處也

在飛來峰南麓射旭洞奇勝亦名青林巖

在蓮華峰後峭壁清泉疏梅石屋令人冷然有世外味

一捻沈香亭北百叢移春檻前何似阿咸花底嬌歌急管繁絃

鄴下才名丁虞河閒風雅毛襄清平試翻新調賦手何人擅場

忽憶草堂穀雨頰盤裏露籠霞一樣故園花發年年惆悵天涯

葉葉枝枝曉豔風風雨雨春殘明日預愁花謝夜深把火還看山

詩夜暗衰紅把火看

寄題陳椒峰園雜用少陵遊何將軍山林韻十首

舊識名園勝枯槎臥短橋高松原聳壑獨鶴故昂霄正有幽尋興

無煩折柬招誰言居近市已覺勝情遙

亭軒自虛白筠石總幽清一徑香留蝶雙柑午聽鶯菰炊兼竹菌

匙滑想蓴羹飽飯支筇出林泉次第行

鶯粟分畦種山鵲晚著花樹深飛翠羽滕古蛻修蛇詩律老逾細

登臨興未賒何人解載酒時過子雲家

春園一夜雨曉徑溼燕支峭倩竹添翠潏浚溜入池蘋開魚不覺

花落鳥先知辛夷兼芍藥豔葉漸紛披

夏木交柯暗風荷一頃香鉤簾凍雨過岸幘酒卮涼跂腳羲皇近

探書委宛藏夕陽歸翼亂城郭晚蒼蒼

潭影開曉鏡秋檐臥白雲先生獨隱几客至偶論文墨帖鶯羣換

爐煙鵲尾分小山叢桂好金粟綴紛紛

寒日轉成趣園扉局不開松徑落殘雪石橋橫古梅海鶴偶一唳

飢禽時下來高人方宴坐斜景覆蒼苔

憶踏匡廬頂香爐倚瀑泉晴嵐飛急雨暑月冷重棉便思投老計

未辦買山錢羨爾幽溪絕淪漣勝輞川

十年高臥客舊直鳳凰池已是驚僧繳憑誰著接籬風流餘老輩

項領任羣兒自覺閑居勝詩筒鎮日隨

主人湖海氣才力敵陰何老覺文章健詩成感慨多壯心頻攬鏡

醉眼且高歌我亦求羊侶巾車不厭過

戲題青門介壽圖歌
男兒行年五十不快意富貴神仙兩茫昧塊磊突起方寸閒崢峩

恆衡高華岱偶然遺畫介壽圖畫師渲染聊遊戲華堂景物秋新
鮮金粟半吐芙蓉妍蒼鹿銜芝縞鶴舞雕欄碧檻圍綺筵堂中貌
出髯翁坐錦織朝衣鷺鷥補起花金頂銜水晶雜佩刀觿綴璜珎
青門先生豈賤貧儼然大品稱官人德曜相莊亦垂白鳳翹繡帔
穩稱身大兒儒衫趨僂僕小兒肩隨衣履新金卮進酒金盤炙食
單竟須羅八珍翠鬟兩兩顏如花淺碧輕紅籠臂紗朱唇含聲嬌
未吐笙簫板箏琵琶華堂頓覺春風起珠簾窳地毳毼紫殷紅
珊瑚四尺強紫絲步障三十里人言髯翁老作顛腐儒那得真致
此君不見咸陽大賈邯鄲姝坐身錢刀意氣殊生男不遣讀詩書
朝持牙籌暮帶印千騎往往專城居又不見黃口略識之與無撥
取高第雄里閭輿馬赫奕耀艾衢安用撐腸拄腹五千卷白首丹
鉛作蠹魚髯翁掀髯笑不止井蠅醯雞何足齒姓名獐狝噉垂盡
奄奄蝮志生猶死畫圖丹青良可誇富貴神仙只如此噫吁噫駟
馬高蓋愁嶽崑祖洲神芝不可尋屋梁仰面聊復爾後世子雲知

我心

將遊粵東畱別西泠毛樾黃果慶伯緒子

昨夜夢羅浮蓮峰三十二海水搖空青飛泉溼巖翠仙姝顧我畱
瓊液飲微醉翠羽紛啾啾參橫林月墜覺來乃茫然身滯西湖邊
西湖二三月十里桃花妍鴨頭染新碧螺髻青孱顏忽復乘逸興
去上桐江船桐江到瀟水沿洄四千里花落瘴煙中鵲唳蠻笳裏
君臥孤山雲我弄羅浮月揮手長相思天南瑤草歇

桐廬道中

桐廬一何佳江水清且泚遊儵若乘空鱗鬣粲可見倒浮蔚藍天
沙明雲錦亂山鵲映層巖高下殷紅爛微風四山來飛花目爲眴
桐君不可尋采藥蹤汗漫日暮聞清猿江迴碧山轉

富春渚

千峰束一江湍激江逾駛兩岸翠若奔帆漾翠微裏凌晨過釣臺
風便不得艤仰望入青冥巉巖俯江汜石壁搖煙蘿巖花雜紅紫

安得千尺竿先生釣名耳

曉過釣臺不得上

七里空青十幅煙樵篷已過釣臺前會攜陽羨棋盤片來品桐江

十九泉

衢州道中

歸雁碧天盡輕帆太末城有邨皆橋樹無碓不灘聲山入閩天峻

江趨淞水清喜看戎馬定墟落試春耕

常山曉發

夜雨洗青嶂巾車映曉暎松杉滴疏響鷺鴨散空邨嵐翠撲衣溼

泉聲爭澗喧欲尋丞相塚牧犢上荒原相傳山有趙丞相墓

餘干官舍題壁

琵琶洲樹綠含煙羊角峰青几案邊一夜桃花春雨漲漁舟直到

縣門前

登餘干冠山三首

點點青山白鷺疏疏蟹椴漁莊干越亭前淥漲琵琶洲上斜陽

桑苧千年茶竈考亭一窪墨池俯仰都成陳迹山僧自汲軍持陸

茶竈在古思禪寺墨池在山頂相傳考亭註離騷處

廢堞已無遺蹟人家獨對寒蕪膾得長卿詩句白雲秋草唬烏

舟泊瑞洪坐洪福寺竟日

維艇尋山寺老僧解送迎品茶誇竹庵餘干產茶以竹塢為最說餅釘芹羹

樟樹一軒碧桃笙八尺清欣然成小住新浴試衫輕

樟樹鎮晚泊鎮為王文成誓師地

閭阜峰高翠靄橫孤篷水驛晚煙晴天垂野岸星辰大柝亂荒原

埃火明正憶中丞開幕府似聞枹鼓咽江聲虎圈豹房諸將健論

功何意出儒生

峽江縣阻風

百丈牽猶溼長年困石尤峰巒銜兩岸蒼翠上孤舟江帶銅鑼闊

雲封玉笥幽周郎有遺壘何處問巴邱

過螺子山望文丞相祠

丞相空祠螺石邊孤舟弔古一潸然崖山血盡憐精衛柴市魂歸

泣杜鵑亂後松杉無宰木草荒鼠鼠臥寒煙黃冠故里成遺恨暮

雨垂江風滿天

泊泰和追悼蕭孟昉四首

春浮主人蕭穎士曾記相逢滕閣東畫舫清歌銀母扇行廚斫鱸

水晶蔥春浮蕭氏園名水

當時賓客盛名園任昉衣冠文舉尊頭白故人重問訊玳梁燕去

草侵門

亂後刊章告密頻咎繇欲祭語酸辛青山處處堪埋骨顛顛都船

老此人孟昉以誣坐繫出獄甫三日而卒百家燈火傍江郵檣影灘聲月一痕今夜西昌城下客不須聞笛

已銷魂

上十八灘二首

怪石森棊布孤舟鬪嶮巖盤渦浮象馬急溜臥熊羆太古誰鐫鑿

鴻濛亦好奇千篙爭一罅邪許力為疲

匡風驚險絕天柱亦雄哉石齒晴飄雪灘心地殷雷虎牙縈縷縷

鹿角突奇危試問三巴估何如滸瀕堆

又十八灘口號三首

萬安縣南雪作堆灘聲百里殷奔雷觸熱炎州君莫訝扁舟自愛

荔支來

黃公灘上響驚濤旋殼崩雲五月寒兩岸青峰青不斷輕帆安穩

第三灘黃公亦名惶恐第

大舟牽篋避石角小舟刺篙石罅中茶灘犖确鼈灘壯贛江也要

鐵梢公紙船鐵梢公閩人語

樟樹村村山鷓斑溪流處處碧灣濶船窗竟日推篷坐看盡西江

雨後山

讀詩加義卷二
九

十年蹤迹悵離羣
宿草青山黯暮雲
若憶毘陵秋雨夜
竹樓燈火

對論文

每話金精意惘然
相思欲上剡溪船
我來試問金精處
十二峰青

響杜鵑金精山叔子故居

想像荒榛掩墓門
名山不朽即兒孫
水西破驛扁舟客
暮雨青楓

嘯嶺猿

盛誠齋儀部權關韻江賦贈

十年華省客使節
大江西郭抱雙流
合山圍八境低麇
籬編茱麗

放翁詩疏疏鹿眼籬估舶上鯨鯢
古蹟虔南勝新詩處處題

五日南安舟中
客路愁逢節茲晨
倍黯然枕柳橫浦驛
風雨上灘船市小蒲觴薄

鄉遙午夢牽吳閭
城下水簫鼓正喧闐

過大庾嶺詠古兼述旅懷五百字

函谷封泥丸劔門倚硯天
險自古今梅關勢雄埒
螳徑縈九曲

危磴盤百折磨天鑿
垠堠入雲吃雙闕
仰視僅一罅
青天直如髮

緬思周秦前橫嶺界百粵
椎髻雜黎猺大煙隔楚越
旣階啟任囂

尉佗乃僭竊荒哉黃屋娛
么膺豈雄傑樓船楊僕軍
銅柱馬援烈

至今千餘年世亂紛攘奪
唐宋置流人此邦多遷謫
叶偉彼澤潞

師壯茲澗淵伐功大謫易生瘴
鄉竟埋骨衛公與萊公異代同一

轍柳州嗜食藜藿黎喜見蠍
志完吾鄉彥抗疏逆鱗批音同子瞻

枕椰菴僊人爲築室樓傳鐵
漢名氣壯騎箕訣記一恐漏十更僕

難縷述高名字宙間一垂史
筆往來皆此地遺迹尚髣髴巨

或免爰忠良每離畢千古貉
一邱臨風氣爲咽過嶺地漸平百

喜疏豁夾道多蒼松蜿蜒蟠
蚪質人代閱宋元柯榦飽霜雪翠羽

落高枝紅梅得古驛維時仲
夏初薰風未炎熱陂田稻花香溪路

榕陰密蠻花爛熳紅蠻女跣
足白叶清池見游鱗邨墟亂鳧鴨叶

活活澗泉鳴青青蕉林蔚殊
方欣乍到即事亦可悅大海在其南

百瑤所自出珊瑚開明珠貝璣壓琥珀叶犀象栴沈檀乘潮集番
舶叶征斂析秋毫吝密澤憂竭詎知叶聖主意未嘗貴遠物郡縣
戒繭絲閭閻自充溢大府實高官牟利到鹽鐵試酌隱之泉誰淬
李勉節冶鑄與椎埋姦民多窟穴此又關隱憂欲吐更捫舌薄暮
投逆旅休駕脫巾襪濁醪沾滿壺盤餐稍羅列主人意不薄庶幾
慰飢渴露氣生夜涼纖纖見新月飄飄愧老夫旅懷坐鬱邑逾嶺
復入舟整帆遲明發

入峽

千峰兩岸插天青一縷滄江曲曲縈枕簟怪來煙翠染荆關畫裏
放舟行

葉公二首為某公作

葉公名好龍夢想冀一遇屋壁牆溷閭畫龍以百數一朝真龍下
驚汗走且什虛名易摧敗掩口笑童豎真龍儻不來公名竟千古
龍行固天矯見爪尾不露詎能從擾馴俛逐鱣鯨步爾來一何愚

悔為葉公誤溟解雲濤寬掉頭蜿蜒去

戲和子湘葉公之作

兄延齡

葉公好畫龍頗亦得龍趣鱗爪作之而屋壁滄雲霧潛見與躍
飛一一理可悟姬公大聖人取象非無故真龍爾胡來似為虛
聲誤吾聞龍所蟠千丈靈湫涸出必從以雲風雷激其怒葉公
亦大黠真龍良可怖予視猶蝮蛇蝮蛇奚足慕

端州謠

千年老狐戴髑髏蒼狗白衣不相識狺狺跳跟能人言山雞離襪
銜羽翼蝮蛇晝遊山霧昏訓狐夜嘯庭樹黑椎埋惡少誇堅肥腐
儒低顏坐偈仄泥滑滑行不得南禽啁啾客淚零杜鵑意良厚不
如歸去苦叮嚀

發端州書感

垂老憐交態江山還自妍半篙矜峽漲五筍蠶人船灘水潮通海
星巖翠插天端溪片石好吾與爾周旋

海珠寺

珠石江心立榕陰覆一亭城浮波浪動島入海天青洋舶龍幡颭
僧堂盤氣腥乘槎從此去星斗近南冥

南食行

嶺南食物可怪吁爾雅瑣細闕箋疏昌黎作詩亦絳漏我來目擊
非誕虛覺音團團日生背雌常負雄行躍躍禾蟲黏涎縈綫縷
狹長多足非卽且蒲魚圓徑大車輪腹下開口眼睜吁泥釘黑色
不盈寸蠕蠢頗類拖尾蛆塘蟻多尾俗一頭數尾鸚哥綠鈎珠綠色
蛇頭亦魚名花紋錦纈如麩毫八脚驅圓卵章舉一名帶帶魚海婦
人長五寸許宛然婦女同形模有蛇四足似蜥蜴赤文綠質窟淖
淤蠟殼如山作牆壁蝦蟆蚶蠓名紛挐其餘怪狀尚十數一一鼎
味充齋菹雖和酸鹹芼薑桂象箸欲下仍躊躇實憂腥惡損腸胃
僧廚寄食長茹蔬荔子自是神仙品貢支黑葉霏朝霞叶貢支豐
歲充貢黑葉核小譬如萬鬼宅幽宮飄然飛下羣仙妹綠雲裁帔
而圓皆佳品也

襦絳羅東坡詩海山肌膚如雪瑩瑤瑜我欲綠章乞青帝佳種移
植來東吳洞庭楊梅堪娣姒堆盤火齊交珊瑚並時江鱗羅美味
鮓魚石首鮮而腴荔乎荔乎願自愛炎州魑魅不可與久居

晚泊清遠

急雨洗炎瘴暑氣欣暫清暝色連遠岸落帆倚荒城煙際船火聚
沙上新月生聯拳宿雙鷺開闔冕疏螢夜久疑風雨蕭蕭蒲葦聲

峽山飛來寺

遙同阮亭先生作

逆浪倚風帆入峽風逾迅翠濤乍低昂目接不暇瞬樹杪見招提
相傳自神運想當飛來初六丁激雷電蒼龍駕雲車神官嚴鞞
鬼工一夕成遺蹟千年見高下隱紅亭參差露紺殿竹樹交翠微
山色濃于澗又聞歸猿洞巖壑幽峭積猿去碧山寂猿歸玉環獻
茲事出稗官亦足資談倦登臨悵未遂帆迴脰屢睭鐘聲殷空江

江明夕霞綯

前題 王士禛

方舟宿瀆陽高峽厭蒙密乘風指飛來喜近調御室蒼蒼菩提
樹透迤寺門出金碧閣蕭梁幻語恐非實禹陽二帝子何年此
棲息言采阮俞竹遙應黃鐘律如何遂不還空有湖城憶東上
緣崎危詰曲味踈術夾磴荔奴陰青蔥上初日石壁留孤雲飛
亭俯江色沈沈晴川綠活活流泉疾敷坐憺忘歸逍遙問摩詰

皋石山歌

入峽出峽二百里瀆陽之峽特秀詭皋石巉巖青刺天琢鏤玲瓏
誰幻此咄哉造物真好奇巨靈夸蛾疲鏹鎚訶宛轉類空洞怪
石撐距爭巖巖突如熊羆下飲水竦如鵬味驚鶩飛銛如劍鉞割
晴昊密如束筍排蒼蒼空青蒼翠強名狀鏤刻繪畫徒爾爲插江
絕壁無寸土下瞰江心蟠水府盤渦深黑十丈餘地底轟轟喧萬
鼓人言其下穴老蛟腥涎呀呷吞牛牯絕頂遊戲來羣仙脯麟擘
芝張瓊筵羽衣絳節紛婀娜雲錦屏風圍石壇韶石山高近咫尺
仙樂髣髴鳴鳳鸞我來仰望不可上光景黶黶雲旂翻雜花濛濛

吹細雨千崖萬壑空嘯猿

觀音巖

遙同阮亭先生作

夕棹瀆陽峽晨帆觀音巖拔地碧芙蓉秀色何巉岳峻壁削無土
坼石橫松栢短樹雜蒙羃冬夏青甦甦梯磴入巖厂暗壁如蝸黏
危閣綴燕巢金身覆一龕縣乳象瓔珞五色垂鬚髮長眉一老僧
誦經聲誦誦凭檻俯清江江光映蔚藍告辭苦恩迫探幽意未厭
靈境難久畱獵獵風蒲帆

前題

王士禛

粵山無寸膚斯巖益屣屣其下蟠水府其上排雲霓洞穴豁天
半十丈臨江涯騎危躡虛空險絕緣鉤梯白日忽晝晦疑逢魍
與魍蝙蝠如白鴉鍾乳皆倒垂幕懸掩洞門狡獪神所爲暗瀑
響陰壑尋丈安可知灑落深潭中如笳齊發機佛座雲霧生濛
濛沾人衣遠江上明月闌干拂參旗歸舟意恹恍絕景誰能追
彈子磯

倚江巉岳削石壁屏障橫鋪染丹碧翠崖磨天五千仞蒼根插江
三百尺桐杉青青皆倒植石縫蜿蜒走蛇蜴青冥無徑愁猿飛
空或有仙人蹠呀然竅穴自生成篙工指點黃巢迹彈丸有無真
荒唐鄙語齊東聊倚撫世俗傳訛每如此炎方荒陋那足斥兩岸

峰巒正起人臥看風帆如箭激

庚嶺謁張文獻公祠寺在雲封內

來雁亭邊路縣崖豁一門天圍五管關山壓百蠻尊丞相祠堂古
丹青遺製存薄帷挂蟲網殘碣倚苔垣榕樹亂雲葉籐梢絡石根
簡編已陳迹風度尚堪論炯識安危繫憂讒涕淚繁淋鈴悲蜀道
金鏡想開元託興荔支賦頻驚鷹隼魂崇班還僕射領郡憶鄉園
開闢蠶叢險鑄鏡霞駭痕嶺路為文行人過枕席旅客薦芳菲臘
有僧徒住應無巫覡喧空梁仍海燕落日應嘒猿木客新詩句楓
人暮雨村曲江平圃在松石帶山樊平圃公故居也
觸熱度嶺喜聞家靜山兄使節已抵豫章率爾奉簡

祝融絳纛朱麾幢南荒毒熱神所邦赤螭軒騰驂駕六朱鳥觜沙
刷翅雙兜輿上嶺日卓午十步五坐緣竿橦頰肩赤腳汗流趾呿
喻喘如吳牛厖僕夫顛蹶我亦病蹋澗濯足流淙淙晡投大庾弛
擔裝主人問荅語不噤緋袍黃蓋新使者滕王閣前艤畫雙璽書
視學體統異朱旆獵獵金鼓樅縣知西堂屢夢我恨不奮飛心則
降握手欣然洗炎瘴對牀風雨熒青釭弟酬兄唱得好句壘篋金
玉相擊撞東湖荷花爛雲錦輕帆連夜下章江

宿清江寺

舟熱如甑炊暝投巖寺宿古佛照瑠璃空堂飛蝙蝠坐久薈蔔香

鐘聲歇還續月上東南峰娟娟娟娟疏竹

盛誠齋儀部招登八境臺二首

雙江如帶繞城流積翠參差堞樓五嶺北來煙樹迥八閩東眺
海雲浮丹梯碧檻還今日薛壁蟲碑記昔遊玉局風流曾此地惠
州老去又儋州

炎方初伏此凭闌八扇窗開俯碧湍飛鷺浴鷗晴檻聚堆藍湧翠
晚尊寒宋元灰劫餘高棟吳楚風檣倚急灘白鵲朱樓俱蔓草隔
江殷殷寺鐘殘

舟夜

露坐遲明月東峰缺處生杉篁千尺影搖漾半江清輝輝水螢亂
滾滾夜灘鳴暑氣宵分薄風涼白紵輕

豐城道中

蕭灘一夜雨颯颯疑清秋曉放劔江艇江渾淥漲浮沙村漁網集
遠岸菰蒲幽向夕櫂聲亂青莎飛白鷗

讀阮亭先生南海集戲題奉簡

前年先生嶺南去郡守郊迎令負弩紅衫官道擁蠻娃黃帽刺船
謹蚤戶今年我訪羅浮春邦伯如帝鬼司閭託宿頗遭逆旅罵半
龕喜與彌勒親回帆曉泊頓江下故人邀我弄盃棗盛誠齋持贈
先生南海吟壓載鮫珠三萬顆浴江孔雀翠襪褪出網珊瑚紅磊

矻我詩強哦口如笳黃鐘鏗鐻鏘岳啞昌黎足令籍湜僵醉翁或

許蘇梅頰

蘇子美梅聖俞較量事

事未稱意只餘一事應輸我我來正值

荔支天頰虬珠堆瑪瑙盤清泉初浴絳襦皺蘭香微擘冰肌寒噉

脣皓雪融無滓瓊乳霞液爭芳鮮方紅江綠誰比數釵頭丁香亦

可憐飽噉半月變髭髮衰容看鏡驚朱顏題詩遠寄華不注想見

先生掀髯捧腹吻流涎

武昌謠

武昌城頭墮天狗城中半夜聲如吼百犬狂一犬嗾矛稍團團中
丞府鳴鶻橫貫將軍肘九門樹旗晝飛礮牧奴屠兒印如斗團營
十萬銀刀都爾曹齏粉行遭屠不見菜市街縣賊顧誰作逆者耿
與吳

筠州漫興

鳳山之麓古筠州兩城中貫錦江流仙蹟有無象石嶺柑林青翠
鮎魚洲秋深驛路樟仍綠霜薄陂田稻更收摩挲北宋殘碑碣依

舊東軒屬子由

西陂雜詠爲宋牧仲先生賦六首

淶波村

結廬宋城下，豁達南湖口。天水涵空青，烟波盪窗牖。閑扉狎鳧鷖，淺渚足魚藕。試披輞川圖，淪漣勝此不

釣家

泛宅計元疏，移家意殊快。小艇籬根杙，閑簷高柳挂。落日攜年歸，秋風響蒲稗。釣亦自不得，得亦自不賣。

緯蕭草堂

水闊煙鶴小，渚寒秋光薄。娟娟西風吹，葭菼日搖落。草根亂蟲聲，茆簷通夜作。高人亦晏眠，篝燈自織箔。

和松菴

天空激翠濤，夜靜疑風雨。開簾澹明河，松頂月初吐。攜琴就松根，一彈聊再鼓。寥寥空山中，冥心遊太古。

芟梁

水淺菱葉亂，水深菱蔓長。蔓長礙牽舫，葉亂愁漸裳。一水橫略約，采采盈幽香。溪路久延伫，新月隱迴塘。

放鴨亭

朝呼闌鴨出，暮呼闌鴨歸。寒翠啜石髮，浮沈弄漣漪。浦樹含遠綠，空亭漾清暉。沙頭兩鷗鳥，與爾共忘機。

登臨江麗譙望閤阜山

山如傑閣竦，翠靄橫半空。白雲生山腰，卻遮東西峰。雲去眾峰出，了了青芙蓉。福地傳圖志，列仙有遺蹤。搗藥留丹臼，靈禽鳴澗中。斗壇掃叢竹，瀑布吹天風。玉像出碧土，鐵鐘識咸通。宮觀千餘年，屢見劫火紅。唐碑想剝泐，宋碣應苔封。我來已半月，未暇試孤筇。青鞵蹋泥滓，慚愧塵土容。茲晨俯危樓，碧浪涌且重。秋巒正如洗，秀色開心胸。青鳥從西來，寄聲語仙翁。五嶽願儻諧，逝將巢雲松。中秋客廬陵，使院戲效楊誠齋體。

前年中秋客西湖南高北高雲模糊去年中秋住白下大珠小珠
濺簷瓦今年偶作廬陵客四望青天喜澄碧三年祇得一年晴今
年那得兩今夕屋角初上黃金盆月華桂露微細縕須臾萬象共
一色碧煙斂盡玻瓈寒官釀鶯黃壓醪醑釘雞頭聞鴨腳諸君
自醉我自醒金波倒射鷓鴣杓夜深獨上凭危樓月仄下瞰白鷺
洲螺峰一點蒼煙浮青原黛色橫城頭滿前清景供冥搜我詩老
懶愁凋鏤直向誠齋乞句子明年月似今宵不

舟中九日

九日頗爲客今年又轉蓬川長遙雁滅秋老異鄉逢嶺樹干盤翠
江楓一葉紅東籬花自好漂泊漸成翁

安福山行

涉冬氣微溫南中信殊候暎澹林景清巒寒翠微痠紺碧閒青黃
霜林紛纈繡刁調振虛巖羣響互奔湊路傍干稗松青青類舍耐
人聲驚磨逸泥迹於菟鬪磴石溼古蘚暗泉洩巖竇泆流去無蹤

紆徑忽復邁明滅榛莽中蛇行屢回脰斗折赴陂渠瀧瀧決縣溜
出谷見邨墟人煙午炊後田家欣有秋負暄嬉老幼空園臥輓轆
低牆垂橘柚悠然懷故山歲功亦已就

分宜道中二首

山腰縈細徑仄磴滑苔封紅葉不落樹白雲時露峰凍泉依古澗

崩石偃枯松颯颯黃茅什驚心印虎蹤

犖确山行盡平洋帶一川茶花繞籬落冬月開白花蕎麥秀陂田

犢飲投前澗鷗盤俯暮天寒江臥虹影驅石話當年萬年橋頗鉅

嚴嵩作題孫徵菴前輩觀瀾圖小照二首

十年宦海得閒身回首驚濤拍岸頻何似鶴湖風景好鴨頭微皺

碧粼粼

白髮紅顏羽翰生黃婆丹鼎大還成御風會訪三山去身在鼇簪

頂上行微庵頗談內丹故詩及之

袁州謁昌黎祠

祖龍一炬灰墳邱燭龍晝暝天帝督西京老翁彊解事手箋口授
牛毛稠當塗以還亂繩紫南島北索如羹蜩叶況復丘軻沒已遠
東西二鳥鳴嘲啁帝憂濁世塞糠粃遣公騎麟下九州東坡碑詞
下與濁世
檄掃鈞韶九奏響阿閣金鐘大鏞鏗天球二鳥縮頸萬竅啗儀鳳
舞獸紛夷猶炎州湯沐帝所賜潮州量移仍袁州袁陽山城僅斗
大袁山孱顏袁江流元和去今一千載雲煙草木榮光浮祠屋三
閒古臺下丹楹粉壁龍蛇幽豐碑倒薤纏蠹鼠公神縹緲應來遊
星旄騰霄軼浮景挾兩蒼螭駮素蚪十洲羣仙從遨戲閭圍綈馬
扶桑朝我欲挽公敬下拜跽陳辨香公許不韓門弟子四五輩朝
湜郊籍誰其儔天門誅蕩公不來風寒竹樹聲颼颼

宜春臺懷古

圍巾干峰斗大城層臺四望翠煙橫巴陵水闊雁初到嶽麓霜寒
猿夜聲吏部殘碑纏野蔓贊皇遺蹟竄山黠文章勩業俱黃土寂

寂袁江夕照明

臺左為昌黎祠化
成巖文饒讀書處

人日小飲牧仲先生署齋賦贈二首

軍吏放衙罷脩然高士廬一尊又人日萬卷苦吟餘殘雪明屋角

梅花對道書凝香簾影外東雀下空除

鈴閣真如水臣心

聖主知指揮羽扇擐甲靜圍棋

談次偶及
戊辰七月

定變事扶履雲卿圍看碑孺子祠風流笑山簡只醉習家池

雪後登滕王閣放歌

我攜鐵筵羅浮回豫章城頭吹落梅羅浮仙人狡獪飛廉滕六

供呵搗亂灑梅花徧原隰千峰一夜爭皚皚曉披白鶴筆獨上滕

王閣九疊屏風失青翠瓊樓十二垂珠箔長江瀟瑟迷孤篷漁舟

藏浦高桅泊團團萬頃水晶盤一片寒光冪寥廓初疑海上浮神

山蓬壺縹緲不可攀其物禽獸盡白色用封禪
書語銀為宮闕虛無間

又疑誤跨玉虹入月府玉輓抱杵東不舉霓裳對對舞仙姝清虛

高處寒如許回頭雉堞堆瓌瑳簷冰挂地鐸鈴語鱗鱗萬瓦溼煙

浮旋覺此身尚塵土忽憶滕閣今千年滕王蛺蝶隨荒煙子安退
之骨已朽何況珠簾歌舞當時妍惟有西山只如舊此中棲隱多
神仙洪崖丹竈流銀汞蕭史茅龍耕石田我欲左攜葛句漏右挽
梅子真徑呼玉蚪騎上天雲中縞鶴紛翩躩或言神仙之說竟茫
昧且飲美酒酡朱顏向晚江山轉清絕逸興拏雲坐超忽夜深躡
雪還上來揮手寒窗招海月
漢四神古鏡歌為家汝為作
飛廉鼓鞞嘯祝融幽煉三商騰雄虹幽煉三商鏡背銘字金姥竊月離月宮
取兔作腊斫桂叢一片秋水空復空相梁建章窗玲瓏嬪嬙照影
芙蓉紅茂陵相隨葬龍子千八百年精不死飛出人閒土花紫硃
砂翡翠斑鱗起阿咸得之豫章古按圖考銘十二字囊以古錦陳
文几要我作歌傳久長湘簾夜夜凝寒光雷電掇取慎隄防
南康阻風和彭觀宸廷獻夏庚廷謨
宮亭湖上春風顛落星灘頭浪拍天二月未殘五老雪長年誰放

九江船黑豚無數正吹浪白鳥一雙時掠舷篷窗竟日蒙頭臥弟
倡兄酬覺汝賢

題錢舜舉三蔬圖和牧仲先生作三蔬菜筍盧菘也

眼底青青見生菜泥融雨溼流新翠箭筍翻土一尺彊錦綉乍脫

嬰兒臂恰疑江南三月天不應蘆葍已出地細看乃是三蔬圖雪

溪好手寫生殊雪苑先生精賞鑒一蔬五十六瓊珠先生分紫以古體長句五

字十六青門老圃江南客蔬譜風味頗能說爭春蚤韭抽露牙破寒

晚菘壓小雪糝羹青嫩蕨苗肥點匙鹽豉蓴絲滑驚雷森玉蕈如

釘拗頸爛烝壺似鴨叶菜鷓鴣雞下筋鮮蔓青野薺登盤活筠籃
小摘爪甲芳薑辣橙香紛縷切二十七種庾郎鮭五百食器烏樛
鬻窮冬旨蓄貯東菴枯腸破饗寒蔬熱楊誠齋詩自笑枯腸成十
年無事作行腳南竊邕管北幽朔南越只解腥介鱗北饌未免誇
羊酪邇來日日飽官廚西江花豬白勝玉雖憐菜籬遭蹴踏頗笑
將軍不負腹恐此亦復非良圖齒雖未豁霜生鬢青門三徑行荒

燕芋區瓜壠歸當鋤展圖惆悵胡爲乎江南何處無三蔬噫嚙吁

庚午五日楊青邨大令邀泛琵琶湖六首

十日九日黃梅雨半晴未晴端午天餘干令君雅好事酒鎗茶具

上湖船琵琶洲漲浸城門也有龍船鑼鼓喧最憶胥江水嬉盛黃龍十丈

繡旗紅

弋射溪頭急雨生羊角峰尖斜照晴遊人艇子爭歸去鷓鴣滿湖

柔鷗聲

人散湖空鷓鴣閑斷雲薄靄有無閒移船更向梅巖下臥看雲林

一幅山

三叉岬徑聽呼牛一抹邨煙紫翠浮山照欲沈殘雨散斜飛白鷺

掠船頭

背郭人家蚤上燈青衫小吏立沙汀底事回橈已曛黑使君貪看

晚峰青

芝城道中偶維舟村步卽景

夏木十餘株交柯暗空翠茱簷三四家繞溪種菱芰纜舟綠陰下

赤日無暑氣邨婦餉田歸邨童泗水戲林外殷其雷湖雨忽而至

舟中爲彭觀宸題四時漁樂圖

篷窗十指如懸槌彭子持畫索我題展頁四幅漁樂圖平湖好手

今倪迂桃花水滿蒲葦綠潑刺白鱗三尺玉薰風湖岸荷田田綠

陰樹底枕蓑眠秋汀雁落秋山翠得魚沽酒船頭醉忽然幻出千

峰白一竿清絕孤舟客看圖鬚笠澤湖我亦煙波舊釣徒憑將

逸品雲林筆簪笠樓裝貌老夫

六月初二夜泊康郎山書所見

火雲崢嶸日欲暝康郎山脚船拋碇深樹黑鷓鴣呼漁燈星點

互澄映湖東黑雲起如綫須臾潑墨滿湖面風伯噫欠初蓬蓬忽

然震撼翻天宮戰馬萬匹車萬兩奔騰轟軻聲殷空阿香玉女助

威勢嶽掀海簸何洶洶可憐山根艤百艘大船小船相舂撞叫號
吸呷人聲呢高桅摧折拔枳椿駭浪澎湃走石缸飄瞥一覆誰能
扛赤光睽賜音賜黑雲裏疑有神龍掉其尾倒捲番君半湖水雪
雲翦篷鏖萬矢雨聲似拔昆陽壘滢水盛溢屋瓦飛虎豹股栗牛
馬死平地定應深尺咫五更風定雨漸微敲火照艙乾處稀我書
一束亦淋漓不眠咄咄頻嗟咨篙師斂手向前語君今得生乃大
喜破書數卷不值錢飽蛟螭腹尋常耳日出開船打鼓聲起看波
面鞞紋生光景變幻只如此得喪俄頃何足驚君不見鳧鷖拍拍
風飽帆湖光依舊青于藍

北蘭寺記遊六首呈澹公

仿舫居

巖屋如蝸螺盤旋通詰曲仿舫五笏餘芭蕉半池綠何處來炎歊
高樹夾修竹

到汝堂

到汝堂中坐翛然涼吹生娟娟翠篠合嚙嚙幽蟬鳴我欲敷清簟
臥聽疏雨聲

列岫亭

列岫隔江青孤雲就檐宿煙渚白鷗飛樹杪風帆逐微雨鶴嶺來
南宮山六幅

種瓜圃

開荒蒼荀林藝此五色種艸徑露未乾老僧來抱瓮我亦種瓜人
煙雨長鏡重

棟花坪

在到汝堂左高下種棟樹予愛其景因名

石磴上修坪苔徑破幽鞞棟樹百餘株濃陰午匿而想當花落時
地衣紫錦溼

澹雪泉

泉絕佳而舊名頗俗予更名以澹雪做參寥泉例也

北蘭澹雪禪西湖參寥子泉以二老名風流亦相似山月輓轡聲
幽鳥忽驚起

又寄題棟花坪

北蘭幽絕棟花坪上有斲成青玉杵棟陰滿地山鳥寂隔院時聞落子聲

李渭清宮贊典試雲南遙寄二首

銅龍闕下承新命黃雀風前過洞庭若焚煙開六詔遠灃沅天入

九疑青木瓜昔古餘蠻壘金筑城荒閱使星舊是長卿乘傳地盛

張幾輩許傳經

南士盛覽張叔俱從相如受經

古驛秋蟬疏柳黃碧油幢擁下瀾滄鐵橋銅柱標蒙詔一握孤雲

露點蒼象馬頻年通貢道賅蠻盛世有文章去攜李白瑠璃研詩

句流傳徧夜郎

青門旅橐卷二

旅橐文序

世之言文者曰文必有法夫法何昉乎豈嘗有懸為成式命之曰如是以為法乎抑自觀者見之合于道中于人心有自然不可易者焉故以云也譬之樂然喉中轉氣管中轉聲七均備而一調成而疾徐舒斂高下清濁不失其則也苟無得于聲氣之元徒求之器與數猥稱合樂猶古陋已毗陵邵君子湘環偉奇逸士也績學工文為宋牧仲中丞公所知中丞淵雅善鑑拔以斯道為任與子湘為青雲之交乙亥秋以所刻旅稿寄予曰子其序之子湘著述甚富此其客遊即次之作積有六卷可謂勤矣子竊慨夫為文者日言法而莫知法之本也雕繪景光以飾浮采造綴巧偽以揚虛聲不原諸聖賢之旨無關於前古當今之故誦習一大家言句倣字摹謔詭然詫于人曰法如是斯文之病也豈所謂載道者哉子湘之文華而實簡鍊詳贍各盡其致者法也而根極理道輔翼風教喻諸獨而信諸人則有超于法之表者韓愈云其皆醅也然後

肆焉孫樵云人宜一二百言者能數十言輒盡情狀至言窮事際反若有千百言在筆下庶足當之矣迨讀所爲李忠肅公傳致歎于烈皇帝之英明而不肯用公策卒至宗社淪胥主臣同盡有不禁愴然而悲者此尤流俗之文所未有也竝質之中丞其以予言爲有當乎不華山七十四老人王弘撰序

青門旅橐文目

卷三 序十六首

思硯齋詩序

周樂園先生文集序

贈王子重先生序

送翁武原詩序

送張君之南甯別駕序代

贈戶部尚書王公祀名宦錄序

送姪璿遊太學序

張水部歸養詩序

豁堂語錄序

送孫太史周儀部出使安南序

吹萬集序

仁和李氏宗譜序

青門旅集卷目

南城程氏族譜序

寧陵縣志序代

青翰草序

少司馬王公奏疏序

卷四 記八首 書後雜著十首

飛來峰記

夜遊孤山記

萬柳堂記

毛會侯垂竿圖記

問津園記

嵩陽書院記代

重建始祖康節公祠堂記

息菴記

書响嘯碑後

書嵩山石闕銘後

書朱文公同年錄記後

書金谿兩烈婦紀略後

書雙忠遺翰卷後

王北山哀辭代

族兄靜山提學哀辭并敘

張烈婦哀辭并敘

甘霖應禱頌并敘
清故光祿大夫太子太保禮部尚書王文貞公誄并敘
代

卷五 傳九首

明監察御史張公傳

登州太守譚君傳

明左都御史李忠肅公傳

雪樵先生傳

青門旅集卷目

青門放彙文目

進士王東亭傳

馬氏二烈女傳

贈兵部尚書馬公家傳

八大山人傳

朱孝子傳

卷六 碑二首 誌銘墓表六首

蔡忠襄公祠堂碑代

清故通奉大夫詹事府詹事兼翰林院侍讀學士加禮部侍郎沈

公神道碑代


丁九貢先生墓誌銘代

諸老道壙銘


王母韓孺人墓誌銘

清故文學耿君墓表

文學明卿楊君墓表




巡撫湖廣都察院右副都御史楊公墓表代



青門放彙文目

三

青門旅橐文目



青門旅橐卷三

後集

武進邵長蘅子湘

序

思硯齋詩序

合肥許君生洲大父中丞公明天啟開守紹興夢東坡手授一硯
 明日童子種竹郡亭于巖窾間得硯刻天然硯三字背有東坡
 像蓋郡亭枕種山麓相傳山以越大夫種得名云中丞公寶之數
 十年明末失于亂時中丞公既歿而君之尊人蒼巖先生追念手
 澤顏其齋曰思硯既而君宦遊京師乃自爲思硯齋詩紀其事一
 時與君遊者又作爲詩歌以傳之余閒牧東坡年譜未嘗至會稽
 友人毛奇齡之言曰公守杭去此僅百里往來遊居亦未可知或
 信然邪東坡之硯如鳳喙龍尾洮河石之類皆爲銘而不及天然
 意當日偶然而得之亦偶然而失之遂不帶芥邪久之詩益多君
 乃類所得詩若干首屬余曰子爲序夫物成毀得喪相尋于無窮
 理所固然君豈真介于一硯與亦曰先人所好吾好之硯其小

者耳然而子若孫方且咨嗟歎歎于既失之後至于數十年不置則夫詩書栝棬之澤之存者其世守勿墜可知語曰覘其小可以知大則是編之傳宜也嗟夫坡公距今六七百年其閒功名富貴蕩爲雲煙者何限而一覘之微願使人得而愛失而思歷久而不能置然則士君子所以自不朽于世者固有在哉

周櫟園先生文集序

文章之士不幸不遇則隱約終身幸而遇矣其才氣慷慨足以自奮功名而往往遭廢斥排擯不一竟其用甚者遭離既患至詘支體關木索雖屢什屢起卒不免抑鬱坎壈以死而其文章之僅存者乃僅與貧賤隱約之士爭一日之名嗚呼可悲也歟櫟園周先生少舉進士筮仕卽有能聲順治閒歷官福建按察使遷布政使前後治閩凡八年閩阻險多山時郡縣初定數反覆先生調畫兵食經略百方閩賴以全以副都御史徵復驟擢戶部右侍郎忌者側目爲蜚語聞上逮繫刑部獄獄日急有詔朝審部院諸大臣皆

集先生自列狀訴諸大臣傳視未竟俄大風起西北揚塵沙蔽天晝晦暝風擊手中所視狀入空去風定冢宰大言曰天意如此獄可疑同列皆然之奏上未報會世祖崩大赦得釋時順治十八年正月七日也今上初稍理還其官以僉事按察青州尋遷參議督糧江南未幾復遭劾解職聽劫先生博學多著述所爲詩文極富至是忽夜起徬徨悉取火焚之曰使吾終身顛踣不偶者此物也迨事解而先生亦卒矣悲夫先生既沒子在浚綴拾所爲賴古堂集若干卷傳之且屬予序予以爲先生詩文久自行于世世皆知愛重之獨悲先生位不配其才遇不究其用爲可歎悼蓋天下有事常患無可用之才而士之才者又往往患不盡用嗚呼如先生者不可惜哉不可惜哉慈溪姜宸英誌先生墓稱所爲詩及文機杼必自己出語矜創獲不蹈襲前人一字刷銚湔濯而歸之大雅又稱先生方對簿時吏卒竊立銀鐺纍纍呼譽聲如沸手琴據地顧伍伯乞紙筆作送客遊大梁詩先生意氣如其詩文安

得卓爾出羣也先生名亮工字元亮櫟園其號在浚字雪客好學能文章有父風

贈王子重先生序

進士之名猶古也古者學成而爲進士後世成進士始可以爲學三代之時士之入于學者春誦夏絃秋學禮冬讀書而其養之之漸必自一年歷七年謂之小成九年知類通達彊立而不反謂之大成然後論選于鄉升于司徒司馬而名曰進士故古者無不學之士士無未成之才今世則不然其急者科名也其習者辭章訓詁也兢兢守四子一經之說童而學之白首而浸淫焉一切經史子集兵農禮樂天文律歷象數諸書相戒屏斥以爲是不利于制舉間有一二瑰奇辯博之士稍思旁涉其源流其父師之操之也惟恐不嚴幸而成進士矣然後得釋去經生家言而其閒又有不說學與不暇學者陋者飾輿馬僂從蓄聲伎亟讌會誇耀里閭以自豪其有志者又以仕爲學往往困于簿書期會訟獄之繁嗚呼

信乎學者之難其人也黃岡王子重爲今學士吳廬先生次君歲已未就試禮部成進士不肖留京師曰吾將歸而肆力于學焉子重以名家子能自刻苦好古義紛華靡麗之習無所動其中而今時銓法壅滯由進士起家者或累十餘年乃得官王子行矣負好學之資居可學之地而假以寬閒之歲月譬之于舟堅其檝施其帆檣其用良矣以之行江河之中沿流而遇風吾能竟其所至哉于其別也爲之序以廣其意

送翁武原詩序

錢唐翁君武原來京師謁選得黃州倅行有日矣翁君故善詩爲賦別詩四章諸與君遊者皆和之謬以予能文屬予序黃州楚名山水處也江出夔峽下荆渚合洞庭沅湘會漢沔以至于黃湖蕩潏浩無涯埃隔江武昌石門諸山峰巒隱見縈繚萬狀憶十年前中表兄楊簡菴令黃陂子一再過其地輒游眺竟日獨赤壁不在此今黃州後人多怪子瞻之誤按圖經嘉魚有魚嶽大崖之山瀕

江爲赤壁北可望烏林陸口宋謝枋得曰子自江夏沂洞庭舟過蒲圻望石崖有赤壁字其北岸曰烏林亦曰烏巢上有周瑜廟此爲瑜戰地無疑考之史皆合蓋古蒲圻地今屬嘉魚也黃州之山則名赤嶼地志曰赤嶼距圻而近北望武磯是也亦名赤鼻桑欽水經曰鄂縣北江水右得樊口又左徑赤鼻山南是也子瞻博極羣書不當從俗訛嶼爲壁豈其撫江山之如昨悲英雄之易逝偶借以發一時憑弔之感其誤謬有不足深論者邪夫覽山川之勝詳攷故蹟此賢有司事也若夫道情念離諸君子言備矣簡菴從子陶雲今方以觀察蒞黃陶雲好古工詩亦愛予文相見必善遇君君試以予言質之

送張君之南寧別駕序

南寧古邕州地當桂林西南徼瀕大海外連交趾是惟颶濤漳霧毒熱之區蛟鱷蝮虺之所窟穴林蠻洞蠻鳥言卉服之民之與居仕宦者往往不樂其地而別駕所以佐守然有分職或主錢穀或

遊徼盜賊塵塵其職之所司不敢苟及吏民持牒愬卻案略不敢省不者爲侵官故雖有瑰奇特立之士思自建豎恆鬱鬱無所表見嗟乎豈朝廷設官意哉長洲張君臈如令登封仁慈尚教化尤自愛力矢廉潔登封人信之曰廉令也位于其上者皆信之曰張君廉令也以卓異聞于朝朝之卿大夫皆信之曰張君廉令也而今例令以卓異舉者得爲御史給諫其次亦爲曹郎君廉顧皆不得得南寧之別駕以去其心獨能無介介邪雖然君儼然守古道者也士守古之道者內外遠近劇易惟上所任使皆可自見故夫謂君不樂于茲行者淺之乎知君也于其行序以送之

贈戶部尚書王公祀名宦錄序

世祖章皇帝師入關仗大義驅逆闖賊潰西遁而青豫閒多爲賊保聚元年八月墨勒根王議遣兵下山東河南前戶部侍郎淄川王公時在京師懼東省桑梓地一旦重罹兵乃身出邀說王曰殿下奉命討賊灑中原不共之讐甚義電捲颯馳不旬日而平幽燕

甚武畿輔以南亡不釋末倚機傾耳以待命者然殘寇餘孽所在保聚二東三河聲教未通驟以大兵臨之恐民情疑畏堅其附賊之心且兵法有先聲後實者請按甲休兵遣一介之使宣揚義聲則兩省可傳檄而定墨勒根王大喜奏遣公以原官招撫至德州以書諭城中陳利害旣福降之諸郡縣相繼降至濟南稍稍置官吏收版籍布威德眾志大定東次青州趙應元者黠賊也擁眾數千偽乞降公信之不設備應元乘夜襲青州城陷公死之嗚呼當申酉之際海寓土崩大河南北受僞命負固者相望蠶屯蟻聚至不可勝數然小民何罪數年之內雖次第削平而老弱苦係累丁壯膏野草民之離于鋒鏑者不少矣公單車馳尺一之檄下五十餘城淄兗海岱間晏然若不知有兵革事功顧不偉與或者以青州之陷咎公之疏天下事患固生于意外而變起于不及防旣已出身犯難詎能一一逆覩旣福特視其幸不幸耳在易需之夬曰需于血出自穴需濡也血傷也君子痛生民之塗炭咸橫流之未

已將濡迹以濟之雖傷不顧若其出不出天也然則公之心獨苦而遇可謂不幸矣公死再閱月將軍哈哈木率師復青州擒趙應元誅之事聞詔贈公戶部尚書子祭葬官其一子後三十餘年畿輔學臣以士民請檄祀公名宦公之從子學士君又徵薦紳先生詩若文紀其事而屬序予按祀典有功德于民則祀之死勤事勞定國則祀之使公非有功德于民旣三十餘年矣士若民何所不忘于公而請祀之耶嗚呼可以觀公之事矣公諱鼐永字蘅皋別號澗遡世爲山東之淄川人

送姪璿遊太學序

邇者廷臣言太學人才所自出比入贊者多無以稱上廣厲至意願下明詔令學臣選茂才異等者郡學二人州縣學一人以名聞貢入太學詔曰可于是吾郡以璿應詔予璿爲族父行又常從予遊其行也何能已于言上之人操以進退天下士者文而已耳而原乎其意亟亟焉欲得天下士而用之者又不以文蓋生民之

治否中外之利害得失一代之理學事功節義皆待此數十輩科
目之士羣起而任之而今時所爲科目之文守章句攻訕詘驅天
下瓌璋卓犖傑出之才俛首而束縛于其中方且相習爲丐貨剽
竊空疏無用之學以徼倖于一日之得而不知所返是故所養非
所用豈上之意固然邪吾邵氏之先實祖康節自淵清公扈蹕而
南派衍吳越間它不敢遠引梁谿文莊公存歷中外所至著清譽
正德中忤閹瑾幾蹈不測晚以請養歸講學東林得濂洛之傳武
林弘齋公嘉靖初以議禮忤枋臣拜杖遠戍著書數百萬言學者
私諡弘毅先生今年予客越得讀其書所謂三弘錄者益想見其
爲人相距二三十年間東西四百里兩鉅公截業相望若吾宗二
華然嗚呼科目如是可謂無負矣璿內行醕備事親孝居三世不
析箸力學者古自六經以迨史漢唐宋大家皆涉其藩舉業之言
亦能高出儕輩以故名駸駸起使挾此而希一日之倖何難顧予
望璿不止此方今賢士輻輳太學如東漢郭林宗符融唐何蕃歐

陽詹宋六君子之流表表史冊者今固宜有其人然求其可與講
道德資古今者終身得一二人已足願益讀書慎交遊務爲有用
之學以庶幾文莊弘毅所樹立使世謂科目有人詎不偉哉曩予
客京師久名公卿及四方賢士往往親予試持予言以往諸君子
且幸教璿也

張水部歸養詩序

六經之教惟詩善言情而情莫切于父母之養顧三代之盛也臣
子往往不自言其情而上代爲之言小雅四牡之辭曰是用作歌
將母來諭解者曰諭念也知汝以養母之志而來念也夫使臣不
言而上委曲言之如此使其請之有不聽乎故其時無不養之親
親無失養之子而南陔白華華黍作焉三詩皆笙詩亡其辭序曰
南陔孝子相戒以養也白華孝子之潔白也蓋言奉華黍以養其
親如華之潔也自是萬物咸遂其養而王道成矣故繼之以由庚
崇丘庚更也言物雖更變託于大邱之上靡不遂也及其旣衰上

既不能周知臣下之情而臣下亦無由以自達乃不得已而託為
憂愁哀怨迫切之音以庶幾于上之人之聞之也而采詩者亦備
錄其辭列之變雅祈父北山諸什是已聲音之道關乎盛衰信夫
今天子孝治天下士大夫親老無他子者得終養如著令水部
魯菴張君以壯年歷官曹郎有聲譽一旦念太夫人春秋高白其
曹之長為請于朝以養歸諸與君遊者皆作為詩歌以美其行余
得而讀之大要其情潔其旨厚其詞渢乎爾雅類有合于南陔白
華華黍所稱詠而非祈父北山憂愁哀怨迫切之音可髣髴也然
則是詩之作且以鳴王道之盛焉其傳也固宜詩見冊子中者若
千人四方之士皆有之屬毗陵邵某為之序

豁堂語錄序

華菴上人持其師豁堂語錄若干卷自錢塘走京師三千餘里屬
子序予未習佛家言而嘉華菴之意乃為序曰夫學佛者之有語
錄猶夫學儒者之有集云耳自穆子三不朽之說並立言于德功

而後之學者莫不鉅心擢腎疲畢生之力以蕪成一家言傳後世
然閒攷前史漢藝文志所載至隋已亡十六七歐陽修稱唐之學
者自為之書多至二萬八千四百六十二卷宋存者僅十二三以
今日所見求之宋元明亦復如是嗟乎是皆世所稱能言之士也
其文往往汪洋奧美震動一世之耳目世之好奇愛博者往往慕
說稱道之而數百年間已凋殘磨滅不可勝紀彼其說雖未必
盡合聖人然類多依本孔孟之指君臣父子夫婦之道禮樂刑政
治忽之大端穿穴鉤蠹以成其說然猶不能傳遠如是況乎虛無
澹泊如浮屠氏之言者歟聞浮屠師有達摩者以為三藏皆筌蹄
不立文字而後世學其學者顧喋喋咕咕欲以信今而傳遠毋乃
惑歟雖然吾見世之號師弟子者輕棄師說守之不堅甚者角立
門戶不幸遭離禍患死亡則自諱其師更名它師者有焉今華菴
表揚其師于既亡之後篤信自守華菴之賢有吾儒所不能及者
矣豁堂為臨濟宗其傳遠有端緒常與今相國益都馮公交相國

欲延致之京師豁堂堅謝既示寂相國銘其塔而新城王阮亭先生語予曰豁堂本儒者其詩清麗可誦云

送孫太史周儀部出使安南序

皇上天覆地載薄海內外悉主悉臣四裔之君長重數譯稽顙闕下使節往來冠蓋相望而安南于諸國尤恭順先是逆藩構亂道梗塞又其國再易主顧懃懃不忘天朝事大之禮勿懈益虔上嘉其忠詔選廷臣通達國體知使事者滿漢各一人往諭祭其故王又滿漢各一人往賜璽書襲爵如故事上親灑宸翰書忠孝首邦四字賜之恩禮有加于是編修孫君儀部周君承命以行朝之士大夫皆贈以言子聞按史冊安南古交趾也滇粵以南占城真臘滿刺加之屬雜國以十數安南最大宋元來世備外徼明承樂閒常用兵郡縣其地不數年輒叛宣德閒以二楊議罷之復其國然而終明之世叛服不常今天子仁聖神武或逆節萌生王師所臨籟飄席捲而守禮之邦則寵嘉而褒異之薄其貢入不利

其土地深合古聖王御遠之道而安南亦明于逆順王享惟謹所謂主臣交得者也有何其盛歟又聞弘治初翰林侍講劉戩使安南宣詔明日遽行所賂遺珠香犀象及囊中裝直可數千金峻卻之一無所受交人愧服為建卻金亭于思明道中今兩君皆博雅君子以學行受上知視戩所為無足深異兩君行矣當必有增重天朝炳烜史籍者若夫交遊之離合羈旅行役之勞山川風土瘴雨蠻煙之異俗皆小者也故不書

吹萬集序

楊子聞緒令餘干之明年余以粵遊經其邑楊君余中表親也喜余至延之署中歡洽累旬日已乃出其詩曰吹萬集若干卷屬余序吹萬者何本蒙莊吹萬不同語也蒙莊氏之言曰大塊噫氣其名爲風是惟無作則萬竅怒鳴故其所爲似真似口似耳似枅似囿似白似注似污者極眾竅之不同也激者謫者叱者吸者叫者濠者突者唱于者唱喁者眾竅之聲之不同也然而冷風則小

和飄風則大和琴瑟調調刁刁而自合乎籟者則無不同古今之詩亦然詩自三百篇離騷而下有漢有魏有六朝有三唐有宋有元有明有今海內稱詩家其不同也猶夫竅也其音之洪纖高下正變清濁剛柔嘽緩促急和平噉咷之不同猶夫竅之聲也而要其緣乎情沿乎法各鳴其胸之所欲言而扣之而成聲則無不同不成聲不足名詩余怪夫百餘年間譚詩者之日陋也主漢魏三唐者詆宋元人詩曰菊門曰小乘主宋者詆前之所作曰贗曰勦甚則怒其子孫乃并其祖父而訾之波流雲擾詆謫蠹出不惟其是之折衷而規規焉分流派別異同以斷其勝而後已譬之三尺童子截六寸之管空其中而吹之偶得一二聲守之不變且號于人曰吾之聲可使景風翔慶雲浮吾之聲雖師曠之清角鄒衍之吹律無以加噫其陋也余以謂詩顧其成與不耳成則皆足以傳而流派異同固可亡論楊子之詩初喜劍南近乃喜讀少陵大要能自鳴其胸所欲言而扣之而成聲者進而不止則其詩之可傳

亡疑余學詩三十餘年詩亦屢變今老矣愧未有成顧塵能言之楊子將以余言為穀音乎哉

仁和李氏宗譜序

仁和李生祖望請余序其宗譜余諾之而未暇以為者三年于茲每見請益堅噫生之用心抑可謂賢矣周禮太宰以九兩繫邦國其五曰宗以族得民註曰宗繼別為大宗收族者也余嘗以謂三代以後宗法既廢而先王尊祖敬宗收族之道意塵有存者莫重于譜系李觀有言五服者人道之大治也然而上盡高祖旁盡三從上盡高祖則遠者忘之矣旁盡三從則疏者忘之矣人情忘則遺遺則散散則交臂不相識慶弔不相往來甚者相奴隸媵僕而不相卹人道幾何不淪胥邪若譜系明則不然自始祖而下吾身而上苟世次名諱之可知者靡不詳載世次名諱之既詳則雖親盡服盡吾猶得而收之而不至于遺且散故宗法雖不立而大宗之意猶有存焉嗚呼不綦重哉今世類不講譜牒之學世家子弟

往往以門第高人而高會而上或不能舉其名者有之而其得姓
所自支分派別之所由雖號稱士大夫或不能悉可慨也李于仁
和非著姓顧其傳頗久宋高宗時諱豸者扈蹕而南董龍舟之役
杭人稱爲船李豸十三世孫諱官明萬厯間以工篆籀選爲禮部
儒士譜其所輯也距今七八十年祖望綴拾而更新之又乞當代
名人鉅公序言多至數十首抑可謂賢矣按譜始李耳垂二千餘
年凡李氏王侯將相畫像傳贊具在余頗疑其厯雜自豸以下乃
皆犁然可考傳曰禮失而求之野有韋布之士委巷編戶之氓之
所爲而學士大夫乃反不之及者獨李氏譜乎哉

南城程氏族譜序

建昌之南城曰金斗程氏者其後人某抱族譜介而謁序于余余
嘉其誠不能辭南城于郡爲治在黎旻二水之交鳳凰山之陽其
民尚通而善賈其世家巨宗則敦詩書尚氏族傳世遠者或千餘
年不絕故尤重譜牒之學聞前明時郡故饒又分建藩邸其雉堞

樓櫓之傑麗臺池苑囿之高深鐘竽笳角漏柝之喧歌舞騎射弋
獵之娛樂與夫奇花異卉讌會醪醴之盛直爭雄于姑蘇錢塘蓋
余常誦其鄉先生羅圭峰記之文所稱說者如此今年余以客遊
至其地乃大不逮所聞井屋蕭然闐闐之區斥爲甌脫者猶十三
四詢之邑人則曰江右五十年間再燬于寇而吾邑尤甚故瘡痍
至今未復因而屈指其鄉之世家巨宗蕩析播遷不能保其世者
往往而有朱邱華屋塵爲劫灰而區區圖牒之散佚文獻之彫喪
蓋不知凡幾矣于是而弗墜世守益之潤色非賢者能與程氏系
出高陽世爲重黎氏與司馬氏同祖周成王時始封程遂以國氏
程伯休父其後也自是代有顯人五代之季有名淪者遷休寧閔
口自閔口四遷始家南城之羊角元末名世亨者又由羊角遷金
斗則今之遷祖也余按歐陽氏譜中閔失世次者再蘇氏譜三世
而上失其次明李空同譜曾王父而上失其名而程氏之譜自周
至今歷二千七八百年獨能絲聯珠貫世系犁然雖遭亂而獲全

爲不易得抑聞之譜所以傳信也近世氏族之譜往往由子孫無識好牽連傳會遇有闕佚必求其人以實之甚者偽撰諱字世次牴牾正史爲識者所笑嗟乎彼三先生者其讀書考據豈遽出今人下邪胡聽其闕失也余謂程氏譜第當著其得姓所自而支分系別則斷自遷金斗始明初廬陵解學士縉精譜學江西一省之氏族源流婚姻官闕無不貫穿者與盱接壤今豈無傳其學者君歸求其人試以余言質之以爲何如也

寧陵縣志序

代

寧陵古葛伯國湯所始征也春秋桓十五年邾人牟人葛人來朝一見于經其後無可考亦曰沙隨成十六年秋公會晉侯齊侯衛侯宋華元邾人于沙隨是也地在今縣西寧陵之名始見班固地理志而後世因之舊志稱漢元狩元年始置縣是也縣之有志明嘉靖閒創于呂司寇公坤本朝續而修之爲邑紳李公若星今繼修之而以序請者邑令王君也寧陵爲下邑地褊而瘠然縮梁

宋宛洛許潁江淮之衝明自中葉時頗困共億又瀕大河歲有人徒畚鍤之勞前志已卹卹乎憂之迫明末造流寇往來蹂躪墮垣堙塹井屋蒿萊一二遺黎驚竄于青燐白骨閒寧之爲邑幾不可問及皇清受命統一寓縣兩河之間復爲樂土民生自童穉以至垂白不見兵革五十年于茲矣今覽邑志所載城隍峻深塵市鱗比學校署舍以至道梵仙釋之宮有廢畢舉加之年穀屢登戶口殷殖其君子敦禮讓說詩書其細民勤生力田以致益臧視史冊所稱古先王遺風殆未遠遜蓋自今上御極以來省繇賦屢蠲復勸農桑益務興海內休養以無事然後湛恩汪濊日所入出涿沫霑溉垓宇之大生息理極窮陬小邑物靡不得其所故邑志之成適際其盛而抑知上之人涵濡浸潤如是之深且久而後致是哉按周禮外史氏掌四方之志上之天子欲以周知列國都鄙州邑之盛衰與民所樂苦今國家方修一統志薈萃天下郡邑志書悉詣送上如古外史所掌夫覘一邑可以知郡覘一郡可以

知天下然則邑雖小亦將有取于斯志云爾王君名某金谿人起家孝廉能以經術緣飾吏事宜得書

青翰草序

南昌彭子觀宸以副榜例當貢太學意鬱鬱若不自得者毗陵邵子語之曰以子之才而浮沈遇不遇之間其鬱鬱固宜顧今日科舉之學何如哉士習四子一經兼通其傳註僅數十萬言然不竟讀也主司不以命題與集註之無益于帖括者塾師率汰其三之一而卒業焉已又取時文之剽販丐貨骹骸庸瑣而已售于有司者數百篇課之略成誦已又取坊刻策論表之與時文類者數十篇瀏覽之大較不過二十餘萬言子弟之穎者可計月而畢乃昂然出而應有司之求用之戈科名去而躋顯榮者蓋比比矣閒有卓犖瑰偉之士稍知博涉經史又不幸負能文章名則去科舉之途漸遠其學益肆則其去之也愈遠流俗乃為之說曰是不合于有司之繩尺嗟乎繩尺安在哉如此而得我從之而未必得矣如

彼而失裁矯之而亦失矣然而剽販丐貨骹骸庸瑣而遇者十九卓犖瑰偉而遇者百一則又似有繩尺者存子之才固所謂去之漸遠者也而猶介乎遇不遇之間子則幸矣又何鬱鬱為且夫學者讀書續言非務博而好勞其中必有所以確乎自信者吾苟有以自信詎以外之僥得僥失者為重輕哉彭子喜曰先生言是也會梓近詩一卷曰青翰草屬余序余乃誦前語令弁其端其曰青翰者何蓋彭子以能文章受知家靜山提學按部所至輒攜彭子偕詩多舟次所得因以名云

少司馬王公奏疏序

王公起家明萬歷丁未進士崇禎初歷官甘肅巡撫入為戶部右侍郎攝尚書事最後以兵部左侍郎總理五省督勦有奏疏如干篇定其可存者釐為三卷明自思陵御極十七年閒水旱盜賊交訐中外搯擊蒿目而萬難措手者曰兵曰餉籌餉則苦兵冗而糜餉籌兵則苦餉匱而兵飢馴至中外交困而誤遂貽于國事公三

任皆當兵餉貢而尤難者在總理之役先是上憂賊踰籍楚豫特設五省總理命盧公象昇爲之豫撫則陳公必謙二公戮力討賊數有功未幾盧公入援陳公以人言去上難其代者乃命公以兵部左侍郎出總理五省兼攝豫撫益崇禎九年十月也蘅讀公陳流寇情形及催援兵定營制諸疏大要老成持重不肖僥倖不可必之功以誤疆事有曰臣區區一念樸誠從實地做起庶幾有効不則可以欺人不可自欺更不敢欺皇上嗟乎三代以下安得此純臣之言趙充國云兵者國之大事當爲後法老臣不惜爲主上別白言之公意類是與迺公當日任事僅九閱月兵無專兵餉無專餉故左指右拄亦不能大有所創而混十萬蛤蜊圓瓦背紅旗諸賊竄伏嵩澗宛葉間者竟公任亦不得逞不可謂非公功也繼公而總理者爲熊尚書某熊故喜功好大言賊旣以撫給熊熊亦以撫自給善乎公之言曰力勦而後可撫勦不力則以撫誤而撫必不堅嗚呼公固見之蚤矣不幸公言而中至于穀房之變張獻

忠羅汝材兩渠相率颺去如猛虎之跳跟火之燎原江河之潰決奔軼四出而不可復制而熊亦自悔其失策雖身伏歐刀而賊禍愈烈矣嗚呼悲夫又讀公備陳南陽災荒疏竊歎明祚之亡已決于此當是時豫楚洊離兵旱地赭數千里人相食而南陽尤甚公抗疏請蠲語至慘痛不可讀卽朝上而夕報可猶懼亡及而部臣泄泄循習故常第曰南陽十三州縣災有輕重槩請蠲免恐餉匱難支嗚呼兵以缺餉而折而入于賊民以飢饉賦斂驅而爲賊兵與民日少賊日多而卒莫之悟以迄于亡雖曰氣數豈非謀國者之不臧有以致是哉或疑公五疏乞歸似以賊遺君父憂此非知公者問反覆公疏以原公之心公始拜命慨然以殲賊自矢迨以無兵無餉之總理提空名于諸將之上稍稍形見勢詘而會武陵驟枋用陰有所主遂聽公歸而公亦不得不去藉令不去必有掣之肘者嗚呼甲申之變公七十老臣跼伏田野久矣顧不難慷慨以身殉况親荷烈皇帝倚任之隆詎不知主憂臣辱而寫便文自

營以弛擔爲全軀計哉竊又以悲公志之不遂爲可惜也公名家
禎號軒錄大名之長垣人康熙庚午公季子元烜以名孝廉宰吾
邑出公疏稟命蘅校讐因具論之如此公死節及它行事宜詳史
傳者皆未之及也

青門旅稟卷三

青門旅稟卷四

後集

武進邵長蘅子湘

飛來峰記

武林諸山以峰名者百數飛來峰最奇峰之奇以石以巖洞峰高
五十丈許緣址至巔皆石也石之狀稜者砥者劖者植者什者兀
者獠者獸相搏者駢筍者卓筆者鸞若飛墜若壓者奇詭萬態而
無一相肖北倚大澗削壁橫展百餘丈石益奇多樹木少土樹多
楓樟檉桂松杉冬青石相大者圍三尺餘冬夏蒼翠藤蔓纏絡之
根出石縫鬱屈如虺蛇蟠怪石上澗北爲冷泉亭亭之勝亦以峰
不爾亭無奇也巖洞在峰麓有三曰龍泓曰玉乳曰射旭龍泓洞
深廣二室其上圓穴仰望見青天如在井中又名通天洞也旁一
竇直下深黑相傳有人深入數十里聞舟楫波濤聲反在頂上蓋
錢塘江底云出洞折而南爲玉乳洞空廣倍龍泓三面巖戶洞豁
豁訝相通人如行屋廡下石乳下垂青瑩膩滑間作紺碧色壁間

泉水涓涓下滴窪石大旱不枯又西爲射旭洞亦名理公巖脚皆空嵌浮土上石孔益玲瓏有曰倒垂蓮者圓徑丈下挂不及地尺許華瓣垂垂豐上而銳末如鏤刻然遊人側肩從華瓣閒度最爲奇絕又行十餘步窈得石罅僅容身穿罅中出循峰麓而西爲蓮華峰是下竺之後逕矣理公名慧理晉咸和閒來登此峰曰吾國靈鷲山小嶺不知何以飛來其說頗怪峰顧以此得名洞皆有題字今苔蘚剝蝕不可讀余遊蓋丙寅二月也

夜遊孤山記

余至湖上寓輞川四可樓已半月輞川者家學士兄戒菴別業也樓面孤山暑甚未能往七夕後五日雨過微涼環湖峰巒皆空翠如新沐望明月上東南最高峰與波溶漾湖碧天青萬象澈澈余遊興躍然借學士呼小艇渡孤山麓從一奚童登放鶴亭徘徊林處士墓下已捨艇取徑沮洳閒至望湖亭凭檻四眺則湖圓如鏡兩高南屏諸峰迴合如大環蓋亭適踞湖山之中于月夜尤勝亭

廢今爲龍王祠西行過陸宣公祠左右有居人數十家燈火隱見林薄並湖行二里許足小疲坐西泠橋石闌學士指點語余曰宋賈似道後樂園廢址在今葛嶺又記稱水竹院在西泠橋南左挾孤山右帶蘇堤當卽此地嗟乎嵐影湖光今不異昔而當時勢燄之赫奕妖冶歌舞亭榭之侈麗今皆亡有旣已蕩爲寒煙矣而舉其姓名三尺童子猶欲唾之而林逋一布衣垂六百餘年遺蹟顧至今尚存何邪相與歎久之孤山來經僧舍六七梵唄寂然惟鳳林寺聞鐘聲寥寥也作記以遊之明日

萬柳堂記

今相國益都馮公子于都城崇文門東治園一區因其突者壘之爲岡阜爲陂陁因其窪者疏之爲池爲澗因澗之曲折跨以爲橋作堂三楹其中繚以橫檻旁植含桃梅李之屬百本而柳最多至不可數計因名其堂曰萬柳康熙己未春予客京師數往遊旣得謁公子邸第退爲之記曰夫立于百僚之上以身係天下安危忠言

嘉謨效于上利澤被于下而已常任其勞此古大臣進而相天子者然也優遊泉石之間弋林而緝淵羣萃則有朋友琴酒之娛獨居則有詩書吟咏之樂此退而逸于家者然也二者往往不能相兼歐陽永叔年四十餘即思買田穎上既由翰林致位兩府閱二十年願迄未遂自序其思穎詩以爲有志于彊健之年而未償于衰老之後深以爲歎司馬溫公當神宗時退居于洛十五年其身逸矣顧其時青苗助役農田水利新法紛紜溫公以言不行不在其位老成憂國之慮常有鬱鬱不自得者國家自甲寅以前朝廷宴然海內又安無事公是時已經始此園既而滇黔用兵邊陲蠢動賴天子神聖大臣協和襄贊五年之內次第削平而園亦適成蓋公以忠誠寬大爲上所倚任常屢疏乞休堅不聽公歸忠孚于主道行于時故功成而人不驚而公因其休暇得寓其樂于此入則謨謀廟堂出則徜徉林麓古人所願慕而不能得者而公得兼有之噫何其美與又聞公于園西偏闢屋儲餼收棄子設

義塾掩骼齧細至昆蟲飛走皆被其澤而園之中遊者雜遝飲者叫呶以及販夫野老肩摩袂接于履席之間然則推公之意殆將忘勢位齊物我欲物各得其所不僅與平泉履道爭奇一樹一石誇都人之美觀已也元廉文正公希憲常作萬柳堂遺址在今豐臺左右論者以公慕文正爲人因仍其名按史稱文正以天下爲任振舉紀綱綜覈名實其相業足與公埒而公之德有過之者昔韓魏公以醉自名堂自比樂天蘇子瞻爲之記以謂君子處己也厚取名也廉故實浮于名而世誦其美公自比希憲意與魏公同惜乎予之文遠不逮子瞻也

毛會侯垂竿圖記

予嘗命工圖予像凡五曰展卷曰課耕曰垂竿曰遊岳曰蕉團而自爲長歌題其卷有曰如此溪山吾老矣釣船蠟屐明年始時康熙庚戌也其明年予以事牽願莫之遂予家兩湖之中西望瀟子東距笠澤漁人罟師之所往來煙帆之所出沒歷歷可指數心甚

樂之私計他願卽不可必當治一舫浮家泛宅徜徉兩湖以髣髴
圖之所爲垂竿者亦足慰矣又明年始買一舟復以奔走衣食去
客豫章年餘歸江南又客吳門忽忽五六年舟亦敝漏棄去今年
來客京師則予之願又無由而遂焉遂安毛君會侯起家進士令
祥符有能聲尤工古文辭方以博學宏詞徵詣闕予遇之京師出
小像屬予記與予向所爲垂竿圖乃大類予復于君曰夫翳嘉樹
坐磐石投竿而漁此貧賤之士之所樂也君以文章政事顯于世
將大用而反若有慕于貧賤之所樂此其意甚高然以貧賤之士
願之十年而不能遂者而君欲兼而有之是必不得之數也屈原
之滄浪蒙莊之杏壇未必實有是人皆藉此以寓意君之圖亦寓
焉已耳吾聞桐廬巖壑幽勝其地有嚴子陵遺風意必有石隱之
士如鑿坏披裘之徒姓名不聞于人間者君儻得見之乎願君與
予則非其人也

問津園記

士苟抱曠遠之識負遺世軼俗之情非必伏閑隱隩逃蓬藿而茹
薇蕨然後樂也隨其所之皆有以寄其所適設非其人強而處之
山岨水涯之間子子焉不能終日甚者導憂而增慨者有之無它
衷所得者異也魯菴張君始官京師爲水部郎常闕所居旁隙地
鑿澗疊石廠以華堂周繚文檻顏曰一畝居自曹歸則杜門掃軌
而時與海內文章士之客京師者觴詠其間余過而樂之爲賦數
詩有曰磴危仍綴菊澗仄亦游魚又曰明日還來過新詩許更聽
蓋紀實也未幾君以親老乞歸視去官若脫屣然僑居津門方治
所爲問津園者一樹一卉皆手自灌植日往來園間甚勤今夫京
師固榮利之藪而于勢者進之人所輻輳而奔走也雞鳴而出鐘
動而未休黃塵眯人馬上咫尺不相見營營然東西驚馳彼方自
謂志得而津門北近海南通江淮是惟舳艫魚鹽銀銅果布杉枏
之湊其俗趨賈爭擁貲自封閒亦聲伎讌會相徵逐以是爲豪耳
而君所樂願皆不在此余自京師南歸舟行抵津門訪君君喜觴

余問津園因屬余記蓋園之大視一畝居可四五而羸塹爽閑曠亦復過之中爲堂三楹左右翼以廻廊曲室堂之後屏以茅亭堂之前稍左俯以峻閣登閣而眺則海氣泱泱千里一白而潞河北來衛水東注其間浦樹沙禽風檣魚網出沒掩映于几舄閒亦勝觀矣而園之主人益蒔花木皮圖史徜徉吟詠翛然泊然視世之所有舉無足介其懷者蓋足于內者無待于外君所得與其所以樂固有異乎人者園亦寄焉而已園舊爲某公題額或曰其地嘗有隱君子耦耕也因以名云

嵩陽書院記

代

書院非古也古者三代之學嘗出于一其時自家至州閭鄉黨以達于王國無不立學之地自國子至庶民子弟無不學之人自春夏秋冬歷之三年九年無一日去于學而又取卿大夫之致其仕而歸能以道得民者爲之師其德則智仁聖義中和其行則孝友睦婣任恤其術則詩書禮樂士之生其閒者奇哀淫僻之說無所

惑其外干進者祿之念無所動其中其于聖賢之道若繪布稻粱服食之不可斯須去也故及其教之成上之公卿大夫士皆得其人下之道德一風俗同三代之盛大率由此逮嬴秦滅學歷漢唐宋元明千餘年間學或興或廢其所以教者要非古法師弟子羣居族處上者講章句課經義爲干祿之文下者責贄脩徵逐酒食號稱子游氏之賤儒而已葉適有言州縣有學徒以聚食而士之俊秀者不願于學蓋宋世已然于是一二有志之士聚生徒設學舍奮然于千載之下講求斯道于千載之上而科舉之學與性命之學始歧而爲二而當時右文之君往往卽其地賜經史置校官書院之興蓋助此矣夫學校所教如彼師儒所講如此二者果歧而不可合哉識者憂科舉之陋常思有以變其法矣而卒不可變夫無變乎今之法而有以合乎先王之道此賢者責也豈世果無其人哉登封有嵩陽書院建自五代宋至道中賜九經子史當時所稱四大書院嵩陽居其一自元明訖于本朝廢興屢矣邑人大

名兵備副使耿先生介家居講學毅然興復邑令張君壘力襄之
于是二程朱子有祠會講有堂燕居有室生徒誦習有舍既成集
諸生讀書其中每月以朔之三日課藝即今時所為科舉之文以
越望之三日講學先生之言曰今日論學不必煩為之辭即于舉
業加一行字使修其辭為有德之言見諸用為有本之學嗚呼循
乎今之法而能合乎先王之道乎先生見之矣先生誠賢者耶古
所稱卿大夫之致仕而教于其鄉以道得民者其在先生耶慶歷
中胡安定瑗教授蘇湖海內方尚詞賦獨瑗教以經義時務湖學
蒸蒸多秀彥于是有司請取瑗法為太學式 今天子重道崇儒
表章四子六經頒示中外其廣勵之意綦厚誠如胡瑗故事取先
生法下郡縣使博士之所以教弟子員之所以學畢出乎此自一
邑移之一州自一州移之天下即所為科舉之學而各有以自得
夫聖賢之道教化之成其何難之與有張君為吏廉仁愛民今以
治行當遷秩去來請曰願有記余幸獲以文辭廁名諸先生後而

又喜教化之將行也遂記之若夫興廢沿革之詳庀工之月日載
書院誌及湯先生斌記中可互見者皆不書

重建始祖康節公祠堂記

皇上以天縱之聖留神理學謂性學之傳自孟氏後至宋儒始明
而周程張邵朱六子獨得其宗乃親灑宸翰書學達性天字分賜
六家後人俾揭于祠之楹衡始祖康節公諱雍祠在河南伊川先
塋者得邀寵賜 奎章下被輝映几筵甚盛事也而衡所居毗陵
之章涅里故亦有始祖祠蓋先君子治命而衡實成之有司歲以
春秋二仲奉牲幣承祭如著令族父老相與謀曰惟是 聖天子
崇儒重道與賢有司之春秋致禮于先祠以奉上德意者甚隆而
故祠庠隘弗妥弗虔懼無以稱鉅典會江西督學道裔孫延齡侍
讀學士裔孫遠平各致白金如干兩謀新祠宇遂卜址于敝廬西
數十武背坎面離地勢塏爽近縈清溪遠屏翠巘經始于己巳八
月十二日乙亥至十一月某日訖工中為堂三楹左為別室以貯

祭器前爲門爲廡庖馩有序更衣有所級崇除坦棟宇翼如凡用木以丈計者大小四百五十甄甃以片計者十一萬三千灰堊以斤計者四千六百礮石三十丈而贏匠人坊人以工計者三百八十役夫倍是而贏三之一焉它膠煤鐵之需稱是總計費白金以兩計者二百一十有奇衡費率當十五成先志也旣成乃鑱石于壁以識月日捐金者若干人例得書

息菴記

邵子年五十三而治棺顏曰息菴取蒙莊氏語也旣成召戚友子姓落之客有疑者曰夫死者人情所苦也而子一似有所樂者何居邵子曰嘻予奚知所以苦奚知所以樂予見夫晝夜矣予見夫寒暑矣當晝而營營當夜而冥冥適然寢遽然覺常也寒至必暑暑至必寒大暑流金石大寒病皴痂而人不驚順也夫人于死生亦若是則已矣里之人有病憊而惡夜者夜則怔怔然怛怛然若虎豹之來搏大盜之狙擊其後也其父母妻子夔燭露刃環伺而

守之乃得一息之安其親交之視之者以爲是有所大苦而無可如何也亡它失其常也可不謂大哀乎是故神仙之說乘人之貪而誘之也釋氏之說乘人之怖而劫之也惡知夫貪生而生不能幸也惡知夫怖死而死不能辟也吾見可哀也已故子犂之蟲臂鼠肝悍也楊王孫之命贏墓詩也劉伶之荷鍤便埋誕也吾無取焉且夫吾形化矣而有不化者存則吾又將以是菴爲蘧廬也而又奚知所苦奚知所樂旣以語客因書之爲息菴記康熙己巳長至日

書後

書响嶼碑後

客自南岳歸者貽予响嶼碑字皆古文不可識後年餘得楊升菴慎金石文所釋讀之凡七十七字其文曰承帝曰嗟翼亦作輔佐卿水處瀨作與登鳥獸之門參身洪流而明發爾興久旅忘家宿岳麓庭智營形折心罔不辰往求平定華岳泰衡宗疏事哀勞餘

伸禋鬱塞昏徙南瀆衍享衣制食備萬國其窳窳舞永奔最後見
衡山誌載楊少宰時喬所釋亦七十七字有訓釋與升菴同者二
十一字餘各異其文曰承帝令襲翼為援弼欽塗陸句登島瀉句
端鄉邑句仔麓流船暗歇遲眠即夙訖冬次岳麓展音陌裂升析
南暴幅員節別界聯鸞魅夔魁窳舞蒸彝音又見沈鎰所釋與升
菴同惟嗟作咨洪流作魚池久旅作以此鬱作羸衍享作昌言窳
作鼠永作蒸十字小異鎰亦萬歷間人自言釋此碑時夢長人授
以古併篆文語頗怪不經按禹碑相傳在岫嶺峰又傳在衡山縣
雲密峰唐宋以來劉夢得韓退之朱晦菴張南軒四先生屢訪求
不得王象之輿地紀勝稱宋嘉定中蜀士有好奇者不憚高峻始
陟其所濡紙脫其文七十二字刻于夔州觀然不著蜀士姓名郡
邑志稱宋嘉定壬申何致字子一者遊南岳至祝融峰下樵夫引
逕隱真屏凡三度澗乃達碑所得古篆以碎歷紙摹之刻石夔門

觀及嶽麓書院參考二書蜀士即何致升菴所得蓋致本傳刻者
也宋楊南仲有言古文自漢世知者已希賈逵許慎輩多無其說
蔡君謨亦曰古篆字或多或少或省或移之左右上下後人各以意辨
識互有異同亡足怪者嗚呼篆繆分隸之學踵譌襲舛世不講久
矣況古文乎今讀碑辭升菴所釋較古雅少宰暗歇遲眠不類周
秦以上語並存之俟博古者

書嵩山石闕銘後

嵩山無秦漢碑碣惟三石闕僅存其一在中嶽廟南百步東漢安
帝元初五年陽城長呂常立其一在少室東邢家鋪西有題名而
亡其辭今可撫搨者二十一行行四字其一在啟母祠南百步漢
安帝延光二年潁川守朱龍立載啟母廟銘辭二辭皆古雅可誦
前有題名十行行七字與少室題名同少室題右有廟掾辛述廟
佐同猛趙始此無之而益以掾陳修佐左福二闕蓋一時建者志
稱闕疊石為之相去二丈許而缺其中如闕其空處刻雜花紋及

山水鳥獸形皆古拙竊怪嵩高當天中周營漢都皆近在畿內且其名首五嶽載祀典秦皇漢武以來意必有刻石紀功德如鄒擘會稽之比而今無一存者豈風霜野火兵戈之所剝蝕樵夫牧豎之所剗削千餘年間遂磨滅無餘邪然則金石刻之存于世者亦有幸不幸邪石闕刻舊亦不著明萬一開傳君元鼎得之始見于山志康熙閒葉君封令嵩陽益撫搨傳之二君可謂好古博物君子矣中嶽廟石闕已不可搨今葉君所搨啟母廟銘較志又闕七十八字相去僅五六十而石之泐者已如此然則天下何者可恃爲久存者與康熙己未四月一日

書朱文公同年錄記後

右宋高宗紹興十八年戊辰朱文公熹登王佐榜進士同年錄裝褫成帙友人林璐爲之記按紹興十二年和議成誓表稱臣構中有云旣蒙恩造許備藩方世世子孫謹守臣節嗚呼宋之君臣于是乎喪心矣自是偷安偏隅一切修彌文以飾治十四年四月知

虔州薛弼言州民朽柱中有文曰天下太平帝大悅詔宣付史館十六年正月耕藉詔曰今疆場罷警流民復業錄中載十七年三月科舉詔亦曰今疆圉日靖宜令有司蒐取茂才咸與計偕善乎林璐之言曰奄奄一小朝廷借貢士以粉飾太平考亭當日讀之必有痛哭流涕而不能已者又按紹興十七年十一月詔復進士聞喜宴故錄中載五月五日賜狀元王佐等聞喜宴于禮部蓋建炎以來廢宴至是始復也宋制科分五等其上二等皆虛而進士分三甲自太平興國八年後遂爲定制錄中載公名第五甲第九十人璐言不知五甲之制更于何時按熙寧閒安石更定科舉法殿試分五等其第五等賜同學究出身而其後沿之而不變或遂以五等爲五甲邪余記問荒落行麓中又無它書可考姑存疑以俟洽聞之士嗚呼自宋紹興戊辰至今歷九戊辰蓋五百四十二年矣其閒豐碑深刻與夫金裝玉軸四庫之書散爲雲煙者何限而是錄以文公故特存道德之足重固如是哉錄今藏杭州朱氏

家記稱朱氏寶此五百五十三年亦誤蓋未詳考也康熙己巳五月廿六日毗陵邵長蘅題于武林舟中時林璐歿已三年撫卷泣然璐別號鹿菴錢唐人以能文章名

書金谿兩烈婦紀略後
兩烈婦爲金谿孝廉張君冠玉之母故姊妹也皆姓吳氏皆蚤寡奉姑以孝稱順治丙戌冬故中丞揭公重熙起兵襲撫州不克走金谿金聲桓王得仁躡之縱兵大掠兩烈婦踉蹌掖姑出遇遊卒拔刀劫姑驚仆地烈婦遽奪持其刀以身蔽姑呼曰寧殺我卒怒殺烈婦次劫姊妹罵不絕口亦被殺而姑竟得免嗚呼兩烈婦之死烈矣無待區區詩文以傳況張君能致詩文如是之夥又奚藉余言顧其間議論有刺謬者是不可不辯肝江鄧吳之言曰兩烈婦之死死于金王之卒而階之厲者實中丞也又曰于家國無所濟而于鄉鄰大有所禍以是爲中丞罪嗚呼斯言也決天下後世忠義之防而有志之士爲之搥腕歔泣下而不能止也自古忠

臣烈士遭離百六明知事不可爲然且逆天命犯首禍慷慨赴之瀕九死而不悔者其心固有所大不忍也人情莫親于父母妻子莫愛于身夫人至捐軀命忍其父母妻子以舉事而又違計成敗利害哉今夫匹夫慕義奮袂而起不旋踵而巽懷觀望踳蹙而不敢前者則計較利害之念沮之也而謂豪傑之士然乎哉以余所聞中丞公告廟興師破家出走崎嶇江閩萬山中屢蹶屢奮迨勢窮力詘計無復之然後以一死謝天下嗚呼處死如公亦可告無罪矣而吳猶云然鄉人以愛憎爲毀譽固如是哉如吳言則睢陽之屠空阮之敗不能追荼毒生民之罪而凡史冊所載偷生苟免全軀保富貴之徒皆可自謂明哲而開門乞降賣君父以求榮者且得以保境安民論功矣是烏可哉是烏可哉吳才識庸陋又不曉古文法其文必不能傳而是編已有從而附和之者況于世之以文章名者其立言可不慎與

某旣爲此文寫一通寄張君附孝烈冊中以傳欲令覽是編者

不致為諛辭所惑張君恐未必許也然某文已鏤板是正海內
有識之士必有是余言者

長蘅跋

書雙忠遺翰卷後

右長垣少司馬軒錄王公與楊忠烈公往返手札而司馬公令嗣
似軒先生輯而傳之者也按忠烈公疏論魏璫二十四罪在天啟
甲子六月是年十一月削籍明年三月被逮六月下北鎮撫獄一
札署六月二十五日燈下弟漣再頓首即論璫之六月也其一則
就逮時筆所稱崔公為大冢宰崔景榮崔亦東林賢者甲子十一
月起官冢宰明年七月即移疾去公去而忠烈亦慘填牢戶自是
緹騎四出清流一網盡矣卷中載司馬公復忠烈書及上太宰崔
公書皆在乙丑三月後蓋忠烈就逮時崔猶在朝也後二十年遭
甲申之變司馬公以起義謀誅偽令不勝死余嘗謂明祚之亡人
知亡于賊而不知實亡于闖蓋正人者國之元氣方闖燄肆毒斬
刈誅鋤惟恐遺種譬之病人元氣耗竭奄奄者僅餘息耳思陵初

政如人將死而神清詎能延已絕之大命哉二公一死于闖一死
于賊皆與明祚相關開循覽遺墨其感慨激烈之氣蟠鬱紙上更
千百年讀之凜凜如生嗚呼當天地晦冥滄桑灰劫之餘後人能
掇拾而表彰之使司馬公之名與忠烈並垂天壤則王氏子孫亦
賢已哉司馬公歿且四十七年似軒先生來令吾邑某因得覽所
為雙忠遺翰卷獵襟莊誦為之肅然改容庚午臘月望日

雜著

王北山哀辭

代莊澹菴宮庶

北山與予後先在史館北山通籍時予廢棄家居未相識然往往
聞北山名戊申客武林遇于湖上始定交十餘日別去後九年予
復官京師相見握手懽甚自是別數日必聚聚必促膝銜卮縱談
詩文閒出古書畫金石刻鑿賞懽笑竟日以為常後年餘北山又
別去予送之彰義門別數月而計至嗚呼北山死矣予與北山別
九年幸而復合今年餘又別私計不久當復合乃遽哭其死也嗚

呼悲夫北山名曰高字鑿茲北山其號順治戊戌成進士官翰林
今上改元授工科給事中歷兵戶二科給事中遷禮科都給事
中賜對稱旨遷京卿以候補歸遭疾卒蓋康熙十七年戊午七
月也北山貌厚而氣和其為文章清雅尤長于詩孝友著宗族閒
與貧賤士交久而益篤在諫省十餘年不喜矯亢立名所上章以
十數務持大體恤民瘼數陳水旱災異其給事工科也首疏請勤
學親賢以端蒙養隆治本其遷兵科值畿輔齊晉吳楚間同日地
大震人畜死壞公私廬舍以萬計而淮揚復苦水災疏請減田租
出帑金遣使者護視災黎所全活亡算遷戶科疏劾天津債帥及
江南大蠹之為民害者遷禮科疏請卹關陝荆湖死節文武將吏
又請發粟賑江淮饑民上多從其言賜對便殿慰勞良久曰王
某數論事未嘗言利真諫官也國家自甲寅以後三方用兵度支
苦餉不繼于是中外講求利端而郡縣吏益務綜核以朘削箕斂
為能其不肖者又因以為姦天下勞弊而君處言路獨數以愛養

元元為言天子嘉其忠可謂主聖臣良之一時也方倚以大用而
君死矣嗚呼非獨知交零落為可感而國家失此善人可不為之
愛惜而痛悼也歟其辭曰

謂君未用兮則為諫官謂君莫知兮帝嘉其賢不究厥施兮中道
溘捐位不竟志兮德不配年自君之沒兮民力益殫東南水旱兮
民食孔艱艸根樹皮兮溝委壑填君儻不死兮痛哭陳言人之云
亡兮為斯世而汎瀾僅交情離合兮何足以云

族兄靜山提學哀辭

并敘

庚午中冬余自豫章東歸兄握手語絮絮不忍別曰明年使事竣
還里當訪子青門草堂余曰諾今年六月聞兄歸平湖遣奴子持
一札訂草堂期報曰中秋後過毗陵也八月行盡余方訝其不至
復附書往會有傳兄溘遊道山者余愕未敢信十月朔再遣奴子
走平湖不數日持行狀歸嗚呼兄真死矣越明日為十月八日弔
服為位而哭兄于室禮也余時病喘兩月餘氣忡惓僅續如綫按

狀兄歿以閏七月十九日蓋余附書既未達而計又不時至距兄死蓋七十有九日而今始得哭兄嗚呼悲夫兄起家順治辛丑進士官內閣中書歷戶刑二部郎中以按察司僉事提學江西滿考歸里以疾卒初官中書時會滇變起朝議用兵隴蜀中書當選一人隨征同列皆有難色兄毅然請行從安西將軍入蜀董格貝子以兄知兵令參其軍事為畫利害懸決勝敗輒中常一不用兄策軍困于蟠龍山絕糧月餘將士飢疲無人色兄意氣自如如有餉羊肉者笑曰此人肉也死生有命吾不忍啖此卻之會援至得出靖逆侯張勇填鞏昌召飲帳中詢平蜀方略兄左手引卮右手以箸畫地談戰守機宜及蜀中水陸險要阨塞娓娓竦聽侯喜曰經生中有此真邊才也將薦補隴右道缺或尼之不果嗚呼國家滇黔用兵以來智者効謀勇者効力自卒伍之賤以至市井屠販椎埋剽斂亡命之徒往往奮身弄刀稍或樹頤頰微倖取功名富貴過其望者不可勝數兄以一書生據馬羈跋履三千餘里崎嶇蠶叢

鳥道瘴癘虎豹虺蛇鋒鋦矢鏃死生呼吸之間歷三年之久大帥知其才矣然不獲以功名顯乃僅循資平進浮沈郎署十餘年迨駸駸嚮用而兄死矣嗚呼豈非命哉豈非命哉憶己未余客京師始識兄相見詢譜系世次同祖康節公又同派姚江為兄弟行則大喜兄時官曹郎獨季子待京邸呼之出拜余亦入拜邱嫂于房自是別未幾輒相見乙丑南歸別最久戊辰余自嶺表還會兄履江右任遂甯署中前後閱兩期故余知兄尤深也兄伉爽和易不治畦畛與人語衝臆而吐然遇意所不可輒面指斥人或雜以諛調為諧語刺譏雖權要人不避也人以此諒兄然亦往往以此嫉兄故宦終不顯在江右名能知人得士諸生俎豆兄于李空同夢陽家文莊寶侯廣成峒曾蔡忠襄懋德開四公皆前明視江右學者也論者不以為過讀書務博涉強記詩文濡筆伸紙數百言立就然不欲爭文士名持論少許可詩推新城王士禛文推寧都魏禧同郡則推朱檢討彝尊而尤喜余文每得一篇輒咨賞彌日或

訾余文太澹笑曰澹處正不易及君非知文者嗚呼兄之知我乃
勝我自知兄今死矣嗚呼悲夫兄諱延齡字靜山別號耐軒卒年
五十又七又聞季子翼以哀毀致疾後兩月亦卒翼字汝爲力學
攻文章曩侍兄京邸者也嗚呼天道慘酷胡至斯極邪將買舟力
疾往會兄喪思所以寫余哀者乃爲楚音以當哭其辭曰
隴阪碣礧水鳴咽些蜀山欽崙巖畫不見日些獺狢吟嘯虎豹
慄些封豕長蛇薦吞食些君胡來思激忠肝些書生投筆逐戎旃
些人肉爲醢骨爲薪些入虎穴幸而得全些嗟哉數奇獨苦辛些
偃仰郎署逾十年些九江五老迎使車些清秋日晶縣玉壺些歸
來兮卽君之新居些華軒突宇網戶朱些砥室鬆几陳詩書些胡
爲乎舍此而逝曾不留些去歲別君在南浦些朔風飛霰雜以
雨些余祛君摻離思苦些今歲扁舟登君堂些像設塵筵素幃張
些呼君不應涕泗滂些總帷絳綵兮燈青熒嗚呼哀哉兮何以爲
情

張烈婦哀辭

并敘

烈婦荀氏父名中益考城人適寧陵柳河張鐸鐸世農家父亡獨
母在烈婦勤于操作事姑謹鄰韓可元者素亡賴桀黠橫里中烈
婦始嫁時可元已闕而豔之顧未有閒久之烈婦自母家歸姑方
盥醬麥子箔未覆烈婦問故曰麥煮適熟而客至呼汝夫語未返
耳烈婦不易衣飾遽出門采蘊穉菜爲覆麥計蓋門外數百步卽
鐸田也可元瞰烈婦獨入深穉中呼王璧與偕躡其後王璧者亦
亡賴子年少而美可元私計婦人見璧必悅悅而從我因而持
之必得所欲其本謀如是是日烈婦見璧入穉叢駭且避問曰若
何爲璧稍近之烈婦大呼救人璧遽扼其吭可元亦前抱持嚇曰
不從殺汝曰願殺璧曰不從勒死汝曰全屍更好誓不從汝強犯
之則以手批可元頰且碎其裾可元拉烈婦手折之則更抵以足
兩人掉烈婦髮使什什復起屢起屢起髮鬢鬆脫落委地已乃極
力偏之至衣條條裂終不得犯可元欲舍去璧曰識汝奈何遂共

縊之死繫頸于樹烈婦將絕時所當手足抓地處坎可尺許血殷
然又以梳本椽下體掠其首飾指環去烈婦死時年十八康熙已
已五月廿三日也鐸既歸姑訝婦久不至遣鐸往視見婦屍鐸大
駭號呼村人環顧咨嗟莫得其故鐸計無如何買棺殮屍事將已
初可元自梳閒出時適與張光彩遇光彩者亦柳河人見可元衣
縷縷碎又有血流痕踉蹌走若鬪而不勝者私怪韓十素橫不讓
人今日氣何索邪可元多兄弟行十故里中以韓十呼之及是心
知可元所為私語其妻唾彩面曰啐韓十惡人今貫盈自斃汝
畏十不敢言死者有知必為厲鬼禍汝立起欲自往光彩懼且慚
乃走告鐸願為證鐸遂訟可元于官可元賄吏緩其獄至六月廿
二日始往驗烈婦死而月矣啟棺面如生肢體血斑斑鮮掖之則
僵而立眾皆驚異作人盡隱其傷謾云項上繩痕不交蓋人勒之
死則繩痕交今言不交謂自縊也令惑其言將坐鐸以誣觀者大
譁令心動揮眾使散曰明日更鞫之明日聚者益眾縣庭至不能

容乃移鞠城隍廟作人供如初有扛屍夫張九容者突前叱曰韓
十私我曹金汝得金若干尚何諱初可元賄眾時張獨不肯受故
云然作人語塞令不得已薄責之眾憤碎作人叢毆幾斃可元既
魄禡于神又見眾怒洶洶知不免具吐致死狀纖悉如畫曰椽下
體者憤不從也掠首飾指環者不得漁色姑取貨也令遣隸索可
元家則首飾指環具在乃收繫可元璧俱論死未幾相繼斃獄余
于甯陵縣志中得睢人田蘭芳所為張烈婦傳讀之氣結填膺幾
欲哭出聲不可忍嗚呼秉彝之在人如是哉按邑故有烈婦祠祀
黃喬兩烈婦明嘉靖間人黃烈婦李氏舉人黃嘉猷妻喬烈婦解
氏監生喬文光妻皆夫死自經置側事聞詔旌門建祠祀今百餘
年不廢嗚呼黃喬之死烈已然皆士族高閥習聞詩禮之訓且其
胸中固蚤辦一死矣一田閒婦遇強暴于倉卒之頃迫脅凌厲死
生呼吸稍一瞥亂皇惑鮮不自喪而能不怵不回以死自衛此其
成就尤難而慘毒亦過之愚以謂烈婦之死應祀典謂宜祔主于

祠與黃喬並邀春秋一奠之榮此賢有司事也余既序次其事乃
變爲楚聲以招之冀貞魂來安享于祠也其辭曰
葛梳蒙密不見天只幽篁黑箐孰後先只狻猊狂走逐人只荃
往遭之糜厥身只殷肉血拇冑樹間只豐隆碎訶雲晝露只羈禽
嗥獸悲空林只貞魂歸來毋滯淫只穹祠銀榜有華堂只網戶朱
綴文杏梁只承塵方紋蘭幕張只黍稌麻麥稷稻梁只膈魚膾臠
椒桂芳只五齊四酎醒柘漿只雲旗下來靈風翻只六銖織桂鳴
珮珊只摻黃攜喬步瓊軒只含顰凝睇慘不言只貞魂歸來閑且
安只

甘霖應禱頌

并敘

代

皇帝祇天法祖寬仁慈儉嘉與海內休息者十八年于茲乾覆坤
載元元阜殷或逆節萌生旋起旋踐跂行踴動之類以生以成
乃歲屠維協洽自春徂夏驕陽爲沴解澤不降歲將無麥
皇帝于是端居念咎恤刑獄省繫囚制詔禮部乃者朕躬涼德雨

暘愆期朕甚懼焉朕夙夜祗廩爲民請命臣工務循省過愆恪
共迺職以交修朕不逮四月十有二日丙子

皇帝齋于宮三事百僚齋于署越三日己卯味爽

皇帝素服斥鹵簿止傳警至圓丘門卻輦徒步百官從詣壇祠官

陳俎豆撤樂肅恭奠獻禮成屏翳續紛微雨灑浥將還宮雨大

霑澍從臣懽欣抃舞僉以爲

皇上步歷正時燔瘞祗祀至敬也肸蠁九廟豫順兩宮至孝

也屢肆赦寬繇賦賜民租至仁也聖躬衣浣濯上方減將作

盛德也皇威震聳殊域革面神功也蓋天人之際孚格已預

譬慈父之子愛子疾痛呼籲迺罔不聞昔桑林之禱應以七年

桑穀之祥弭以七日方之今日不亦庶歟臣某躬扈從郊壇獲

望盛德休光不敢辭固陋敢載拜稽首而獻頌曰

皇帝踐祚仁覆寓縣未明求衣日昃不倦惟歲協洽夏迺告早五
日不雨來甍斯曠皇帝曰咨是惟予謹陬日齋戒撤縣避殿嗟

爾臣工予猷汝贊四月既望有事郊壇緹幕夕張帷宮宿幔帝
昇于壇迺燎迺燿醴馨牢登執爵獻瓊白茅籍精蒼璧分奠垂慘
拙旃恍惚隱見夙戒之夕明星有爛月麗金波繩低碧漢將事之
晨靄靄晦晦蜚廉屏翳列缺後先膚寸斯合崇朝已徧華旗風舉
御衣珠濺滲漉汜漉漉瀟漫衍雲覆油油麥秀菁菁跋蠹欣欣婦
子衍衍鼓腹擊轆塗歌巷井惟敬格天惟天垂眷天所助順推類
可見天眷 皇帝金甌煌煌疇迷逆順旋踵滅亡餘孽奔走襁負
來王天眷 皇帝幅幘八荒西航弱水東拂扶桑南蕩滇蜀笮楚
冉隴天眷 皇帝錫之禎祥赤麟黃龍蜿蟺游翔九莖連葉靈華
芝房天眷 皇帝豐年屢降兩岐六穗黍稌秬秠納秸納稔來此
萬邦萬邦既來大開明堂偃武右文黜幽陟明賜租息繇勸農課
桑億萬斯年永垂衣裳
清故光祿大夫太子太保禮部尚書王文貞公誄 并敘 代
惟康熙十七年冬十一月十有七日故禮部尚書文貞王公以疾

薨於邸第嗚呼哀哉初


世祖章皇帝在御天下大定朝野晏安無事天子思創興禮樂釐
定天地山川祠事成一代鉅典一時儒學文章偉異之人彬彬向
用而公以是時歷官宗伯尤爲上所委任公問學淵洽知本朝故
實一切制度沿革必援經史據古今侃侃持論務合于典禮或廷
議糾紛待公一言輒決其尤大者詔議禘祭禮公疏言宜奉 肇
興 景 顯四祖及 太祖南向 太宗東向又詔議大享殿

合祀禮疏言本朝所封起運山宜附中岳壇天柱隆業二山宜附
北岳壇如前明附祀例又疏言帝王廟宜增祀守成令主如商高
宗中宗周成康漢文帝宋仁宗明孝宗七君並宜世祀又言宋臣
潘美不當在從祀列張浚三命爲將三致敗且劾李綱殺曲端疑
岳飛薦秦檜雖爲南渡名臣無可紀之功當並罷從祀 上從其
言公立朝議論多此類也長子尚書公熙先在翰林與公同爲學
士尋以考績同官禮部尚書父子後先同列海內榮之會

世祖章皇帝崩公治大行喪及今上登極禮日夜辦事左掖門
勞瘁致疾累疏乞歸後十六年年七十有八遭疾卒天子哀悼
予祭葬恩卹如著令禮官以諡請于是閣臣議曰臣謹按諡法道
德博聞曰文大慮克就曰貞故禮部尚書臣王某兼茲二德宜子
諡詔曰可遂賜諡文貞嗚呼哀榮之義備矣公諱崇簡字敬哉生
平學行文章官爵世次子姓具詳汪公琬狀及葉公方藹誌銘中
某辱姻末敢託累德述哀之義而爲之誄其辭曰
猗歟宗伯系自任邱皇皇烈祖迺宅燕幽奕世克大厥聲以衰
惟顯考分陝望重來旬來宣峭潼關隴公實篤生岐嶷少成岳瀆
稟青靈曜苞純弱冠矯翮羽儀初升陽九否往三辰泰亨
世祖龍飛拔茅彙征浴堂賜對禁掖掌綸公遽請告十載東山聲
敷物聽賢簡帝心乃光薦揆達于黻哀冢宰難之帝曰毋以予
知女賢女其強起惟帝有詔講幄女侍遂佐銓衡遂掌邦禮
世祖升遐鞠躬遺寄玉几揚命綴衣陳陛臣力孔艱臣心況瘁四

疏乞歸望高身退公之行已凜彼屋漏永言必孝因心則友公之
文章披華振秀原本六籍斯足不朽公之下士吐握恐後嵩嶽竦
峙俯彼培塿聖有遺言平格天壽昊天不弔喪此黃耇嗚呼哀哉
聖朝震悼僚屬增歆金吾復壙大官供酌累德銘勳考終定諡惟
帝念之哀榮斯備某辱葭莩覆露重陰承諱切怛涕淚雨頸託茲
旒旗冀寫予情嗚呼哀哉

青門旅橐卷四



青門旅橐卷五

後集

武進邵長蘅子湘

傳

明監察御史張公傳

公名緒倫字彝敘先世自淮陰徙青州之安邱遂為安邱人少與兄嗣倫繼倫同以文章名齊魯間崇禎辛未成進士謁選得大名府推官時流寇蔓延河洛三輔纂嚴公從巡按御史行部抵順德寇卒至公請以身捍乃率民兵登陴日夜巡樓櫓戒藺石弩矢賊攻城多殺傷驚出不意解去事聞錄其功尋奉檄校士楚省還過柏鄉流寇數萬自寧晉大掠而西會柏鄉缺令賊且至屋邑洶洶號呼聲震天或勸公聞道去不聽疾馳入城為畫方略集士民堅守而身自環甲宿城上三晝夜適熊將軍者擁兵南來將北走公遮畱激以大義又重懸賞格一軍思奮乃以兵法部勒其偏裨分軍為左右拒開門縱鄉兵千餘人出搏戰賊悉銳迎之戰既合左右張兩翼薄之賊不支遂大敗斬首二千餘餘眾竄走時崇禎六

年冬也久之攝守大名大名故無兵守備單弱公出私財募土籍其馘勇者八百人給鎧仗置材官親勒習之自是魏博軍雄于它郡又攝開州州境白窰集連山寺閒亡命嘯聚揭竿如林公以計禽其渠數人餘黨解散當是時流寇既已半天下蜂屯豕突飄忽如風雨所過郡縣吏或迎或走不敢一矢加遺而順德柏鄉皆非公屬特以忠義所激慷慨赴難又自負才足辨賊故再以身當賊鋒倉卒定變如此公狀貌魁偉美鬚為吏厲丰裁刺舉無所避尤惡墨吏每有所案治輒盡法雖權貴人居閒為請終不能得然內慈獄有矜疑必力為平反貧弱不能自直者必右之不肖為毛細苛驚遇事議論慷慨剛直不撓然務順民情以是受上知然亦以是為忌者所側目理大名六年以最徵當事無為之地者僅擬遷部主事疏入三日忽中使馳召公烈皇帝御中左門趣公入面詢練兵措餉機宜奏對稱旨又袖出御製策問命條對時殿庭暄炎令兩中貴昇試案廊廡閒對畢又大稱旨賜上方冰鑑及果餌

叩頭出尋擢湖廣道監察御史命巡視東城已命巡視兩淮鹽課先是淮揚鹽筴課當天下半而明季儲軍乏興增引增課無虛日公以謂加賦變例祇病商無益于國大指務恤商竈寬民力而國計自裕不欲以言利詭結主上心前後章凡數十上爭甚力其尤著者即撫某請增荆州鹽引而松滋加食川鹽可得羨課數十萬緡公疏爭之略曰荆州歲引三萬六千計口食鹽非可以意議增况三楚海離兵寇戶口衰耗正引尚滯若驟增引則鹽賤鹽賤則商人裹足無益即餉而重損淮課非策也按祖宗舊制川鹽不許入楚亦賴松滋州邑犬牙相間今入松滋必順流入楚姦民犯法者多雖鉗欽日聞勢不能禁而淮引逾壅課將安給臣聞利不百者不變法况今有害無利章章如是請一切如舊制便臨淮侯某請增黔吉鹽引公復抗疏曰黔吉二鹽自熹廟時建議以來十餘年閒旋行旋止蓋黔鹽可私鬻楚中吉鹽可私鬻江右遂使兩省正引難銷綱商告困故前此鹽臣屢奏罷之若益浮課而損正綱

言門於真卷五
公私交病臣未見其利也疏入悉報可宦官高起潛奏特遣中使督追遼引通課武城簿某條奏鹽筴變法六事事既已施行公皆疏請罷之嗚呼明季之既勢如瓦解原其所以由于民窮斂急驅而為盜而中外諸臣方日夜講求利端盜賊愈繁賦斂愈迫日朘月削以至于亡語曰竭澤而漁明年無魚公固蚤見之矣公按淮未替以與誠意伯忤移疾去誠意伯劉孔昭者襲世爵操兵江上多縱爪牙為姦利齟齬商人公論奏有詔令公自案之乃收繫其黨魁十餘人窮竟所考賊皆案鉅萬竟論如律誠意既內銜次骨會是秋京掣諭期誣劾公而憾公者又陰嗾言官論公病不視事公遠求罷三疏上乃許之所謂憾公而極力排竿必去公而後已者則前在大名案治之墨吏也歸不數月竟卒年五十有五初公理大名時故事囚入獄輒薙眉髮之半以防越逃公愴然曰囚自有國法何至私戕其髮膚邪請于臺令畿南四郡悉除之永著為令淮揚歲祲道殣相望公出六千金告糴于楚設廠四門日為粥

以食飢者所全活萬計及歸襍被蕭然運司積羨及贖銀之貯帑者得七萬五千金盡斥以佐縣官無毫髮染惟籠六鶴自隨閒語所親曰昔趙清獻止攜一鶴歸平愧矣嗣倫舉孝廉繼倫鄉貢進士皆不仕繼倫有子真好學攻古文辭常以博學鴻詞徵今官翰林院孔目與衡善

邵衡曰明之末造天下多故當是時左支右詘每患無可用之才有才矣又患不見知于上公之才思陵知之而多讐少與未竟其用卒齟齬以死是命也夫抑國事可知矣公所為奏議四卷余采其有關鹽政者著于篇令後有考焉語曰十夫撓椎君子小人之際可畏矣哉

登州太守譚君傳

君姓譚名吉璉字舟石浙之嘉興人以國學生試補內閣中書遷榆林同知會滇蜀用兵上官以君為能檄轉餉十萬入蜀至寧羌州遇亂總督莫公死之撫軍杭公移駐漢中遣騎追餉還久之漢

中食盡大軍退保西安棧道阻絕君閒道從黑水峪出峪路哈呀
峭險上梯懸崖下臨深谿俯視宵黑數百丈不見底窮冬冰雪滑
不可駐足是一失則顛墜糜碎君募土人善緣山者爲導其上則
土人先登垂緇下緣之登其下則繫緇于腰人持其緇末自投而
下晝餐冰作糜夜取松柏枝籍冰雪上擁衾臥七晝夜乃達盤屋
病甚臥數日榆人迎之昇以歸是歲康熙十三年冬也明年二月
定邊副將朱龍舉兵反當是時滇蜀用兵踰年閩粵東粵相繼告
變秦隴復叛三陟騷然朱龍乘亂擁兵出不備所過如破竹直逼
波羅堡距榆不百里屋邑洶洶榆林道高公召君問計安出君
具晝利害狀高公是之明日入關帝廟士民聚者數千人君灑泣
誓神諭以死守意誓詞有曰某忠臣之子義不與賊俱生辭氣慷
慨激昂聞者感動已高公出數千金屬君募壯士得四百人立忠
義大會爲編什伍明號令製旛幟畫障而守閒出其家私財享士
而身自宿城上晝夜調晝兵食眾倚以安四月又有周繼明之變

周繼明者綏德州之西川人西川地阻陘闖賊李自成故產其地
俗剽悍易爲亂繼明聚眾數千人神木與叛將孫崇雅合攻陷延
安綏德勢益張榆兵迎戰不利而榆林故斥鹵四望黃沙平時恃
餽運以給至是運道梗城中食盡居人采野蒿刮木皮以食偶語
籍籍多欲出降者高公夜呼君語曰事急矣鎮兵疲不足仗人心
將變奈何君奮聲大聲曰死譚某分也先君爲明末忠臣某爲此
官非先君意今得效嵇紹之死庶幾可見先君地下先是君父名
貞良明末以五經第進士官禮部主事遭亂棄官絮家航海入閩
卒不屈至漳州之佛潭起兵病甚歿于軍故君語云然高公懼然
曰君儒生乃能爾吾聽君出諭士民曰忠臣我與高公爲之豈責
若輩死我所以死守正爲若輩計賊一大城則玉帛子女皆賊有
也且若輩今日降明日大軍至無噍類矣眾泣且拜曰公言是明
日高公又出千金公益以數百金閒道渡河買粟于保德河曲以
兵突圍衛之入人心益堅閏五月王師及蒙古救至圍始解西邊

自朱龍構亂延安一郡十九城三十六砦堡相繼淪陷官吏閉門
納降或棄城走者相望也而榆林以彈丸之城當萬餘方張之寇
提餓羸之餘卒堅守五閱月卒以城完蓋君與高公功爲多高公
名光社靈津人後年餘以內陞去榆林既解嚴響水清平鎮羅諸
堡猶爲賊保聚君單騎諭降之諸堡悉平馳至神木爲檄檄孫崇
雅周繼明曉以禍福崇雅繼明以眾降事平幕府當上功簿而君
以不冝殺降忤大帥意詘其勞僅加一級久之遷知登州君遷登
州蓋歷俸久當得量移又不以軍功也自滇聞變起朝廷一切務
寬大以安反側郡縣不幸中寇吏走且降者後自拔抱印來歸皆
貫其罪復官之中材以下大抵皆苟免媮生自營矣而激于忠義
者乃出身犯難奮萬死不顧一生而文法吏反得操短長而訾其
後此所以沮忠臣之氣而有志之士所爲發憤太息者也君至登
黃縣有女子父爲盜所殺令誣以姦獄且具君廉得其冤力白之
坐是與上官忤數構大獄計所以中君者君僅一子會以疾天死

既內痛之而所構獄辭連君吏議奪二官尋邑邑邁疾卒君故以
文士知名于時爲人坦厚氣溫而語和與人交洞見胸臆及臨事
乃更蘄蘄不可以死生利害怵也好學工文章自少至老未常手
釋卷爲吏尚教化好緣飾以儒術官榆林時憫榆土僻陋建尊經
閣買十三經貯其中令學者知漢唐以來諸儒傳註榆故無志書
創修延綏鎮志手自削彙發凡起例論者謂可方武功志蓋武功
志成于康修撰海最稱善云其詩初爲中唐清麗自喜入蜀後乃
更沈鬱學少陵爲記序及它文實勝詩出入廬陵南豐間所著嘉
樹堂集爾雅綱目守榆紀略肅松錄凡若干卷君廉儉無它嗜好
獨嗜書所至輒傾貲購之方閒道出蜀時猶自盤屋買書千餘卷
以橐駝載之歸其沒也無一金之橐宗伯沙公贈以棺乃能殮其
同官交遊皆厚賻之乃能以喪歸弟瑄孝廉亦文章士有氣節觸
熱走三千里赴其兄喪又經紀其後事如身事有足多者
邵長蘅曰始予客京師識君其爲登州子客其署者半閱歲故子

知君特詳瑄又泣語予曰兄昔從吾父入闕遇盜斧傷父兄以身蔽之盜拔刃睨兄兄擁持益力盜以刃背捶兄數十不為動曰孝子也捨之去先母之沒兄客汝南聞疾晝夜馳三百里抵家則蓋棺矣以頭觸棺棺釘破其顙血濡縷暈絕久之乃甦言已則益泣嗚呼不愧忠孝矣

明左都御史李忠肅公傳

公名邦華字孟闇別號懋明先世唐西平忠武王晟之後也西平第十子憲觀察江西憲子游為袁州刺史始家袁再傳至遵遷吉水遂世為吉水人父建以舉人官南刑部主事公舉萬曆甲辰進士知涇縣行取山東道監察御史巡按浙以例調外熹宗初起兵備副使分守易州入為光祿寺少卿擢僉都御史巡撫天津又召為兵部右侍郎移疾去削奪為民崇禎改元起工部右侍郎改兵部協理京營戎政進本部尚書踰年用中旨罷歸尋起南兵部尚書參贊軍務以憂去服除起南右都御史道拜北掌院左都御史

時崇禎十五年也公初奉南院命以衰老固辭俄聞邊警乃奮袂起曰此豈臣子辭官日耶為文告大江之神誓募訣子孫而出抵湖口而有左兵之變先是左良玉以缺餉兵潰東下所過殺掠畱都民一夕數徙文武大吏相顧無人色公適遇之湖口為檄告良玉曰本部院四朝大臣一生忠孝勤王討逆仰望貴鎮與我同讐頃傳麾下全軍南潰江流中斷陵京震驚何輕舉若此我朝列聖英靈皇上神武羣醜遊魂旦夕膏斧貴鎮不以此時枕戈礪劍與疾討賊乃甘自菲薄貽誤功名竊所未解海內豪傑人各有心各鎮及麾下將士保無從旁觀變者舉事一不當辱身家而污青史為千古笑端智者所不出也宜即日嚴戢軍士疏通江路剋期還鎮本部院當力為貴鎮濟此飢軍不則義旗回指將不得以玉帛相見矣良玉捧檄心折又用其親信李猶龍胡以寧開陳禍福良玉大感悟乃飛書院撫發庫銀十五萬補六月糧軍心大定南都始解嚴越日公具威儀入其營良玉昧首韡擡刀插矢俯立迓鵠

首公辭改用師弟子禮見良玉請公坐樓船大閱士慰勞諸將詢問部曲姓名一軍思奮又爲公斬淫殺者四人徇于軍釋被鹵男婦四千餘人還漕鹽艘五百餘臨別至羣衣號慟公入朝上迎勞曰潰兵事處置得宜東南半壁賴卿亡恙跪奏移時數詔起立溫語如家人父子上既倚重公公亦知無不言顧是時外侮內訌人主立軍國之積弊臣下之錮習如盤根之不可拔如芟絲之不可理如壞屋漏舟之不可指拄公隨事納忠卒亦不能大有裨補而天下事竟不可爲矣甲申三月賊破潼關上召見羣臣泣數行下公退具疏請急遣皇太子監國南京疏略曰臣去年入都卽請救畿輔郡縣預備城守秦督宜扼關自固別遣重臣督師防河諸臣泄泄不省以致百二山河決魚爛都城堵牆一無可恃爲今日計皇上惟有堅持效死勿去之意爲中國主則當守中國爲兆民主則當守兆民爲陵廟主則當守陵廟周平宋高之陋計非所宜聞東南曠遠賊鋒漸蔓齊魯一旦南北中斷則神京孤注竊見

皇太子天資英武豫教端凝正宜歷試艱難請亟倣仁廟故事撫軍陪京卽日臨遣親簡親臣大臣忠誠勇智者專敕輔導便宜行事刻期償水陸飛輓集方州義師以鞏燕雲遏寇氛此宗社安危所係不容刻緩者賊兵驕師老急檄關隘吳三桂提師迎擊可以必勝救襄城伯李國禎悉簡京營精銳出爲犄角守城之事臣等力任之皇上下詔罪已悉發內帑蓄積以餉戰士勿局鑄爲盜守逆賊之首未必不可懸藁街也又曰皇上勿疑臣南人借此自便臣誓以身許國皇上卽委臣南事臣不敢任越數日又疏請命定永二王分封江南烈皇帝袖公兩疏遶殿行且讀且歎密諭閣臣陳演曰憲臣言是演頗洩其語旣而羣臣爭疏南遷臺臣閩然詆排上志甚并公兩疏寢不行三月十二日大同昌平繼陷公亟議登陴死守走告內閣閣臣魏藻德故曳踵徐徐行曰且姑待公唾之而出明日率諸御史登城城瑞拒守者矢石交下慟哭返十八日賊破外城公移宿吉安館文信公祠下烹賜豕祀信公徧餉所

知詰朝內城陷公亟奔大內闕門閉不得入歸館沐浴整衣冠北面再拜三揖信公曰邦華鄉邦後學當死國難請從先生于九京取白練書贊曰堂堂丈夫聖賢為徒忠孝大節誓死靡渝臨危授命庶無愧吾君恩莫報鑿此癡愚練尾書人生自古誰無死畱取丹心照汗青句書已繫之帶間顧語家人曰謹護總憲印還朝廷毋污賊手不得皇上確問無殞吾屍乃移席正坐持束帛繫文信公坐棺投繯而絕三月十九日辰時也年七十有一既死正屍中堂眉目軒舉如生時賊過者咸咋指呼忠臣或有下拜者越三日乃殮嗚呼唐安史之亂房瑄首建分鎮討賊之議詔下遠近相慶祿山撫膺曰吾不得天下矣公之策正與瑄合當是時燕京決計固守賊雖強不敢越燕而南太子南行可以必達既入舊都緩則填撫東南亟則控江扼淮號召燕齊援師進戰退守天下事未可知公固籌之熟矣乃天不祚明以烈皇帝之英明不能用公策卒致宗社淪胥主臣同盡嗚呼豈非天哉豈非天哉公生而孝友不

苟訾笑江西有二儒者曰鄒忠介公元標曾恭端公同亨鄒公識公于諸生勛以萬物一體之學既登第謁曾公南太宰署與極論古今典章吏治人才世運曰吾老矣報國微忱舉付吾子公學問原委得之二公為多令涇下車未幾閭里銖兩之姦悉知之會歲稔勸貸賑濟全活六萬人為御史條上章數十皆軍國大事首輔福清葉公下朝房秉燭照公面曰吾不知李懋明何似敢言乃爾福王之國有日請給養贍田土足四萬頃而後行部科噤不敢言公曰若是則之國無日矣手疏數千言爭甚力福清亦上疏極言事得寢福王遂以甲寅三月就國巡按兩浙斥賊罰公費銀數千兩屬吏洗手奉法當慮因積案填委公攜冊坐輿中流覽暗記數百人以次決遣姓名訊牒不遺毫髮吏民驚以為神其鎮天津也蒞任方一日妖賊猝攻陷景州而鎮兵盡東出城虛無兵公飛騎檄東師還遮擊賊復選步卒千人躡賊後各戒以道里時曰比合戰兩軍猶不相聞各奮擊賊賊腹背不支遂大敗俘斬四千有奇

連克景武鄒滕蓮妖殲焉既而真定督撫攘其功得金吾世職而公僅加一級蓋當時疆事類如此遷兵部右侍郎會璫燄方熾移疾歸御史倪文煥疏論公東林渠魁與周公順昌林公枝喬並落職其起為南參贊機務首議定營制汰虛卒裁冗官躬巡視江北渡浦口徑池和梁山上采石磯旬日走四千里熟察水陸形勢扼塞防禦機宜繪為圖分五疏以進大要謂守江東不如守江北請于滁和全椒墾田積穀屯兵數千人且屯且練以固門戶守下流不如守上江請于池陽開府采石置哨太平舟車兼制以固咽喉又謂徐州當四衝水陸交會宜宿重兵設總督一旦有事片檄徵調北捍邊西扼寇中奠陵京此萬全局也疏下兵部舌吐不敢覆公亦用外艱去後六年南都雖立一二老成所規畫略如公疏人于是服公先識云甲申四月公柩至自燕贈少保吏部尚書諡忠文入國朝改諡忠肅予祭葬其家葬公于鼇山之釣魚臺邵長蘅曰余客江右數往來峽江吉水閒望所謂釣魚臺者巨石

嶢嶢然俯江岸昔人以為可坐而釣也因以名云余每過未嘗不歛歔欲涕也虞山錢公謙益為公謨神道碑敘事詳贍然頗病其蕪曩見野乘所載謂公亦倡議南遷以賊臣劫制而罷嗚呼公之忠謀石畫不幸而不見用而顧使剝耳吹聲者影響附和幾與請幸江南之王欽若幸蜀之陳堯叟同傳豈不諄哉余故掇其大者具論之如此

雪樵先生傳

先生姓邵名泰清字以規世為浙之仁和人雪樵其號性狷介方潔寡言笑不苟諧俗家居以孝友聞大母林疾亟先生顛天丐以身代大母病良已以高壽終兄客粵東或傳凶問至先生晝夜泣目為失明年餘得兄書知無恙則大喜日開明如初其摯性多類此明崇禎癸酉舉于鄉出王忠烈公之門王忠烈公者名章江南武進人初令浙中以高第入為御史崇禎甲申三月闖賊入京師公方戎服巡城賊騎連呵下馬公不顧賊掣公股遂墮公踞地大

罵賊怒攢槊刺公至死馬不絕聲語具余所爲武進三忠傳公死時先生以孝廉家居爲慟哭者案月已乃斲木爲忠烈公主設之寢朔望歲時必祭祭則陳蔬脯酌酒再拜伏地哽咽或號慟至失聲如是者幾三十年居常鞅鞅不自得曰吾前朝老孝廉顧不能蚤從王先生遊地下卽死何面目見王先生故自甲申後簪冠布袍屏迹靈鷲之呼猿洞不復入城市或語以時事默不應臨歿敕其子曰吾死慎無乞誌銘嗚呼可悲也已卒時年七十八所著有忠孝見聞錄甲子紀言雪樵吟若干卷初先生避亂居山中同年生某彙千金寄其家人無知者某尋死于亂先生走數百里訪其子還之楊天驪者亦同年生客京師遭疫闔門死者十八人親交絕迹先生躬視含殮歸其喪又撫其孤汪度成立二事亦人所難者子昌國儻募不拘小節方闔粵用兵時上書親王纏纏數千言談兵事親王奇之又常獨身入賊巢說降劇賊千餘人敘功當得官輒棄去昌國余兄弟行

邵長蘅曰宋謝翱以布衣受知文天祥參其軍事天祥死翱悲不自勝常挾酒登子陵臺設天祥生荒亭隅再拜酌畢號而慟者三已乃以竹如意擊石爲楚歌歌闕竹石俱碎聞者傷之而史官之論曰翱蓋天下士也翱不負天祥有負國哉余于先生亦云

進士王東亭傳

東亭先生姓王氏名士祐字子側濟南新城人與其兄考功弟祭酒並以學行文章重海內名相埒無所軒輊故海內往往稱三王云年十五補諸生二十以貢入太學三十二舉于鄉三十九始成進士後十年需次客京師遽以疾卒時年五十先生負至性篤于孝友事親先意承志無幾微違細至虎子唾壺每身自灑滌居母喪苦塊三年不內寢考功常典試河南以磨勘繫獄先生日就獄視飲食臥起出則營糞餽詞緩急躡黃塵赤日中顛蹶營救事尋解考功每語及輒哽咽蘇蘇隕涕者久之祭酒官揚州時常病困先生馳千里往視晝夜手自調藥病良已嗟乎世人謂意氣

矜然諾千里頌義而斗粟尺布之謠號稱世家大族往往而有如
先生可以風矣既成進士後會甲寅乙卯間滇南用兵餉不給令
得入貲補官于是正途益壅先生以次當補京職然竟未及補而
沒矣嗚呼士或負畸行跡馳傲物動與世忤其坎壈菴鬱固宜先
生與人偃僂恭謹躡躡繩墨自內至外翕然稱長者而顧坎壈
菴鬱終其身年不及下壽名不挂朝籍以死而今世仕宦不由科
名起家至大官者相望也果時爲之耶儻是亦有命不可強耶先
生幼聰敏七八歲時出語卽驚其座客所爲詩最清麗可誦然不
多作有京口紀遊詩見南昌陳允衡詩選有吳興倡和詩藝圃詩
姑熟遊彙最後絕筆有和張司業秋居詩其傳于後世者僅亦止
此悲夫考功名士祿居喪哀毀遺疾以死前先生九年祭酒名士
禪學者稱阮亭先生卽屬衡傳者也子啟涓好學爲諸生有聲
邵衡曰太史公曰孔子罕稱命蓋難言之也信夫先生年垂強仕
始遇 句 將用矣顧連蹇約結以死詎非命哉然先生外和而中介

視榮利泊如也聞方需次時例當得鄉試同考官堅以疾辭不赴
嗚呼其介也乃其所以窮與

馬氏二烈女傳

康熙甲子衡客都門今少司寇馬公世濟持其先人文毅公殉
節錄一編貽予秋夜發冊讀之慨然想見公箕踞罵賊裂背噴
血時狀燭影熒然空除葉聲窸窣蒼涼慷慨淚落行間嗚呼公
固不死也而一時忠義所激能令妻死于夫子死于父臧獲爭
死于主闔門從死者四十餘人方之晉卞壺元余闕似又過焉
嗚呼烈矣文毅二女子死尤奇予心壯之作二烈女傳
二烈女者馬文毅公女也一小字二姐其一小字五姐初文毅公
陷賊時二女相要約同死公妾顧氏亦願從公既遇害女謂顧氏
今日吾輩踐約時也將爲纒梁閒從容語顧氏曰夫人故諸母行
位次宜居中雖顛沛序不可失氏曰某妾也又無出何敢與諸母
齒讓至再竟先顧氏五姐弱 句 力不能勝縋久之纒未就呼曰姊

助我二姐笑曰妹怖死耶吾助妹已乃以次就縊死先是公子少
司寇公獨脫身閒道歸京師其夫人董氏妾苗氏皆在賊中董氏
先二女自經縊再絕再什地傷額及足三縊乃死苗氏與文毅公
妾劉氏相繼死在二女後最後文毅公夫人李氏視諸人含殮畢
曰姑媳子女皆幸不辱身吾無憾矣乃繫帛奮身絕吭死是日死
者凡七人二姐死時年十有八五姐僅十五顧氏年二十餘識字
工楷書
邵衡曰嗚呼死生之際大矣兩童年弱女目未嘗識忠孝字也臨
難乃能從容審處蹈之如飴雖古烈丈夫無以過異哉余閒按史
冊所載女子大要死夫者十九若二女則死君父矣婦姑同盡妾
勝爭死文毅公刑于之化亦深矣哉

贈兵部尚書馬公家傳

余既爲馬氏作二烈女傳少司寇公又以家傳誣諉公之先兩
世宦江南有惠政余江南人而文毅公大節又余所欣然願爲

載筆者也何敢辭乃作贈兵部尚書馬公家傳

公姓馬氏名重德字瑞軒其先山東蓬萊縣人始祖英仕遼東保
義副尉卽又占籍爲遼陽人年五十補衛諸生明萬厯間以貢除
遼陽都司學訓導遷太平府別駕在太平數年投劾歸本朝以
孫貴得案贈如孫官公居官潔廉尤明敏善決疑獄一再攝縣令
所至黠吏豪民皆逆爲斂然寬于貧弱務牧養小民以故得惠愛
聲常攝蕪湖令蕪有豪殺人焚其屍冀滅迹更數令獄久不決公
微知冤狀顧未有以顯服豪久之廉得其焚屍處單騎馳往命卽
屍所聚炭薪炙地沃以醢已取堅楮覆之頃之揭楮視則屍痕宛
然故所中創處毫髮畢見豪叩頭具服竟論抵又攝蕪湖關樵盡
斥羨緡佐縣官既盈額則以償前使者連課竟數月不名一錢再
攝當塗令皆著治迹以病自劾去兩邑吏民號泣送者數萬人既
去兩邑爭立祠肖像祀之後四十餘年公有孫以大司馬總督江
南江西行部至蕪湖瞻拜祠下以公像失真謀更塑而匠人無識

公者難之明日蕪湖民奉公畫像至以十數計中有酷似者像遂成嗟乎近世郡縣吏視其官若傳舍然民亦以過客視吏更數年或不能舉其姓氏甚者詬詈隨之吏乃詆謀其民曰俗薄公以一署令更易代歷四十餘年而民願每食必祝如是豈非良吏難得而遺愛之在人者可久哉然則謂民俗媮薄者何歟三子長與進尤知名與進字復所亦以貢授訓導不赴嘗受知經略熊公廷弼熊公負才略視世所稱豪傑士無足一當者願獨折節公即其人可知矣與進二子長鳴珮即以大司馬出總督者也次鳴玳能文蚤卒

總督公名鳴珮字潤甫年十七補博士弟子員時遼左初隸本朝太宗求賢知自助以公爲工部啟心郎會諸事草創每有規畫建置輒以詢公公對輒稱旨甚器重之公爲人深博有謀善兵略從世祖入關以左參政分守山西潞汾道闖賊餘寇號一隻虎者驍悍將吏莫能制常寇岢嵐公設伏敗之已獲復遁去呼郡將

密授方略馳數十騎往縛以歸餘賊駭散移分巡下湖南道課最超遷戶部右侍郎督理江南糧儲錢法又命總督宣大所至治辦皆有聲順治十一年遷兵部尚書總督江南江西軍務當是時天下略定大江西南地延袤三四千里萑苻伏莽所在多有而鄭氏餘孽跳梁海上瀕海郡縣數中寇吏民苦之公至則選將校明什伍繕墩堡治戰艦軍政舉舉大將軍梁公化鳳時爲偏裨未知名公與語奇之疏薦化鳳有大將才命統水師遮擊海賊于崇明大戰陣斬千八百級獲賊艦百復平洋諸沙賊氣懾欲遁公爲檄檄賊中開示禍福僞督張銘鎮阮四陳輝僞總兵顧忠王有才相繼乞降忠尤劇賊號網倉顧三善水戰所鄉輒利羣賊倚以爲導忠降賊益沮竟公鎮不敢入寇久之以目疾再疏乞休詔回京視醫藥後十餘年卒先是公旣去鎮賊闌入海門破京口攻圍金陵東南大震化鳳以吳淞總兵赴援提三千卒擊破賊眾十餘萬于龍江關賊宵遁金陵圍解捷聞卽軍中授大將軍印封世爵世以是

益服公能知人云一子卽文毅公
文毅公名雄鎮字錫蕃少以大臣子選用授工部副理事官擢宗
人府敗心郎以憂去服除補左僉都御史命巡撫山西不果行康
熙九年改右副都御史巡撫廣西公質重有守忠孝出天性奉總
督公喪哀毀循禮與人交謙厚溫謹長者也遇事有不可則毅然
必達不爲利害撓待人推心不疑能得其死力粵西地連溪峒猺
獞雜處羣盜左江楊其清平梧莫扶化黨皆數百人逐捕歲餘不
能禽公至勦撫並用不數月殲其渠率餘賊解散已乃建議復邊
俸省兵米開蘇木禁停采買藥材疏十餘上先後得報可後三年
而孫延齡之變作延齡者故定南王孔有德壻也王鎮廣西薨無
子朝廷以延齡爲將軍攝軍事延齡數擅殺人犯法都統王永年
發其姦使遣者案驗辭服上不忍致之法詔奪其官會吳三桂
反粵西震動廷議復以延齡爲將軍填撫之延齡旣內銜王永年
次骨又怨前削奪其官見三桂勢張甚遂蓄異圖十三年春詐集

諸將議事縛永年于坐殺之殺副都統三十餘人遂勒兵圍撫署
以僞命遺衣帽脅公降是時承平久撫臣名封疆大吏然實無兵
柄權輕會變起倉卒公知勢不支易朝服北鄉再拜曰臣亡狀謹
以一死謝國卽距戶自經家人踰扉入救之得不死已乃遣其長
子世濟詣闕上變語曰賊勢雖強人心尚固王師至我爲內應破
之如振槁耳不則父子俱屠無爲也公子涕泣叩頭去逾月事益
急又遣其客攜次子世永孫國楨乘夜穴垣出開道達京師賊偵
知公終不屈而子孫入朝乞師者相繼益恚且懼賊兄延基率兵
排闥入環立露刃睨公公引所佩刀自剄不殊血流被體賊卒前
抱持救之奪其刀刀創救者右手墮三指賊昇公出並驅其家屬
幽別室中公絕食數日不死乃復食自是坐臥一室足不踰戶限
者四年三桂以書招公公手裂書抵之地罵曰吾天子大臣冑作
賊邪其後逆賊互相誅屠賊將吳世琮入桂林執孫延齡殺之遂
收公及幼子家僕去世琮責公降公鬚髮怒張目皆裂叱曰吾大

臣義死封疆所不即死者欲手刃叛賊耳今志不遂死矣何多言
世琮見公詞峻無降意移置他帳令賊黨更相誘說公瞋目不應
稍進以酒食則傾食擊器罵詈不絕口賊大怒令牽去以刃夾諸
人坐之地先殺幼子世洪次世泰次家僕諸老道以下九人次及
公公北嚮坐欣然引脰受刃蓋康熙十六年十月也年四十有四
是日聞變夫人李氏與其女媳妾媵自經死者七人語在二烈女
傳先是公有一幼女四孫男女及婢僕十九人皆以凍餒死闔門
先後死者凡四十三人公既死賊怒猶不解下令禁收公屍暴四
十餘日賊將趙天元過之睨公面勃勃如生驚下馬羅拜曰忠臣
也解衣覆其屍潛瘞之廣福寺後守弁某亦以李夫人及子女遺
骨竈其旁初公所遺長子世濟來京師上憫其忠詔官四品京
卿至是抗疏略曰臣父身死封疆闔門慘難暴骨原野臣誠日夜
痛心願得匍匐往收遺骸惟陛下哀憐疏入詔世濟乘傳往遂以
喪歸上遣重臣臨祭者再赦有司治窀穸特贈太子少保兵部

尚書賜諡文毅又親灑宸翰文其隧道之碑嗚呼觀公之盡忠與
聖主之所以酬忠交得之矣世濟字元愷今官刑部侍郎好學問
喜文章士能以忠孝世其家

邵衡曰衡辱交今少司寇公得具悉其家世聞前明時遼陽陷文
毅公大母趙義不辱抱一幼女赴井死馬氏脫于兵者僅三人及
文毅公之難脫者亦僅三人六十年間再罹凶旤天之于馬氏亦
酷矣抑余聞長老言忠烈之門是當有後司寇之世大也宜哉

八大山人傳

八大山人者故前明宗室為諸生世居南昌弱冠遭變棄家遁奉
新山中薙髮為僧不數年豎拂稱宗師任山二十年從學者常百
餘人臨川令胡君亦堂聞其名延之官舍年餘意忽忽不自得遂
發狂疾忽大笑忽痛哭竟日一夕裂其浮屠服焚之走還會城獨
身猖佯市肆閒常戴布帽曳長領袍履穿踵決拂袖翩躚行市中
兒隨觀譁笑人莫識也其姪某識之畱止其家久之疾良已山人

工書法行楷學大令魯公能自成家狂艸頗怪偉亦喜畫水墨芭蕉怪石花竹及蘆雁汀鳥脩然無畫家町畦人得之爭藏弄以爲重飲酒不能盡二升然喜飲貧士或市人屠沽邀山人飲輒往往飲輒醉後墨瀋淋漓亦不甚愛惜數往來城外僧舍雜僧爭矚之索畫至牽袂捉衿山人不拒也士友或餽遺之亦不辭然貴顯人欲以數金易一石不可得或持綾絹至直受之曰吾以作鞮材以故貴顯人求山人書畫乃反從貧士山僧屠沽兒購之一日忽大書啞字署其門自是對人不交一言然善笑而喜飲益甚或招之飲則縮項撫掌笑聲啞啞然又喜爲臧鉤拇陣之戲賭酒勝則笑啞啞數負則拳勝者背笑愈啞啞不可止醉則往往欬歔泣下予客南昌雅慕山人屬北蘭澹公期山人就寺相見至日大風雨予意山人必不出頃之澹公馳寸札曰山人侵蚤已至予驚喜趣呼筍輿冒雨行相見握手熟視大笑夜宿寺中剪燭談山人癢不自禁輒作手語勢已乃索筆書几上相酬荅燭見跋不倦澹公語

予山人有詩數卷藏篋中秘不令人見予見山人題畫及他題跋皆古雅閒雜以幽澀語不盡可解見與澹公數札極有致如晉人語也山人面微頰豐下而少髭初爲僧號雪箇後更號曰人屋曰驢屋驢曰書年曰驢漢最後號曰大山山人云澹公杭人爲靈巖繼公高足亦工書能詩喜與文士交贊曰世多知山人然竟無知山人者山人胸次汨滓鬱結別有不能自解之故如巨石窰泉如溼絮之邊火無可如何乃忽狂忽瘖隱約玩世而或者曰之曰狂士曰高人淺之乎知山人也哀哉予與山人宿寺中夜漏下雨勢益怒簷溜潺潺疾風撼窗扉四面竹樹怒號如空山虎豹聲悽絕幾不成寐假令山人遇方鳳謝翱吳思齊輩又當相扶攜慟哭至失聲媿予非其人也

朱孝子傳

孝子姓朱名壽命餘干之團湖邨人康熙乙卯遭亂與母李相失孝子日夜泣不欲生如是者數年一夕夢若有神語云汝母亡恙

籍正藍旗下孝子益痛哭徧拜其戚族鄰里且與訣曰壽命苟不見母不生還矣短衣芒屨背黃袱足脛赤露匍匐三千餘里走京師至則行乞市中或遺以餅餌則自食或遺以銀錢則紉衣縫中竟日忍餓不敢費一錢為贖母計也蹤迹久之果得母所在如夢中語而旗人故邀重購拒孝子孝子曰聽其門外雙膝為腫遇母生日持肉麵一盃跪進母伺母食畢然後起家學士遠平時方官京師高其行為捐金贖之既出無所依因畱學士家母性卞急小不如意則詬詈不休甚則粹而批其頰孝子益嬉笑謝曰恐傷母手後數月得便舟奉母歸餘干

邵衡曰往歲余客京師數見孝子體羸而面黃蓋凍餓奔走者三年矣是固宜然孝子不知書故其語質每對人言在母腹時日噉母血三合何忍不報嗟乎豈非天性哉余初見孝子迎拜余余大驚跪掖之起曰吾輩當拜君耳乃敢當君拜吾媿死矣

青門旅橐卷五

青門旅橐卷六

後集

武進邵長蘅子湘

碑

蔡忠襄公祠堂碑

代

蔡忠襄公祠者故建以祠前明殉節山西巡撫蔡公也公以副都御史奉命巡撫山西之明年流賊李自成陷潼關榆林寧夏繼陷秦中瓦解三晉獨當二千五百里之長河汾州平陽所在震動公屬巡按御史汪宗友守太原而自提羸卒三千往來拒賊河上一敗之大慶渡再敗之風陵渡又敗之吉鄉渡相拒四閱月彙疏請餉請援兵不報而會賊自榆林聲犯太原宗友馳羽書趣公歸衛晉王王亦手書召公使者相望公不得已三分其戲下士以二千人守平陽汾州親引千人馳入太原公既歸宗友遽出城按宅邑去而平陽亦尋陷是歲崇禎十六年十二月也正月賊遂渡河向太原而宗友以已實趣公歸懼得罪乃反誣劾公不守平陽狀有旨解任聽勘以郭守昌代命閣臣李建泰督師來援兩人者皆逗

畱不進或謂公已解任例可出境候代公慨然曰吾封疆臣當死封疆吾內斷于心久矣此時存亡呼吸奈何便文自營倖苟免吾死不忍爲遂集眾啖血盟有誓守封疆不逃不迎舍生殉國願告神明語當是時太原守備羸弱兵僅及千又無外援而臨危更易軍府事益難集士民皆知必不可守徒以激于忠義奮願同死盟廟之日哭聲振天賊遣使持偽檄招降公碎檄斬使竿其首堞樓上賊怒悉眾五十萬攻城公先期于城外度要地埋礮以待賊至果駐營其上夜募壯士發礮殲賊數千大賊益怒肉薄仰攻三晝夜有叛將內應城遂陷公知勢不支先草遺疏懷之至是以授贊書知縣賈士璋曰吾死此矣君速歸報天子是時從公者中軍副總兵應時盛材官段可達率麾下數十騎巷戰久之騎欲擁公出西門公遽躍下馬厲聲曰出門一步非吾死所時盛已出城回顧不見公呼可達復斫賊入見公坐地上時盛下馬曰死則俱死耳公問三立祠何在三立祠者故建以祀山西先賢而公常講學其

中者也步行至祠從者猶十餘人公顧可達馬尚在揮之去曰汝非命官可無死明日收吾屍也可達泣拜上馬斫西門出時盛解袍帶係東梁公再拜先賢就縊身輕不卽死時盛解鐵甲加公肩而氣絕時盛再拜公亦東向以弓弦自勒死十餘人皆同時自刎死自成故憤公甚購公屍戕而奔之海子可達陰求得之後十日乃與旗鼓周文郁材官田中馨布棺殮公葬南門外東岡竟如公命云公死以二月八日距公死僅四十日而燕京淪陷愍帝死社稷矣烏虜悲夫策公當日可以不死者有二奉旨解任待罪幸得弛擔可不死城破矣從諸將躍馬出城徐圖恢復可不死而公顧必死視夫智窮力竭計無復之而慷慨引決者尚不當同日語而況下此者然則公于成仁取義可謂安之者矣烏虜豈易而致哉公諱懋德字維立別字雲怡先世居河南之新蔡隨宋南渡再遷始家崑山爲崑山人曾祖以下三世冒姓陳至公乃復姓蔡氏萬曆己未成進士釋褐杭州推官課最當得給事中以忤同縣閣臣

顧秉謙改禮部主事其爲主事又以忤太監魏忠賢謁告歸忠賢
誅起禮部郎歷外任其爲寧前道有松山城守功又以忤閣部楊
嗣昌不敘應詔上三疏極言時事忤上意有旨切責總監高起潛
素貴橫公貽書責之大略謂職與貴監相見之禮不載會典體統
當從義起耳貴監體不詘則爲傲德職等體不信則爲失已今使
職惟朝命自尊而貴監折節士大夫懼然通賓主豈不兩相成哉
雖重忤起潛意然竟無以難爲河南布政司會斗米三金人相食
而賊聲言先服者不徵糧人心搖搖公曰此時急催科是疾驅民
爲盜也檄郡縣停徵而抗疏自劾忤旨坐奪七級公嶽嶽峙名節
不顧利害多類此初公爲諸生時得陽明傳習錄讀之喟然曰聖
學淵源在是吾知所宗矣畢生學問得力陽明不動心爲多公有
體有用臨大節而毅然不回有以也夫殉節之明年南都建號禮
部尚書顧公錫疇抗疏略曰輦轂淪陷天崩地坼文武官吏相率
抱首鼠竄甚而迎降獻策爲逆賊出死力者多有至于忼慨赴義

則僅遇其人故巡撫山西臣蔡懋德以隻身控扼全晉備著勞績
事窮勢迫灑血盟眾死守城陷之日竟疇其志若不厚加恩卹何
以慰忠魂而示以死勤事之報疏入詔與祭葬建祠諡忠襄而閣
臣馬士英方與顧修故鄉媾士英者遂劾公失守罪祠蔭格不行
烏虜此明季國是可爲太息者也入本朝順治十三年王文貞
公崇簡疏公忠節詔下部議許特祠于鄉而前明巡撫祁公彪佳
故嘗建祠胥門外燬已久康熙某年月前撫睢州湯公斌始檄有
司建今祠在虎邱之麓圮礮峻整堂廡實枚而麗牲之碑久未有
辭公子方炳再拜請某惟公英風毅烈更百世如生幸得列名碑
末有餘榮焉乃按汪編修琬魏處士禧所撰誌銘與傳稍詮次之
而于死事特詳以勵後世爲人臣者重系之辭俾歌以祀焉
天柱折兮山隤蛟鯨喙兮海飛眾曖昧兮墨屎獨致命兮疇所志
平颯靈爽兮安之籬雲駕兮焱上馳擊犇矜兮踉蹌擁修竿兮
格澤元氣灑灑兮日星薄忽臨睨兮故國麥漸漸兮原陸縹馬兮

邱之麓 歸祠兮孔安鏤檻文槐白石闌櫻桃殷兮春原洞庭秋
兮橘爛稻粢穉麥香腴臚且尊蒿蕞吳羹酸公來享兮游衍弗替
引兮子孫

清故通奉大夫詹事府詹事兼翰林院侍讀學士加禮部侍郎沈

公神道碑代

公以能書名海內三十餘年受知

世祖章皇帝以第二人及第晚被 今上特達之遇恩禮莫並或

命就御榻前濡墨揮毫或頒宮紙令繕寫卷冊以進日或一再召

見見輒賜茶或賜坐 上或自作大書命題其後所賜御書鳳管

裏號貂裘文綺茗饌之屬至不可勝紀兩宮殿庭屏障以及御座

箴銘皆屬公書自元公鉅卿碑版之文下至遐陬荒徼琳宮梵宇

爭得公書以為榮以是公名動天下與趙承旨孟頫董文敏其昌

相埒而公之學行政事又有焯然足不朽者嗚呼公詎以事重哉

公諱荃字貞猗號繹堂順治辛卯舉于鄉壬辰賜進士及第官國

史院編修會 世祖加意吏治內外互用知公才欲試以吏乃出

為分巡大梁道副使羣盜董天祿牛光天聚眾千餘剽掠許潁間

許民驚竄勢張甚公至則練卒除器縣購賞飭軍令遣中軍王福

為前鋒而身自督勁兵繼進殲其渠率餘賊解散巡按御史以功

聞禹州四十里外有竹園叢篁密篠陰翳數里盜窟穴其中劫商

賈殺而埋其屍公遣吏卒收捕發土得屍纍纍十餘盜具伏悉按

誅之老生某無子買妾有身矣與傭姦而逃盜殺傭匿妾公捕得

置妾獄中生兒乃呼老生還其兒按妾如法生叩首泣下曰使我

得有後者沈公也久之以監司入覲疏陳彰德養馬病民又禹州

糧應分上下等凡十餘事皆中利弊得報可康熙元年冬丁母憂

去服除補通薊道以他事罷誤議奪二官謫寧波府同知公具疏

辨 上雅聞公名召見命作行楷各體書稱旨特詔以原品內用

明年為康熙壬子以翰林院侍講典試兩浙入為國子監祭酒繫

遷詹事府正詹疏言 皇太子聖功在于豫養引明臣馬文升言

及韓翰聖功十三圖以進未幾復疏列出閣四事奏上並報聞故
事詹事得與會議會推公于民生利弊時政人才得失剴切極言
略無所瞻徇十八年大旱詔求直言時方更定新例令罪人當流
者徙烏喇極北以實邊下廷臣集議公獨以謂烏喇距寧古三四
千里地不毛極寒人畜凍輒死今法罪不至死者乃遣流而更驅
之死地失好生之意宜如舊例便乃獨為一議上之有詔令畫一
公堅持前議又力爭之上前曰此議行三日不雨臣願受欺罔
罪聞者皆悚上為改容納之越二日大雨盈尺流徙烏喇例竟
罷時廷臣同署議者惟少詹王君澤弘御史謝君兆昌傳曰仁者
必勇公儻近之與先是公官大梁巡撫賈公漢復屬公修豫省通
志手自削彙既成上之後十餘年詔天下郡縣皆修志發凡起例
一以豫志為法其見重如此沈氏于華亭遠有代序明初有兄弟
同官學士者長諱度次諱榮並以文章書法名于時人稱大小學
士公蓋小學士十世孫也會祖諱懋祖諱偉麟父諱紹曾皆績學

不顯自祖以下以公貴得榮贈如其官紹曾舉二子長即公幼孤
事母康太夫人最孝方官編修時忽心痛不能忍驚曰吾母春秋
高得毋病邪不數日訊至母果得疾乃拜疏趣歸省抵家則霍然
矣說者謂誠孝相感云娶莊氏封夫人子男四長宗昌太學生
次宗敏廩生俱前卒次宗敬舉人候補中書次宗敬舉人女二孫
男子四孫女二以康熙甲子十一月七日卒于京師邸第距其生
為明天啟甲子得年六十有一計聞上悼惜久之曰沈某極清
苦命以白金五百兩贖其喪其明年某月公子宗敘宗敬將以喪
歸扶服來請文其隧道之石予懼後世徒知重公書也乃論次其
大者而繫之銘銘曰
世祖皇帝飭勤吏治輟侍從班曰往旬宜嵩洛瀝澗旌榮有踐三
輔保釐撫之摩之皇帝嗣位召公于外爰侍承明爰陟銅龍廷
議紛拏勿隨勿渝奮其謇諤矯矯嶽嶽臣忠載披天聽為移偉彼
沈公瑚連鐘鏞鍾王虞褚公小技耳巖巖豐煌煌龜螭弗啗弗

泐銘詩有揭

墓誌銘

丁九貢先生墓誌銘

代

嘉禾有隱君子曰丁九貢先生以壽終將葬其子穎澂等述其行誼世系生卒來請銘泐然曰噫予戚也又名德應銘法何敢辭先生諱鑛九貢其字世居嘉善之永安鄉其先號海鶴公諱某者以徵聘起家仕黃州別駕四傳至清惠公諱賓明神宗時歷官大司空為名臣事具載國史子三人先生其仲也生以明萬曆丁酉十二月某日卒以康熙癸亥六月某日年八十有七先生為人溫厚與人語嘔煦惟恐傷之燕居每自整飭辨色起盥櫛雖盛暑不脫巾襪浴罷必衣冠為學遂于性理以躬行為宗不崇議論性最孝當清惠公懸車歸晨省秉燭問起居命退始退暮復往候就寢率以為常遭喪哀毀循禮每歲時伏獵為魚菽之祭進觴飯拜跪雖老不以屬子孫既祭必泣方髫齡時補諸生前辛酉就試南雍中

副榜以明熹宗登極恩當得官久之會崇禎甲申之變乃絕意仕進一以讀書自娛然于古今治亂興亡以及忠臣孝子蹈難捐生之事輒邑邑竟日不食或至流涕四十年丹鉛甲乙窮晝夜忘倦先生固樂此不疲抑其衷抑鬱感慨固有在邪屢舉鄉飲以避清惠諱堅辭不赴其辭當事啟略曰少不如人猶辭簪紱老無能事敢與敦槃杜門卻掃聊擬申屠之藏終隱焉文豈有彥方之譽又曰避嫌詹事固讓中書會戒同音況于直犯桓君對酒宜泐然于聞言劉叟望山必惕如其卻步雖申私悃良關大防嗚呼高節亦概見矣昔班史嘉龔勝之守死美郭欽蔣詡之好遯謂被其風聲足以激貪厲俗也東漢尤高守節士而當時處士之賢若孺子叔度皆隱約終身言論無大表見而聲施百世其名重于王公大人蓋有所以不朽者也嗟乎彼獨行終其身不悔者詎無故哉再娶皆錢氏三娶張氏子男三人穎淦郡庠生嗣澂裔沆皆國學生女二人皆適望族孫男七人棠發舉人來絳候選州判其餘幼也孫

女九人曾孫男四人曾孫女十二人葬以某月日墓在某鄉之原

銘曰

猗嗟先生維德之充匪其時之逢也頽果不食道剝窮也藁施盈車蓀獨芳也薰不自燒膏不自銷以大毫終也以考貞珉以利其後人茲焉藏也

諸老道墳銘

諸老道者馬文毅公僕也名兆元江南句容人老而蔬食喜佞佛故稱老道云文毅公撫桂林遭變拘賊中四年抗節不屈語具在公家傳及新都朱昉所為殉難紀略方賊遣騎收公時并縛其僕次及老道賊以其老縱之去老道大呼曰吾得從主人地下甚幸豈效鼠輩叛主苟圖富貴貽千古罵名邪奮然隨公行公至箕踞大罵老道亦詢詈不絕口公遇害賊亦竟殺老道或曰老道僕也于法不應銘邵某曰嗚呼老道之死烈矣所稱殺身成仁者非邪吾見今世士大夫訾訾人輒詈曰奴儕嗚呼奴儕乃有是是宜銘

銘曰

生也主從死也主依其遺骨寤于斯

王母韓孺人墓誌銘

孺人韓氏太學百川君諱某之子內殿中書舍人王君諱某之婦登仕郎鴻臚寺序班有大君諱某之妻歲貢生候補國子監學正觀光之母以康熙癸亥七月某日卒于京師之邸年六十有四其明年十一月某日將與鴻臚君同祔葬于中書君之祖墓葬有日觀光乃扶服來請銘再拜涕泣言曰吾母幼婉嫗事外大父母以孝稱及歸先府君時曾大母猶在堂春秋高吾母先事承指能得老人意事先王父及今繼祖母孟一如其事父母府君幼失恃每念及祖母莊悲輒不自勝每祭必泣吾母痛不逮事姑每助祭亦泣佐襄先王父喪哀戚循禮娣姒皆以為法府君女兄弟行凡三人歲時餽遺具棗栗粬之屬必腆終其身訢訢無異言憂某鮮兄弟為府君治兩妾飲食服御如鈞尤人情所難治家持身恭儉

以有禮故其存也內外親無老幼疏近皆愛敬之自以爲不及其
歿也下至臧獲無不哭失聲嗚呼足覘吾母矣吾母舉子一卽不
孝某孫一孫女二皆幼又曰某亡狀不能顯揚其親惟其文之垂
遠者庶幾不朽吾母于地下敢以爲請蓋觀光之言如此而今相
國宛平王公誌鴻臚君墓稱君能推先人遺貲分贍其族人又推
以澤鄰里其居京師能好客客亦日進擊鮮烹肥窮日夜未嘗見
厭俗色則孺人之助可知是宜銘銘曰
韓世房山玉同里閨乃遂婚媾惟圭承瓚鴻臚登朝章服光光孺
人婉婉內治之襄房山之邑繼陽之里塋銘其藏垂千億禩

墓表

清故文學耿君墓表

曲沃有賢而不仕者曰貞子耿君以諸生終于家其卒以康熙壬
寅某月蓋距今廿有四年矣而曲沃人至今思之其里閨婢獨饑
饉之人皆曰耿君亡矣吾屬安所資以生也鄉邑有訟者曰耿君

亡矣吾安所平曲直也宗黨戚屬之貧弱不能自立者曰耿君亡
矣脫一旦緩急強孰抑之弱孰右之也其子若孫守其家法循循
孝友恭謹曰吾先府君亡矣府君之教同敢失墜也蓋君能自不
朽于其後者如此嗚呼不賢者能然歟君諱介貞子其字一字伯
狷世居曲沃南關自君以上以科目起家爲郡縣至監司累累而
有故稱曲沃望族者必及耿氏君爲人剛直好學問事父母以孝
聞遭喪哀毀循禮屏斥浮屠家言子孫至今倣之家故饒于貲明
末歲饑盡出穀賙其鄉里遠近依君以居者三十餘姓沃邑洵饑
而君之鄉獨全有友爲勢家奴所凌轢不能自直君毅然代直
之至面斥顯貴人顯貴人爲愧謝而扶其僕爭訟不平者輒詣君
君爲片言析是非輒釋然服邕子有恃其桀黠健訟不聽君其後
長吏讞決卒如君言順治初盜起垣絳聚黨數百人剽掠附近郡
縣吏不能制其渠率曲沃人也曲沃令議遣邑中賢豪爲賊所信
服者三十人往撫君亦在遣中旣至賊礪刃以待聲色俱厲同行

皆驚悸股栗君顏色自如從容爲陳旤福賊悚然不敢加害遣騎持令箭護之歸三十人皆得無恙君遇事敢爲不可以利害怵多類此性穎敏博學強記家故多藏書遭亂散佚僅存者亦多脫簡不可讀君從書肆中緝閱默識歸葺補成書無所遺忘教子孫嚴而有方故其後卒皆有立子度以高等補博士弟子員名焯焯庠序開孫蔚起今官內閣中書亦知名嗚呼賢者固宜有後信矣君生以明萬曆丙戌距其卒之歲得年七十有七兩娶皆楊氏初配楊孺人前君三十八年卒年僅二十有六繼配楊孺人後君十八年卒年八十有二君葬以康熙甲寅某月日後十二年爲康熙乙丑二月某日將啟君之封以孺人柩祔禮也其子度旣自爲狀命中書君蔚起請銘于翰林院侍講馬邑周公又以狀與銘來請余表其墓嗚呼余見今世稱素封擁費雄于其鄉者皆厚自封殖視其鄉人饑饉凍餒漠然不相關而較量其身之利害如毫毛遇小旤患則戰掉失次斂手縮足以退蓋比比也嗚呼聞君之風不

重有愧哉余又以惜夫君之僅以諸生終也昌黎有云譬之水其爲澤不爲川乎川者高澤者卑高者流卑者止其積者多施者不遐也君儻類是歟如君之賢而不表以風世其何以爲末俗勸余故略其行誼大書于隧道曰是爲文學貞子耿君之墓至于遷徙世系子姓姻屬誌狀中可互見者皆不書其墓蓋在某縣某鄉之某原

文學明卿楊君墓表

余里中稱著姓者必曰前黃楊氏楊余母家也故君與余爲中外兄弟行君五世祖諱圻選將材官鎮江衛指揮使正德中以征江西峒賊功世襲本衛左所正千戶高祖諱鉦改業儒嘉靖乙酉舉于鄉未及仕而歿曾祖諱一珍中武科又連姻戚里得選直侍衛東宮歷遷錦衣衛鎮撫祖諱應奎父愚公諱啟聯皆襲世爵明制鎮撫秩五品于錦衣屬也願得專典詔獄所統緹騎刺姦視古司隸故雖冠武冠而權勢與大僚埒仕宦者以爲榮憑愚公生五

子君其長也君性孝友與人交坦易不設城府謙謹嘔煦其接人卑賤者益加禮好學攻經義為邑諸生弟希尹侗儻負才憑愚公奇愛之憑愚公歿君次當襲爵固以讓希尹曰吾才不如弟且父志也吾自守諸生業耳嗚呼自季札子臧之風邈俗日媮薄兄弟相尤乾餼豆簞之微往往露齷而爭奮袂而起于是韋元成劉愷丁鴻諸人之行事往往書之史冊侈為美談而闕牆推刃之釁尤屢見于大家世族君之讓非直乾餼豆簞比也嗚呼詎易得哉希尹當官治辦有聲後奉詔使嶺南便道過家上塚朱轡黃蓋出入里閭鄉人嘖嘖榮之以是益稱君孝友云君歿且二十年其孫肇請文其墓上之石余諾之經年肇踵門至十餘請無倦色憶余童卯時隨先孺人每歲一再至外家喜從諸長老詢訪舊事聞楊氏之先有諱浦者居五世不析善食指千餘尊卑秩然蓋楊氏詩書禮讓之澤望于里中者幾二百年不僅以閥閱也先孺人見背迨今三十餘年余亦客外久蹤迹闊疏不知吾鄉風俗今視曩所聞

何如願以謂行誼如君雖微肇請當亟表以風世余故論次其大者表之曰是為讓君子文學楊君之墓俾過者式焉夫豈徒昭示君之後人君諱希皋字明卿其它事行及子姓生卒宜詳誌狀中皆不書

巡撫湖廣都察院右副都御史楊公墓表

代



公諱素蘊字筠澗別號退菴舉順治壬辰進士除東明令東明當河決後敗官亭城垣民廬殆盡居民依邱阜僅數十家公至設法灑濬繕完城堞招還流散三年閉戶增至萬餘山東羣盜任鳳亭王小岡聚眾數千人剽掠旁郡漸擾害畿南制府密以屬公設計招降之餘黨解散久之以治行卓異入為御史公亢直敢言前後條上章以十數皆切中時弊而尤著者在直糾逆藩一疏先是逆藩吳三桂開邱演黔海內財賦輦輸軍前者歲亡慮數百萬計守令以下皆得自辟署珍貝犀象明珠南金之寶充牣私室勢傾中外羣失職之士及亡賴少年多歸之三桂寢驕漸至題用朝臣無


復顧忌公毅然疏斥其姦大指謂爵祿者人主之大枋綱紀者朝廷之大防枋不可移防不可潰疏末有防微杜漸語閣臣咋舌持其章不敢下會世祖章皇帝晏駕輔臣外遷公爲川北道以前疏也而三桂猶銜公不置具疏辯必欲罪公而後已有旨令回奏公奏略曰臣所爭者朝廷之體統至防微杜漸語不過期該藩每事盡善爲聖世純臣非有他也故事外吏拜疏必先具揭撫軍公見疏語直懼且得罪疆公竄易二語奏上以糾參無實坐貶公拂衣歸閉門不出者十年嗚呼古今事變之所伏每患深識之士知之而不敢言或言矣而不用語曰熒熒不救炎炎奈何使公言獲用則曲突徙薪之功可勝道哉康熙癸丑冬三桂反書聞人始服公先識于是四部交章薦公可大用以外艱辭服闋赴湖廣軍前題補分守鄖襄道當是時賊軍據川東襄陽總兵楊來嘉副將洪福相繼以城叛應賊房保之間與賊相犬牙而王師餽餉自襄至房保路險陘舟車不通歲調襄陽安陸德安三郡丁夫擔負率

儻十致一夏秋霖潦溪水漲冬雨雪徑滑顛墜漂溺死者相望丁夫缺仍檄郡甸補三郡大困而餉若不繼公訪知穀城有小溪可通舟乃親按行川谷燒石剪木數十里開漕船道于是水運通利省三郡丁夫十九而軍無乏興公之功爲多遷山西提學道滿考內陞凡四遷康熙二十六年以右副都御史巡撫安徽歲飢特疏請賑甫拜疏卽檄下州縣開倉賑給更或以爲言公曰若上須報則濡滯時日是棄民也且皇上仁聖必得所請尋報可所全活飢民無算明年夏叛卒夏逢龍據武昌全楚震動而安慶當三省衝訛言屢驚婦女爭出城走避有司訶之不止公大書榜四門曰願出城者聽而徐以塘報殺賊情形曉諭遠近數日人情安堵出城者復歸十月奉移撫湖北之命時湖北新熾于寇夏賊雖誅脇從者尚衆人情惴擾或一夜數驚公至首嚴告許之禁以安反側會上元節許民間張燈火陳魚龍百戲元夜坐堂皇戟門洞闢令士民出入縱觀明日市井熙然矣公定變大略多類此是歲又

早疏請緩徵漕糧又疏請兵餉免搭放制錢先後得報可入秋得
未疾寢劇遂以康熙己巳十月卒于官距其生為前庚午得年六
十先是湖北郡縣疾苦最甚者為沔陽州衛之沈塌田地江陵縣
之沙壓空壓漢陽嘉魚之崩坍咸寧黃坡景陵之穀折江夏崇陽
武昌通城漢陽漢川雲夢孝感應城之穀田科重監利之一年兩
賦凡六事而受害者十七州縣蓋積數十年矣公悉廉得其實條
為兩疏未及上會病甚遂口授于遺疏中切陳之就枕上作叩首
狀曰此疏行臣目瞑矣嗚呼孳孳為國知無不言公殆無愧歟楊
氏系出弘農至震而大著自是代有顯人公之先世居宜君縣之
石堡村不詳所始徙高祖諱時宜舉明經不仕曾祖諱彩諸生祖
諱國俊歲貢官三水教諭卒祀鄉賢父諱清明經廷對前明天啟
間避璫燄不仕以公貴累贈如公官兩配皆劉氏先公卒累贈淑
人又繼田氏誥封淑人子男子二長綱候選知縣次維國學生女
子四孫男一尚幼既葬綱函書狀遣使走四千里來請表公墓石

余禮辭不獲乃掇其大者而書之





青門旅橐卷六

